

الأعمال الكاملة

المسرحيات

رجب أبو سريته



---

## رجب أبو سرية



(رجب عطا الطيب)

## الأعمال الكاملة المسرحيات

العزل ... غزة ع التكة  
لو كانت ولد ... أبو عرب  
المدير العام ... جنون العظمة  
مقهى الإبداع ... تاء التأنيث

الأعمال الكاملة: المسرحيات  
رجب أبو سرية  
مسرحية  
الطبعة الأولى 2021  
ISBN: 978-9950-414-10-5

جميع الحقوق محفوظة



دار الكلمة للنشر والتوزيع

غزة – فلسطين

جوال 00972-0598877444

[kalemabook@gmail.com](mailto:kalemabook@gmail.com)

جميع الحقوق محفوظة: لا يسمح بإعادة إصدار هذا الكتاب، أو أي جزء منه، أو تخزينه في نطاق استعمال المعلومات، أو نقله بأي شكل، دون إذن خطي مسبق من الكاتب.

# رجب أبو سرية

(رجب عطا الطيب)

الأعمال الكاملة  
المسرحيات





# العزل

(الحبس الانفرادي)

مونودراما مسرحية



تدور الأحداث في زنزانة انفرادية، حيث تتكون الغرفة من جدران مغلقة في الجهات الثلاث، الجهة الخلفية للمسرح فيها كوة صغيرة، والجانبية على اليمين عبارة عن باب فيه طاقة ذات غطاء ومشبكة وتحتوي على سرير معدني عليه فرشاة وأغطية (بطاطين)، كذلك مخدة، ثم ملابس وغيارات السجن، كوب بلاستيكي..

المسرح في حالة إظلام، سوى من خطّي إشعاع الضوء المتدافعين من الكوة والطاقة، لتظهر السجناء وهو يقوم بالفعل المسرحي.

تبدأ المسرحية بانفتاح الزنزانة بعنف، والدفع بثائر إلى داخلها وهو في ثياب السجن، ثم إغلاق الباب بقوة، ليظهر لنا ثائر وهو لا يقوى على كتم ضحكته الحقيقية.. لقد ضللته، لقد ضحكت عليه، (يغالب ضحكته) وهو يجلس على السرير، ابن ال... أراد أن يستغفني.. صحيح أنني طيب ووديع، لكن ليس إلى هذه الدرجة، أصدقائي كانوا يعدّوني ذكياً، وأحياناً ذكياً جداً، لكن لم يُعدّني أحد يوماً في خانة البلهاء.. (ثم بيتسم) أراد هذا المتحذلق أن يستغفني، اعتقد أنني أهبل أو غبي.. يرفع القلم يناولني إياه بأدب وباستسلام، ثم ببساطة متناهية.. وبلهجة أمرّة تماماً كما هم معتادون دائماً مع الآخرين: وقع هنا (ثم يشير بإصبعه) إلى ذيل الورقة..

لن يغادرني يوماً طوال حياتي ذلك المشهد، أوه يا إلهي كم كان ممتعاً، وكم أود أن أتذكره دائماً، آخر ما كان يتوقعه المحترم أن ألقى إليه بالقلم.. وأرفض التوقيع ولكن لماذا يا ابن الستمائة وستين..

(يا لكم من قليلي أدب) – تبدو جملة اعتراضية، ولكن يا بيبك أنا لم أقر بما هو مكتوب في هذه الورقة..

يتأملك بحسرة من قمة رأسك إلى أسفل قدميك، ثم يضغط على الجرس الداخلي، فيجاء المرسل، ليعود بك إلى حيث تقبع هنا منذ (يبدو كمن يتذكر بصعوبة) ..منذ متى ..ثم يتطلع إلى الحائط يعد :عشرة، عشرون، ثلاثون، أربعون، واحد، اثنان، ثلاثة، ثلاثة وأربعون يوماً، أه لم يتبق لي كثير من الأيام هنا، المهم هو النتيجة، أن تقر بالتهمة التي يقذفونك بها، وأن تنهار أمامهم، وتؤكد كل ما يطلبونه منك، أم لا، ما أشد وقع التعذيب عليك، لكن ما هو أفسى وأصعب هو أن تنهار، وتقوم بإدلاء المعلومات عمّن رافقتهم على طريق الحرية والتقدم، كيف لك بعد ذلك أن تكتب حرفاً أو أن تغني شعراً، كيف يمكن لك أن تدعو لخلقٍ لم تأت بمثله ..كيف، الأمر لم يكن بالنسبة إليك تصلباً تنظيمياً، بل كان موقفاً إنسانياً، وصدقاً ذاتياً، ما كنت تقوى على تجاوزه مطلقاً..

تأتيه إشارة من الطاقة، ينهض ..نعم ..نعم، لقد نسيت في ظل فرحتي المفاجئة، (ثم يبدأ في خلع ملابس السجن)، هذا هندام رسمي، لزوم مقابلة السيد المحقق، أو البيك، كما يسمونه هنا، وكما فرضوا عليك أنت أيضاً أن تخاطبه..

لقد قلت لك يا أخي ..ثم يقاطعك بشراسة، لست أخاك أنا هنا البيك، بالطبع ..بالطبع ..ثم في سرّك – نعم ..نعم لو كنا أخوة ما كان هذا هو حالنا، لا بد أن نكون بكوات وخدم، حتى نكون مثلاً للطاعة..

اسمك ..هكذا اعتاد هذا البيك على قذف الأسئلة في وجهك، اسمي ثائر ..لا اسمك مطيع، من الآن فصاعداً أنت مطيع هنا ..لكن يا بيك ..انتهى الأمر، إياك أن أسمع يوماً بأن أحداً خاطبك بهذا الاسم المـ..قرف.

أحدٌ يخاطبني هنا ..من أين لي هذا الأحد ..نعم ..نعم (يبدو وقد تذكر شيئاً)، يبدأ بالدق على جدران الزنزانة وفق نظام الشيفرة (أبجد هوز) ..يبدو عليه الارتياح، ثم يتوقف..

ما الذي حدث لي، حقاً ماذا حدث لي، كنت في الخارج أسمع عن هذه الطريقة، ولم

أقم بتعلمها سلفاً، كانت تلك غلطتي، لا في الحقيقة لم أكن قادراً، أو لم أجد الوقت اللازم لتعلمها، كنا في عجلة من أمرنا، كما نحن دائماً، كنت ماكينة المانية متحركة .. لا تهدأ ولا تتوقف عن الدوران، ثم حين وجدت نفسي هنا بين هذه الجدران كدت أن أقوم بتحطيمها، وكم شعرت بالعجز والغضب حين سمعت الدق عليها، ولم أتمكن من الرد، الآن وبعد أن تعلمت الطريقة، صارت تمر الساعات دون أن يأتيني الدافع إلى استخدامها (تبدو عليه علامات التعجب).

يا لهذه الظلمة التي تغطي الأبصار، منذ متى لم أر ضوء الشمس، ما زال الأسبوع بأوله، بعد ثلاثين يوماً كاملة من العزل، استمتعت بأشعة الشمس، كم كانت جميلة هذه الهدية في يوم عيد ميلادي، كانت أفضل هدية ألقاها من السماء منذ سنين، يقيناً لو كانوا يعلمون بأن ذلك اليوم كان عيد ميلادي، لكانوا أحرّوه يوماً أو أكثر، كنت أجوب شوارع العاصمة، ولم أظن يوماً لنعمة الضوء، الذي يبدو لنا بديهياً .. شوارع العاصمة، كم اشتقت إليك أيتها الشقية، حين أخرج من هنا، أعتقد بأنني سأدور فيها أقبليها شارعاً شارعاً .. وربما حين يراني المارة يعتقدون بأنني مجنون .. لا ضير عليّ بالطبع، فالبعض منهم طالما اعتقد أنني كذلك، وإلا ما الذي يدفع مبدعاً مثلي، ينتظره مستقبل باهر أن يركب موج المغامرة؟ لكنني في الحقيقة ما كنت متورطاً سوى بتأييد هذه الجماعة التي تطالب بالحريات ..

(يسمع ضحكة في الخارج) ينصت ..ها ما أروع أن يكون الإنسان خارجاً يسير على قدميه، ينام وقت ما يشاء ويصحو وقت ما يشاء، يأكل وقت ما يرغب، ويذهب إلى صديق أو مكان هادئ بحرية خاصة .. لا بد أن تكون هذه الضحكة قد أطلقتها فتاة عاشقة .. آه ما أخبارك أيتها المليحة .. هل تفكرين بي، تنتظرين خروجي على أحر من جمر، كم أتوق أنا لذلك، أم أنك قد بتِ تراجعين حسابك تجاهي؟ أنا متماسك هنا من

أجلك .. آه لو تعلمين يا توأم روجي ماذا فعلت من أجلي .. في اللحظة التي وصل بي الإنهاك منتهاه، حتى اشتبهت الموت أو توقعته، انفتح الباب، وأنا في حالة الضعف الشديد، وألقوا لي بهديتك .. (ثم يتحسس "الترنج" الذي يرتديه) حينها كنت يداً انتشلنتني من الغرق التام، وفي لحظة تعد أقل من ثانية صار بي استعداد لملاقاة الموت ..

حين أخرج سأحدثك عن كل هذه اللحظات بالتفصيل، ستمثلين فخراً بي، تعرفين أنني وبسرعة أدركت كل أساليبهم، وصرت بالتالي قادراً على التوقع، كل أسبوع كانوا يأتون لي بجديد.

في أول استحمام لي كان جسدي مخضباً باللون الأزرق، ومنذ اليوم الثاني على وصولي إلى هنا، كنت أتلقى وجبة الضرب اليومية، فينهار جسدي، يلقون بي إلى حيث عزلتي، فأغط في نوم عميق، الصفعات الأولى موجعة، ثم ينعدم الإحساس، فيصير كل شيء على ما يرام!

ينفتح الباب، وتقدم له وجبة الطعام ..

يتناولها ويضعها أمامه، (ويبدأ في الأكل) كانت تلك النصيحة التي تلقيتها على غير ترتيب أو إعداد من صديقي المهتد مفيدة، (من الضروري أن تتناول طعامك جيداً)، مرة واحدة لم أقو على تناول الطعام، كانت الوجبة التي سبقته دسمة، لدرجة أنني لم أقو على السير بمفردي، كنت كورقة هشّة، بالكاد أتعرف على ما يدور حولي، سار بي الحارسان إلى هذا القبر، (مستهزئاً، كان يصّر دائماً على أن يقول غرفتك، ويستنكر عليّ أن أقول زنزانة) وألقوا بي .. ظننت أن بإمكانني أن أرتاح وقتاً، ثم أتناول طعامي .. لكن الشبع منع عليّ ذلك .. في البداية ظننت أن الأمر سيستمر حتى الثانية بعد الظهر، حيث نهاية الدوام الرسمي، ثم طمأنت نفسي بأن الوقت سيستمر حتى الثامنة الموعد المفضل لمحقيقي .. ثم مضى الوقت وأنا أترقب أن تنفتح الطاقة على وجه المأمور يقول لي كلمة واحدة، بحزم وكراهية لا أدري دافعه إليها (البس)، ثم بدأ الصحو والإرهاق والوجع الخرافي ينتاب أوصالي ..

## مسرحية العزل

كانت الصرخة في داخلي، تشبه صرخة الوليد الكتومة، التي لا بد منها لتعلن عن مواعده مع الحياة، من أين لي بفقدان الوعي؟ يمر الوقت والجحيم يحيط بي من كل جانب، ثم بدأ يتلبسني، يا إلهي لم يكن ما فات سوى لعبة ..العنبر من حولي في حالة صمت مقيم ..أشعر بالمقيمين خلف الجدران القريبة مني، أشعر بأنفاسهم المتعاطفة ..ما الذي يحدث، لا بد أن الجميع يظن بأنني على درجة من الأهمية، حتى أواجه بكل هذه القسوة (يضحك) لم أفعل سوى أن وقعت على تلك العريضة (كأنه يواجه خطراً بداخله) (لست نادماً) ..إذا لم أكن مضطرباً، الحقيقة أنني كنت أتوقع رد فعلهم، لكن لم كل هذا الإصرار على كسر مبدع مثلي؟ لقد أدركت أنك تسعى إلى الترقية، قالوا لك هم أيضاً كانوا يعتقدون بأهمية إسقاطي واعترافي ..(يقلد صوت المحقق) لقد بدأت تقرأ القرآن ..

جيد (كمن يرد في داخله، لكنني لم أحفظ شيئاً، ماذا أفعل وأنا مصاب بداء القراءة، وليس سوى هذا الكتاب هنا؟!) وماذا تظن أنك تفعل عندنا، لقد مرّ أسبوعان على وجودك هنا، فماذا تنتظر؟ (أنتظر أن تفرجوا عني) (المحقق بانفعال) ماذا قبل أن تعترف وتقرّ بدوافعك الانقلابية وبدورك التأمري؟ ماذا تفعل هنا؟ هل تشم الهواء، أم أعجبتك الإقامة؟

سامحك الله يا سميح، لقد تناقل رواد العنبر حكايتك، أعرفك يا صديقي جيداً، كنت في الخارج دعوباً ومتفانياً، وصرت زائراً دائماً لهذا المكان، وإزاء تلك الواقعة ضجّ المكان بمن فيه، عندما رأوك ترقص، ظنوك مجنوناً، أما أنت فكنت، وقد اعتدت الضرب وكل توابعه هنا، تجد فيه مناسبة مهمة للالتقاء بين وقت وآخر بهم، للوقوف عند آخر أساليبهم، حتى تستمر اللعبة بيننا، وكنت أنت تتقنها، حتى غدت لعبتك، مثلهم تماماً، هنا تجد الأكل والجلوس ولا بأس من دفع الثمن الموجه، يا لك من رجل تحتمل كالجبال ..إنه قدر يا صديقي، لا يتغير إن لم نواجهه بقوة، وعلى المكشوف ووجهاً لوجه!

الإقامة ..هنا، يا لك من متحامل، وأنا الذي لا يقوى على أن يهدأ لحظة، كنت أغرد

كعصفور في كل الأماكن، وأنا الآن هنا، أعدُّ البلاط (ثم يبدأ في عدِّ بلاط الغرفة)، (ويجوبها ذاهباً وأيباً) .. هكذا كنت أقضي الوقت، وأتسلى بمقابلتك اليومية، ثم يجلس ويبدأ في عدِّ شراشيب الغطاء، أه كم مرّة قمت بعد هذه الخيطان اللعينة ..

(يسمع صوت زقزقة عصفور)، ينتفض ويركض إلى الكوة، يصغي سمعه جيداً، اقترب يا عزيزي، لكن إياك أن تدخل القفص مثلي، الصيادون متربصون لك، ولي، لذا فحنن في جانب واحد، اسمع (ويبدأ في تجريب الزقزقة)، هذا يعني أنني أسلم عليك، وأحذرك من الاقتراب من هذا المكان المليء بالصيادين، وهذا يعني أنني أطلب منك أن تبقى قريباً مني حتى تخفف عني وحدتي، ما رأيك، لغتكم جميلة يا صديقي إنها كالشعر تماماً، وربما لهذا السبب وجددتني أفهم عليك .. نعم .. نعم أوافقك الرأي بأن الغناء واللحن الجميل هو أفضل وسيلة لمعالجة العنف والكراهية والرغبة في الشر .. نعم .. نعم اسمع كانت أمي تقرأ القرآن على رأسي حين تنتابني الكوابيس وأنا صغير، وتقول كلام الله الجميل يبعد الأشرار والشياطين، نعم .. نعم لهذا فإن الغناء يبعد عني الشر وأبناء الحرام .. ما أكثرهم ..

اسمع أنا اسمي نائر! ما اسمك أنت؟ أنت عصفور! أعرف، لكنكم لا تميزون بين عصفور وآخر، أليس لديكم ملك أو رئيس، شرطة وأمن، حاكم ومحكوم؟ أنتم في الجنة إذاً، اسمع أريد أن أسألك إن كان يمكنني أن أكون عصفوراً أنا أيضاً .. ماذا؟ (يصيح السمع) مشكلتي أنا؟ نعم معك حق، ربما لن يكون من الصعب أن أغدو عصفوراً، لكن كيف لي أن أتمتع بحريتي ما دام الصيادون من حولي أكثر، وما دامت بنادقهم وشباكهم مشرعة وجاهزة؟

ماذا؟ (يستمع إليه) تريد أن تذهب، ما زال الوقت مبكراً يا عزيزي، ولقد أسعدتني بصحبتك، زوجتك وأبنائك، فضلاً عن أنك مللت مكوثك في مكان واحد كل هذا الوقت،

لك الحق يا صديقي، لكن قبل أن تذهب بالسلامة، أتعدي بأن تجيء إلى قربي كل يوم؟  
شكراً شكراً، ثم طلب آخر، هل يمكنني أن أتمنى عليك أن تذهب إلى محبوبتي بتحيتي  
المشوبة بالهفة والاشتياق؟ هذا كل ما أتمناه .. رافقتك السلامة .. رافقتك السلامة .. يشعر  
بالسعادة، فيبدأ بالغناء:

صديقان نحن

إلى أن ينام القمر

حبيبان نحن

فسيري بقربي

كفاً بكف

أحبك حب القوافل .. واحة عشب وماء

وحب الفقير الرغيف ..

الحارس في الخارج يقوم بإغلاق غطاء الطاقة، تخرج منها حزمة أشعة صغيرة  
يضع يديه لتلقيها، ثم يقترب منها ويتلصص، كأنني أعرف هذا الرجل، لا تريدون لنا  
أن يعرف أحدنا من يوجد بجواره، تمنعون أي اتصال، ربما تخشون أن نتفق على  
إضراب ..

اسمع يا حسن ليس أمامك يا زميل سوى أن تعلن الإضراب عن الطعام، و عليك،  
وهذا هو الأهم، أن تحدد مطلبك بدقة، لأنك إذا فشلت فسيوسعون في ضربك، أنا  
معك، أستغرب وقتها (رغم الاختلاف بيننا)، يا عزيزي نحن هنا في مواجهة جلد  
واحد، أنسييت؟ ثم على بركة الله، ثلاثة أيام كانت كافية، لأن يتعاملوا معه بجدية ..  
(تفتح الطاقة) حتى الحرية بالعزلة تقومون بمصادرتها، (يخفض صوته) أعلم أنك  
تتلصص عليّ، وانك تراقبني لصالحه، وانك تقوم بعدّ لحظات نومي وجلوسي، كم مرة

فركت يدي، وكم مرة قمت فيها بعدّ البلاط، تراقبون حركة الأيدي والأرجل، الجلوس والقعود والوقوف، النوم والصحو.. ثم يتحسس يديه، كم أتوق إلى الكتابة، أحتاج ورقاً وقلماً لأنظم الشعر، لكن يدي كما أرجلي.. هذه ويتحسسها، لم تعد تطاوعني وإلاً لكانت تسير في الشوارع والحواري الآن، هل يعقل هذا لم يعد جسدي لي، يبدو ذلك، لكن لا بأس فما زال هذا (ويشير إلى رأسه) ملكي، يفكر ويتخيل بحرية مطلقة.. بل ربما أكثر مما كان عليه الحال وأنا خارجاً..

يبدو سعيداً لهذا الاكتشاف، نعم المخيِّلة.. ما كنت أتوقع أن تنفتح على كل هذه الرحابة هنا، تنفتح على الذاكرة وعلى الحلم معاً، فتصير مساحتها شاسعة، من كان يعلم بأنني قادر على تذكر تلك الأيام البعيدة، جدي يضع في يدي قرشاً، فأطير كالريح لأشتري الحلقوم، أكله قبل أن أعود إلى البيت مخافة أن يشاركني فيه أخوتي، حبة واحدة فقط احتفظت بها للبنت التي كنت أحب اللعب معها ومعاودة الدروس وإياها، وحين كبرت نسيتها ولم أتذكرها إلاّ هنا.. ماذا كان اسمها؟ فاتن؟ هل هي الآن حقاً كذلك؟

واصل من الدّق على الجدران، يصل إليه، فيردّ عليه، حتى يغدو الأمر ذا وقعٍ موسيقي.. نعم.. نعم.. أهلاً بك أيها الجار، أنا هنا وقد تجاوزت المحنة، كل ما فعلوه بي، تلقينته بصعوبة، لكن دون أن تكل عزيّمتي.

(صوت فرامل سيارة في الخارج.. ينتصب فزعاً) استر يا رب، إن شاء الله سليمة، أنتم هكذا دائماً في عجلة من أمركم، أما حياة الناس فهي أرخص من حبات الفستق.. الفستق، كم أشتهيك أيها اللعين، كنا نسير الطريق بين دار السينما ومنازلنا على أقدامنا، نشترى بأجرة المواصلات فستقاً، نأكله ونتناقش بحرارة بالغة وبصخب، نوؤل كل

فاصلة وكل إشارة في الشريط الذي رأيناه: المخرج أراد القول بأن بطله شاعري، لا يا صديقي بل أراد أن يقول بأنه رومانسي، لا كان شاعرياً بالفعل، بل رومانسياً، ثم نطلق سيفاننا للريح .. لقد فرقنا الأيام أيها الأصحاب، أين أنتم الآن، تراكم تتابعون أخباري بشغف؟ بتوجس؟ هل تصلكم أخباري حقاً، أم تراني صرت هنا نسياً منسياً؟

اسمعوا، لي قصيدة جديدة (يجلس كمن يقرأ في ورقة، قام بإخراجها من جيبه، ثم يبدأ في فتحها بتردد):

حين يمتد السكون

وتلّف عباة الكون بأسره

تنفرد عضلة القلب وحدها

تختلج وتضطرب..

أنت متأثر بدرويش، بل فيك سوداوية السيّاب، يا صديقي لم كل هذا اليأس؟ لماذا أنت غير متفائل، أنت سكوني دائماً لماذا هو خافت إيقاعك الشعري، في حين أن إيقاع الواقع هو غير ذلك؟ إيقاع الواقع؟ إلا يعجبك شعري، ليذهب إلى الجحيم، ثم تقوم بتمزيق الورقة.

ثلاثة وأربعون يوماً مرّت دون أن أكتب شيئاً، لكن لا بأس، حين أخرج من هنا ستكون هذه التجربة بمثابة حافظ كبير لي إلى الكتابة، ربما أقوم بكتابة مجموعة شعرية كاملة عنها، وربما أقوم بكتابة مذكراتي فيها، بطريقة نثرية ولكن شاعرية، لا بد أن يتخاطفها الناس، لن تكون هذه الأيام المعدمة، بلا تمنّي، لكن آه ما هذا الذي أشعر به (كمن يشعر بدوار)، ينهض متثاقلاً، حتى مفاصلي اعترها التعب، لا بد لي من ممارسة بعض الطقوس الرياضية، (يبدأ في الذهاب والإياب داخل الغرفة) .

إن قوة الإرادة، لا تجيء هكذا، بأن تفتح صدرك للريح، لكن عليك أن تدرك حدود

قدرتك، ومدى جبروتهم، منذ البداية عرفت بأنهم لا يحتملون موتي، الموت وحده كان قادراً على أن يهزمني، ما عداه من ألم كان موجعاً (يتذكر) أنت اليوم محروم من النوم.. نعم؟ (لقد مرّ أسبوعان على وجودي هنا.. هذا يعني بأن قراراً قد اتخذ بذلك، وأنها دورة جديدة في اللعبة بيننا) ..لكن الله جعل لنا النوم راحة للبال والجسد . هس ( ويشير إليك أن تصمت) أنتم هكذا، كاللصوص، تريدون أن يتم الأمر، كل الأمر، في هدوء وفي صمت، ثم بأعلى صوتك، يا أخي إن الله جعل لنا النوم معاشاً.. ثم يضحّ كل العنبر بالضحك والسخرية.

شمال ..يمين ..فوق ..تحت (يمارس الرياضة) ..ثم يتطلع إلى الطاقة، راقب، أيها الأجير، راقب جيداً، إنها أطراف أيها الرجل، قد أصابها الخمول، بعد أن كانت تجوب الشوارع والحارات والأزقة ..يتحسسها لا تبتئس أيها الأطراف الصديقة، سنخرج يوماً، وستعودين شابة كما عهدتك دائماً، وأعدك ..أعدك ..لن نشيخ أبداً..

في الحقيقة أنا أرفض حقيقة كوني سأصبح يوماً عجوزاً هراماً لا يقوى على ممارسة الحياة، بكل تجدها وبهائها، وأرفض فكرة الموت، لذا فإنني أعتقد بأنني سأعيش دهرأً، وأمني النفس بأن يكتشف العلم يوماً، قبل أن تعجز خلاياي عن مواصلة الحياة إكسير جلجامش..

يا إلهي، إنني أتحدث مع نفسي كثيراً، هل هو الجنون إذاً، لكنني إن صمت قد أنسى الكلام، دارون يقول بأن العضو الذي يفقد عمله يضمّر ويندثر، بعد وقتٍ إذاً، قد يضمّر لساني، وقد تخمل ذاكرتي، وتخدم مخيلتي، ويكون الموت الذي لا أحتمل مجرد أن يخطر على البال..

الموت .. لا لن تحتلموا أن أموت هنا، لكنهم قد يحكمون عليّ سنيماً طويلة، وما العمر إلا سنوات معدودة، أن يحكموا عليّ عشرين سنة مثلاً، يعني أنهم كمن أخذ نصف عمري، أي كمن قام بقتلي نصف قتل .. (يبدو متفاجئاً بالاستنتاج)، ولا يعتبر مجرماً من يقوم بتنفيذ نصف قتل فيك!

يجلس قليلاً، كم أشتاق إلى سيجارة، يبدأ بتخيلها، ويأخذ بالتنفيخ في الهواء، أين القلم، يمسك بعود كبريت، ويقترّب من الجدار، كم اشتقت إلى الكتابة، يحاول أن يكتب شيئاً:

في العزلة التامة عن الدنيا  
تتكفّف الأحاسيس وترقّ الرغبة

يتوقف: الرغبة؟ حين انفتح الباب يوماً، ودخلت إليك مندوب الصليب الأحمر، قفزت من مكانك وكدت أن تتلقفها بأحضانك، لولا نظرات الحارس اللعين، هي الخبيرة بأمر وأحوال من هم مثلي وفي مكاني، تقدّر ما شعرت به، هل تحسن التحدث بالانجليزية؟ نعم .. لم أشعر يوماً بجمال هذه اللغة كمثل ما شعرت بها يومها، ولم أر امرأة في حياتي أجمل منها، إنها امرأة حقيقية، تظهر حولها كل نتوءات الجسد والبياض المتشح بالحمرة المثيرة، آه أيتها السيدة لو تحمليني على جناحك إلى آخر الدنيا .. (ينتبه إلى الكتابات على الجدران):

الإسلام هو الحل، عاشت الطبقة العاملة، فتح مرّت من هنا .. ثم يضحك، هذا المكان هو ثالث الاثنين: الرحم حيث تبدأ الحياة، والقبر حيث تنتهي منها، ومن هنا إما إلى الرحم مجدداً أو إلى القبر نهائياً .. ولا فرق بين من يرتادون هذا المكان، الجميع سواسية.

يسمع صوت مارة في الخارج ..أنتم هناك، تمارسون حياتكم كالمعتاد، لماذا لا تشعرون بي، آه، أنا هنا في الحقيقة من أجلكم، نعم من أجلكم، لم يكن هنالك ثأر خاص بيني وبين هؤلاء، وها أنتم تلهون كالمعتاد، هل فعلتم شيئاً من أجلي؟ هل تظاهرتم، هل قمتم بتوقيع عريضة؟ لا لم تفعلوا، ليس سوى أبي، والأخبار التي يتناقلها أصحابي سراً فيما بينهم، لمن سأكتب الشعر فيما بعد، ولمن كتبتة من قبل أصلاً، أليس لكم؟

(يبتعد الصوت ويختفي)، حتى أنكم لا تكفون أنفسكم عناء تسليتي، لو أنكم حتى تقتربون من هذا المكان لأشعر بأنفاسكم، لو أنكم تثيرون الهواء من حولي لأشعر بالحياة، إن لم يكن في داخلي فمن حولي ..لو أنكم ..لو أنكم..

(يبدأ الدق على الجدران) ..ماذا تريد أنت أيضاً، تراك ضجر وتود أن أقوم بتسليتك، يا عزيزي لقد قلت لي كل ما لديك، وقلت لك كل ما لدي، فما نفع الدق على الجدار؟ (يتواصل الدق)، يرد عليه متثاقلاً، ماذا؟ تسأل عن أية أخبار في الخارج؟ ومن أين لي أن أعلم؟ (دق، هو يستمع)، لا لم أكتب شيئاً جديداً، وكيف لي أن أفعل، لا ورق لدي ولا أقلام، ثم لمن أكتب ولماذا؟ لا لم أياس بعد، لكنني سأخرج قريباً، وحين يحدث ذلك، سأكتب كل الشعر الذي بداخلي، نعم ..نعم سأهديك قصيدة، نعم ..نعم كما وعدتك.

تغلق الطاقة وتخفت الإضاءة، لقد حلّ الليل وجاء موعد النوم، يتمدد على فراشه، وهو يحلم ..أشتهي كل شيء، ليس المرأة وحسب، الشمس والدفء، وحتى ساندويتش الفلفل من عند "أبي طلال"، آه على قطعة حلوى، أو حتى شيئ من البهارات ..الفلفل، آه لو أني أنام وأصحو على قرن من الفلفل!؛

(إعتام تام، يدوم بضعة ثوانٍ) ينام، تركيز على شعاع ضوء هارب من الطاقة مع مؤثرات صوتية تدل على نوم عميق له (ثم الإضاءة المعتادة، يفتح الباب، وتقدم له صينية الطعام، كأنه كلب)، يقوم متثاقلاً، يتثاءب، ثم يحمل منشفته على كتفه، يقوم بحركات غسل الوجه، وتنظيف الأسنان، لقد صارت رائحتي كريهة للغاية، إنها تتناسب مع كلبٍ مثلي ..

يبدأ بتناول الطعام دونما شهية، يبدو متثاقلاً، ثم يضع الطعام في الزاوية، يجلس على السرير وينظر إلى الحائط (الإضاءة تضع في الضوء عدد الشهور الذي صار كبيراً على الحائط) .. لا يبدو عليه الاهتمام ..

زقزقة عصفور تأتيه من الخارج، لا يعيره اهتماماً، دق سريع وعنيف على الجدار، يقفز منزعجاً، ويدق قائلاً: (اخرس، لا تزعجني بعد اليوم بدقك المجنون).

الهدوء، ما أروع الهدوء، والنوم لقد أراحني من كل الصخب والتوتر، لا تحقيق ولا انفعال ولا أحلام غير قابلة للتحقق، ويبقى وجه ربك ذو الجلال والغفران، يتناول القرآن من تحت مخدّته ويبدأ في التلاوة .. ثم يقوم حيث يبدو عليه عدم النشاط، ليفرد صلاةً ويصلي، ثم يبدأ في الدعاء .. إنه ضعيف في نظره وجسده، في ذهنه وإرادته .. اللهم اغفر لي ما تقدم لي من ذنوبي وما تأخر، اللهم ولا تؤاخذنا بما فعل السفهاء منّا، اللهم إنك غفور حلِيم ..

بينما هو كذلك، يفتح باب الزنزانة، مع أشعة الضوء القوية، يبدو عليه ضعف البصر في مواجهة الضوء، يردّ إلى الزاوية البعيدة .. يشير بيديه كمن يرفض الخروج.

# غزة ع التكة

ديودراما مسرحية



تفتح الستارة على شاطئ البحر، يظهر رجل متوسط العمر، يقوم بتشكيل تمثال من الرمال، على شكل عروسة، على مقربة منه مظلة شمسية، وبعض أغراضه الخاصة على الكرسي تحتها، فجأة يدخل شاب يلعب بكرة مسرعاً، فيدوس جزءاً من التمثال الرملي.

الأول يصرخ فيه: شتٌ .. انت يا .. مش تفتح؟ هيك دعست في بطنها؟

الثاني: دعست في بطنها .. مين هي؟

الأول: صار لي من الصبح بزبط فيها .. أوه .. شعب دفش، بفهمش .. فش عنده إحساس بالفن .. انت أعمى .. انت يا .. ليش الله خلقك عينين؟ مش عشان تشوف فيهم؟

الثاني: (يقوم بتفتيح عينيه على اتساعهما): أيوه .. هيك شفت .. هادي .. العروسة؟ يا زلمة مش تكبر عقلك .. الولاد الصغار على الشط .. اللي راسم ايد طالع منها حجر، واللي راسم قبة الصخرة .. واللي .. مش عروسة .. زلمة كبير وقد حالك، بتعمل عروسة! عمرك شفت ولد يلعب بعروسة؟ الولاد يلعبوا فوتبول (ويلعبه بالكرة) أقولك .. حتى بطلوا يلعبوا فوتبول، صاروا يلعبوا (ويشير إليه بقذفة) ..

والله فكرت إنها مرة عن جد .. على العموم هي بوسة على راسها ولا تزعلي.

الأول هذي مش عروسة يا بجم، هذا نحت، فن، فش عندكو أحساس بالفن.

الثاني: لا في، بنفن فن، تلعب فنة؟ ملك وألا كتابة

الأول: أتقل من دم هيك بني آدمين أنا ما شفت

الثاني: أنا دمي ثقيل؟ أي والله اخف من دمي ما في، كل شهرين تلاتة، باروح ع

المستشفى بتبرع بالدم، أنت بتتبرع؟

الأول: لا

الثاني يتابع: وحتى من غير ما نتبرع، ما أحنا دمننا ناشف

الأول: كل هالمنطقة مش واسعاك، جاي عندي لليس؟ روح العب بعيد عني  
الثاني: تلعب معي فوتبول؟ حلاوة الشط نلعب عليه،  
الأول: هي اللي ناقص، العب فوتبول ما واحد زيك  
الثاني: ماله زيي؟ ماله زيي، مش عاجباك خلقتي؟ وألا ليكون أنت خلقة ثانية،  
وألا يمكن بذك تعيب على خلقة الله.

الأول: ماشي خلص روح انقلع من هان  
الثاني: بروح باجي على كيفي، أنت طوبتها عاسمك؟ الشط شطنا والبحر بحرنا،  
بلعب وين ما بدي، وكيف ما بحلالي  
الأول: بذك تروح وألا أجيب لك الشرطة  
الثاني: هي شرطة، بوليس، خوفنتي بتفكرني بخاف يعني، إحنا لو بنخافيا با كان  
من زمان عيدنا

الأول: شو هاللبط هاد  
الثاني: لبط؟! أيوة أيوة عرفتك، غسل يا بريمو، أيوة اسكيمو، قرب يا شوبان، تعال  
يا حران، أنت ابن الحجة صديقة.

الأول: أم خالد لو سمحت  
الثاني: أيوة أيوة انت خالد  
الأول: انت مش لاقى لك شغلة، انت جاي تتشغل في وألا ايش  
الثاني: مهو هادا شغل  
الأول: شغل، انت جاي تتشغل في اليوم؟  
الثاني: انت وين عايش، كلك قاعد في برج نحاسي؟ بتشوفنيش؟  
الأول: أشوفك؟ وين بدي أشوفك؟ أمم أنا بقول هالدفاشة مش غريبة علي؟  
أنا شفتك قبل هيك؟!

الثاني: شفتني ! أكيد ما أنا نجم.

الأول: نجم؟ كرة قدم؟ فوتبول؟

الثاني: آه .. أنا بلعب فوتبول .. سلة .. طرنيب .. تركس، قلول، وبلعب دكتور،  
مهندس، بياع فلافل، ووزير وزبال.

الأول (مستغرباً): آه.

الثاني: أكيد شفتني في التلفزيون.

الأول: قسدكالـ BBC والـ CNN

الثاني: بعدتها كثير يا زلمة, تلفزيون فلسطين, ما كل الناس بتشوفني وأنا بممثل.

الأول: انت بتشتغل ممثـل.

الثاني: ممثـل في الليل, وفي النهار موظف.

الأول: ممثـل .. هان؟

ليش هوة في تمثيل عندكو؟ فيه فن؟

الثاني: آه .. فيه فن ومسرح وتلفزيون .. بس فيش عنّا سينما.

الأول: انتو بتمثلوا؟ وبتعرفوا؟ .. انت وين ساكن؟

الثاني: عارف حارة السّماكين, بتخش على الهودة, بتلاقي دار زينكو جنبها ساحة صغيرة, جنب الساحة دار أم إبراهيم, جنبها على طول في زلمة دايمًا مبسط بصيادات فيران, تسألوش, بكرهنا .. مش راح يدلك .. فيه مرة عجوز مبسطة بجبنة بلدية بتسألها عن دار جواد عبد الكريم بتدلك.

الأول: آه جواد .. اسم مش غريب عليّ (يحك برأسه ويتذكر) ..

الثاني: وأنا بعرفك .. مش انت ابن الحجة صديقة, لتكون خالد, بس محلو .. يا

زلمة متغير كثير .. وين كاين وايش عامل؟

الأول: رحنت أمريكا, وأحيت من سنتين بس.

الثاني: (باستغراب): أمريكا؟ وليش إن شاء الله؟

الأول: عشان أدرس

الثاني: دراسة ايش؟

الأول :اشي بتعرفوش؟

الثاني :في اشي بنعرفوش؟ ذرة؟  
الأول:مسرح.

الثاني :مسرح؟ عشان المسرح بتروح أمريكا (بتفخيم) يا زلمة هادي الشغلة بدها تروح إلها ع أمريكا؟ كان أخذت لك دورة .. دورتين وهوب وإلا انت على الخشبة .. (هوب) إلا الناس مصقالك ( .. هوب) إلا أنت مفلس.

الأول :دورة .. يا بني آدم أنا بحكي عن المسرح، مش سلق بيض.

الثاني :والمسرح هناك – في أمريكا – بيكلف كثير.

الأول :أوه .. أوه .. أخر مسرحية اشتغلت فيها كلفت around سبعين ألف دولار.

الثاني :سبعين ألف بس؟ يا زلمة هادا مبلغ بنحكي فيه، أنا أصغر اسكتش أعملته للأطفال الرضع .. كلف .. around بذك إياه مع المية الحلوة ومصاريف الشاي والسكر وألا من غيرها؟

الأول :مسرح على التكة .. تك بطلع الديكور .. تك بنزل الديكور .. تك إلا لوحة سينوغرافيا .. تك إضاءة، خاصة لما تكون لمسترد فورد .. ياه .. تك

الثاني : تك غرفة وكالة، تك فرشاة، تك بطانيات، تك ديكور، تك وإلا النص جاهز، تك بطاطا .. تك سلق وعدس .. تك أم العبد بتبيع ترمس، تك مية شيكل، تروح ع الدار بيكلوهم الولاد بنص يوم، وايش بذك تك لما تك؟

يسمع صوت طائرة الاستطلاع .. زن .. زن

الثاني :يهرول صائحاً : أم كامل .. أم كامل (ويتطلع إلى الأعلى).

الأول :يتطلع حواليه :أم كامل .. وبينها؟ وبينها أم كامل؟

الثاني: وبين بدور؟ أم كامل يا زلمة .. أم كامل

الأول: آه .. هادي وحدة ست؟ حلوة؟

الثاني: حلوة كثير .. أم كامل طيارة الاستطلاع، وراها على طول بتيجي الأف.16

صوت قصف مدوي

ياخذه بحضنه وينبطحان معاً، تتناثر الأشياء على المسرح.

الأول: يلتصق بالثاني خائفاً.

بعد قليل

الأول: هادا مشهد مسرحي؟

الثاني: مشهد مسرحي؟ انت وين عايش؟

ويتطلع إلى مكان القصف: المبنى كله راح. أكيد فيه ولاد صغار.

الأول: ولاد؟ صغار؟ ماتوا؟

الثاني: (ضاحكاً باستهزاء) هادي سينوغرافيا.

يا زلمة ابتسم انت في غزة

انت ايش جابك .. ايش جاي تسوي هان؟

الأول: سمعت أنها راح تصير سنغافورة، وكل اشي بدو يصير تمام، وبدكو تصيروا

بني آدمين .. قلت أعمل لهم مسرح.

الثاني: هي صارت سنغا .. شوية وإلا اجت الفورة، أنا عارف من وين بتجيبوا ها

الحكي .. إحنا بدنا إياها غزة، زي ما هي .. بسماها، بحرها، هواها، بجنونها، بفنونها،

بتجنن.

الأول: انتو أصلا مجانين ، الحق جيب لي صيادات فيران، مجاري بدكوش تنظفوا،

تنظفوا المدارس, توسعوا المدارس, تبنوا ملاعب نوادي مسارح .

الثاني: لا بدنا، بس مش الأول لما نحررها من الحواجز والبساطير، ونحرر بلادنا ونقعد لحالنا ونحط رجل على رجل، انت ايش كنت جاي تسوي؟

الأول : أنا كنت جاي أعمل شكسبير، برنارد شو، تشيخوف، بريخت، وجبت معي هاملت.

الثاني :يتحول إلى شخصية هاملت، ويؤدي النص الشكسبييري.

لقد أحببت أوفيليا، أربعونَ ألفِ أخٍ بمجموعِ حبهم لن يساواوا مقدار حبي أنا، ما الذي تريدُ فعله من أجلها؟

هيا أرني ما الذي تريدُ فعله؟

أبكاءَ تريدُ؟ أقتالاً؟ أصوماً؟ أتمزيقاً لنفسك؟

أخلاً ستجرعُ، أتمساحاً ستأكلُ؟

سأفعلُ ذلك.

هل أتيتَ هنا لتتنَّ وتتأوه؟

لتبُزني بالفقرِ إلى قبرِها؟

لُتدفنَ حياً معها؟

سأفعلُ ذلكَ أيضاً.

ولئن كنتَ تهذُرُ عن الجبالِ، فليهيلوا

ملايينَ الفدادينِ علينا، حتى إذا ما اشتعلتِ

الهامةُ من أرضنا في مدارِ اللهبِ

بان "أصا" كالخالِ إزاءها، وإذا أردتَ التشدقَ، فإني أتشدقُ مثلك!

الأول: أووه هاملت .. مش بطل .. شوية شغل، بنتكتك لك الغبرة، وبتصير هاملت

Good .. هاملت Sorry جواد.

ثم يقوم بتشكيله كما العجين في مشهد بصري..

الأول: يشعر بارتياح

فجأة الثاني: يخرج كالعنقاء.

الثاني: الشيخ عطية (سكتة) والشيخ إبراهيم كانوا صحبة ع العظم .. وين في فرح

وين في عزا، يروحوا عليه سوا، يقعدوا على سدر المفتول، ينسفوه نفس..

(عطية) انت متأكد يا شيخ إبراهيم انه هادا اليوم الثالث؟ دير بالك تقعدش تحط

اللحمت قدامك .. أنا صح بشوفش .. بس بشم اللحمة لما تتحرك (يضحك).

(إبراهيم): عارف يا شيخ عطية، الولد حسن كبر، وشاطر كثير في المدرسة،

نفسى أشوفه دكتور، صار ايدي ورجلي، عيني اللي بشوف فيها .. مية مرة أقولك

اتجوز .. كان جبت لك بنت جوزناها لها الولد وصرنا نسايب.

(عطية): طلع ع المنطار مع أصحابه، ومن أول مرة، طخّوه يسلم خاطرک يا

شيخ إبراهيم.

فعدت في العزا، مديت ايدي ع اللحمة، ما اقدرتش أحطها في تمي، ومن يومها

صرت أكره اللحمة وأكره العزا، وأكره العمى.

(صمت) (سكتة) .

الأول: بقولك هاملت .. بتقولي الشيخ عطية.

بقولك مسرح .. بتقولي لحمة ورز

انتو راح تضلکوا .. تحت .. تحت .. تحت (ويشير إلى أدنى).

الثاني: (يركع) :ما أحلاه تحت ياه أنا بموت في تحت.

الأول: راح تضلخوا طول عمركو هيك, يفكر قليلاً, طيب طيب( ثم يأخذه بعيداً), تخيل حالك في برودواي .. وحدة بتزبطك مواعيدك .. وحدة بتمكيحك, وحدة بتلبسك .. كل البنات بتمنوا منك كلمة .. وبتهيل عليك المؤتمرات والعروض .. وبتتسلط عليك الأضواء.

الثاني: ياااااه .. أضواء .. لمبة كاز .. وإحنا ولاد صغار حوالين الكانون, أخذودنا حمرا حمرا بدها تطق من الدفا, وريحة الخبز مفحفة .. كنت أشوف خيال أختي ع الحيط أميرة, زي اللي طالعة من حكايات ستي, انت إلك ست؟

الأول: (محاوياً تغيير الموضوع) انتو بتعرفوش اشي, لا بتفهموا بمسرح, ولا بتعرفوا توكلوا, ولا تشربوا, ولا بتعرفوا تحكو, ولا بتعرفوا تناموا .. أبصر كمان بتعرفوا تبوسوا .. انت عمرك بوست وحدة؟

الثاني: مرة شفت نجاح, بنت جيراننا, عند بياع الفلافل .. وأنا لما كنت أشوفها, بتلخبط كياني, نجاح وجهها زي الجبنة, عينيها بلون الزعتر, خدودها تفاح, شفايفها كرز, طولها (يؤشر بيده) مشيتها زي الغزال, كانت توكل سندويش, قربت عليها, لما شافتني تكهربت .. السندويش وقع, لفته .. جريت .. (خمش).

هاذا بوس؟

الأول: يا بني آدم, بقولك بوس, بتقولي فلافل, افهم, فتح لي مخك, عمرك شفت روميو وجولييت؟

جولييت ع البلكون .. روميو يحاول يطلع إلهها, وجولييت واقفة زي الحلم, وصل إلهها, مسك ايدها, أطلع في عينيها, وقرب شفايفه .. وبتقولي فلافل.

الثاني :هامبورجر

(جبرش)

الأول :شيخ عطية، لمبة كاز، نجاح، مفتول، سماكين...

الثاني :هاملت، سينوغرافيا، جولبيت، ردفورد، برودواي .. ثم تتداخل الكلمات وتشترك معاً .. وتصبح غير مفهومة.

### صمت

الثاني:

1988/10/5 الساعة 5 العصر، المخيم كله طالع، كبار وصغار، وسيارات، تقول الدنيا ليل، ناس بتسد عين الشمس، إلها أول وما إلها آخر، وناس بتتسند على ناس، وصوت متل زن النحل، كله بيصيح وكله بيهتف، وصلنا المقبرة، شوية وألا الناس ملتمين، زرقت بينهم، ألقيتهم ملتمين على واحد، وجهه معفر، وحالته مبهدلة، واقع زي الشريطة، مغمى عليه، اخدوه ع المستشفى، وظلوا 3 أيام بين الحيا والموت، غايب عن الوعي، عارفه مين هادا اللي كان مرمي زي الشريطة؟ هادا كان انت . الشهيد كان زي عود الريحان، زينة شباب المخيم، طالع طلعة مش ابن عيشة، زي فلقة القمر، نسوان الحارة كانوا لما يحبلوا يتوحموا عليه، كنا كلنا بنحبه، مكلمش 16 سنة، حطيناهلقوبنا، قبل ما نحمله على أكتافنا، عارفه مين هو؟ متذكره مين؟ ليكون نسيته كمان؟ أقول لك مين هو؟

الأول:

خلص بيكفي، كنا ننام على فرشة وحدة، لما كانت الدنيا تشتي، وتصير ليل، والبرد يخش في عظامي، كان اصغر مني ويحطني بحضنه، أنام على دقات قلبه، لما كنت اشد اللحاف عنه، كان يقرفص، تقول ملاك نايم، كان مرات يديني مصروفه، ويقول لي خود يا خيوي، روح ع الرحلة، كان يتصيد العصافير ويطيها تاني يوم، يقول حرام أهلها بيكونواقلقائين عليها، كنت أعطيه الشنتة يروح لي إياها ع البيت، وأنا أروح العب مع أصحابي، شافني مرة وأنا بضحك لبنت الجيران، ضحك وقال لي،

## مسرحية غزة ع التكة

مش راح أقول لأبوي، أبوي كان شايفه مهندس، أمي كانت شايفاه دكتور، بنت عمي كانت بتحلم فيه عريس إلها، كل أولاد الحارة بيقلدوه في اللبس، كل أشي بييلق له، كان لما يمشي في الشارع يوزع فرح، الكل بيحبه، كنت رايح أنا وإياه زي كل يوم ع المدرسة، فجأة فط مني، فاع مع الأولاد، جريت أدور عليه، كان مقرفص وبردان، اجبالأسعاق واخده وراح زي الريح، وفي لحظة راح، ومن يومها وأنا حاسس حالي زي اليتيم، بس انت عارف مين السبب؟ اشكالكو هم السبب

الثاني :

أسامة انت بتفكر انك بتحبه أكثر مني، محمد، إبراهيم، عبد الكريم، حسن، أنا شايفهم كلهم أسامة، إذا كنت انت بتكشفه، أنا كنت أعطيهم، إذا أمك كانت شايفاه دكتور، أنا شفت العافية دبت في البلد، إذا أبوك شافه مهندس، أنا شفت البلد معمرة، وإذا بنت عمك شافته عريسها، أنا زفتهم هي الموسيقى اللي عايش عليها لليوم. وكنت شايف الصبح طالع من ضحكاتهم.  
ثم يبدأ بالرقص والزفة.

الأول:(يصفق)

الثاني :

صَفِّف، ليش ما قلت لي جود .. شفت المسيرة تبعنكو هاديك اليوم .. طلعا لك مسيرة انت كنت معهم.

الأول : ايش؟

الثاني:

تك .. تك .. تك .. قتلوا للولاد يبعدوا من هان..

تك .. تك .. تك بلغتوا الصحافة وجبتوا التلفزيون تك .. تك .. تك اتفقتوا مين بدوا

يلقي الخطبة .. بلاش نقعد نشد في بعض عيب .. تك .. تك .. تك

تك .. تك .. تك ديروا بالكو اتفقنا ما نقلطش البراميل الحمر، خلونا في السيف سايد.  
وعليهم أصوات جهورة.  
(يخشن صوته) (ويخرج صوت آه) رئيس شعبة .. (خشونة الصوت \_ أعلى) .. يزيد  
أكثر .. ثم يزيد أكثر .. ثم يزيد .. هادوله بشاركوش.

ثم يقف على الكرسي ويقرأ البيان:

بسم الله .. باسم أطفال الحجارة .. بقلوب وصدور مفتوحة سنحاربهم بما تيسر لنا  
من .. الهمزة المفتوحة والضمة المضمومة، والفاصلة وعلامة التعجب، ما  
تستخفوش بعلامة التعجب، والكسرة والسكون.

الثاني : خلعوهم قنبلة غاز . (ثم يضع ثوبه بأسنانه).

(مقلداً صوت الإسعاف) ووينو .. وينو .. وينو .. يذهب إلى الكرسي (صمت) اثنين  
شهدا (يرفع شاهدي اليدين) وعشرين جريح (ويكرر أصابع اليدين العشرة مرتين )  
(يرتاح الأول) من الولاد (يرتبك الأول), (صمت)  
ثم يعود الثاني للأول مبعبصاً بيده.

الأول : خلصت نشرة الأخبار تبعك؟

الثاني : عروسته في ليلة دخلتها، كانت أحلى البنات، والصبايا حواليتها، بزفوا فيها،  
شعر أسود طويل، وعيون واسعة، اطلع فيها، ضحكت له بخجل.

أخذ السيارة هو وصحابه وراح يجيب فستان الفرح .. دد .. دد... دد

أحمر

ولد ناصب فخ، الدودة على الكرز، عين من بعيد بتصوب عليه بوز بارودة 600  
متر بعيدة عنه .. طاخ

صوت كاميرا

تك .. تك .. فاطمة ماتت بتولد على الحاجز.

تك .. تك .. سمر انقتلت في حضن أمها.

صوت كاميرا (تك .. تك)

أحلام اختناق غازي

تك .. تك .. زياد، إياد، عمر فجروهم في السيارة.

تك .. تك .. خليل في القلب

تك .. تك .. محمد في العين

تك .. تك .. خالد في الحوض

تك .. تك .. علي، زينب، خديجة، موسى

وسحجن يا بنات، عيد بده كعكة.

الأول (يتقدم من الثاني) : اسمع ولا، في عندك إشي ثاني غير هالاسطوانة  
المشروخة..

احكيه .. معندكاش أنضب واسكت؟

الثاني : كان يصحى من الساعة 3 الصبح، ويرجع الساعة 7 المغرب، بعد أربع  
سنين صب السطح الأول، كان يصحى من الساعة 3 الصبح ويرجع الساعة 7  
المغرب، بعد أربع سنين ثانياً صب السطح الثاني .. ياالله يا أبو لعيال شد حيلك، من  
الثلاثة الصبح يرجع الساعة تسعة المغرب، ياالله يا أبو محمد عشان الولاد معلش بطلنا

نعرفك، من الساعة ثلاثة الصبح لتسعة المغرب، وصب السطح الثالث .. صار وجهه غير شكل، وظهره انحنى، ومن الثلاثة الصبح للسبعة المغرب، وصب الرابع ها ها

دديديديدي .. طبيخ (ثم يجلس على الأرض) واضعاً كفيه على الأرض، ثم يفتح يده ناصباً الوسطى .. خيمة 3م × متر ونص .. من مستر رد فورد صاحبك.

الأول : هادي البلد فش فيها فايذة، خلص .. خلص أنا لازم أسافر، أنا هلقيت لازم أسافر .. لا لازم أسافر.

الثاني : قوم .. سافر .. ما انت صار لك سنتين في البلد، ايش عملت؟ شاطر تدخن وتفكر .. حك في راسك .. كنت جاي تاخذ مدير عام وتروح؟

روح .. سافر .. إن شاء الله .. عن طريق المعبر وألا عن طريق اللد؟  
الأول : مش عن طريق اللد .. لأ عن طريق إسرائيل..

الثاني : يقترب من الأول ويحتضنه:

إحنا بنطفح الدم، عشان نجيب كل الفلسطينيين هان، وأنت بدك تسافر، عمرك سمعت واحد بيتصل بأمه من لبنان، يا أمه مشتاق الكو، نفسي أشم تراب البلد، كيف أصحابي كيف الحارة.

الأول : اجيت أعمل منكو بني آدمين، انتو مش عارفين قيمتي .. انتو بتحترموش حدا .. بتقدروش .. كل اشي عندكو فت عدس.

الثاني : بدك تسافر .. سافر .. ايش مستني إيش واقف بتساوي؟ روح..

بس ممكن أعرف حضرتك ايش كنت بتشتغل في أمريكا؟

الأول : أنا كنت بتشتغل في مط..

الثاني : مطعم .. أيوه اثنين هامبورجر وواحد شنيتسل .. صار لك من الصبح بنقول

سينو غرافيا، وتك إضاءة .. تك ديكور

ايوة يا حبيبي إجلي .. إجلي .. طلع اللي عندك كله

الأول : الشغل مش عيب، أنا كنت مضطر أشتغل في مطعم.

الثاني : طبعاً مش عيب، بس العيب انك تكذب علينا (هنا يلعب بأصابعه على

الأرض) (لا مبالاة).

الأول : صدقني أنا ما كذبتش، أنا فعلاً درست إخراج، ولفيت ودوخت وأنا بدور

على شغل، كانوا دايماً بيطلبوا مني الإقامة عشان أحصل عليها كان لازم أجوز،

اضطربت أجوز وحدة معها جنسية , أي كلام .. وقلت فرجت ودخت السبع دوخت لما

لقيت دور ثانوي في مسرحية.

الجالية العربية قومت الدنيا وما قعدتهاش قال المسرحية بتسيء إلنا..

قلنا بلاش المسرح من أصله اشتغلت شفير تكسي، صار كل واحد بطلع في كأنه

قرصاه حية، اشتغلت في سوبر ماركت كانوا بيتجنبوني ولما صارت الأحداث صارت

العيشة زي الزفت، كان لابد أنني أرجع .. ورجعت.

الثاني : انت جعان؟

الأول : يتطلع للثاني باستغراب.

الثاني : أنا جعان انت مش جعان

الأول يومئ برأسه

الثاني : أنا بعرف مطعم بعمل أحلى فلافل في البلد.

---

## الأعمال الكاملة: المسرحيات

الأول : في عندكو مطاعم.

الثاني : رجعنا؟

ثم يأخذه ويذهبان.

لمشاهدة المسرحية على يوتيوب

<https://www.youtube.com/watch?v=TW61FDeAOB8&t=624s>

<https://www.youtube.com/watch?v=eFHWTk99vIM>

آخ لو كانت ولد



## المشهد الأول

(يدخل حسن إلى البيت فرحاً يحمل بيده شهادته المدرسية)

ينادي: ياما.. ياما.. ياما

(تدخل أم حسن إلى المسرح وتشمر عن يديها كأنها كانت تجلي في المطبخ)

الأم : شو في يامه؟

حسن : نجحت يامه.

الأم : مبروك يامه ألف مبروك الله يفرح قلبك زي ما فرحتني

(وتطلق زغرودة)

الابن : بس عشان تعرفي ابنك.

الأم : الله يرفع راسك زي ما رفعت راسي، خليني أكيد العدا.

حسن : أبوي لسة ما روح من الشغل بدني أبشره.

الأم : أبوك لسة شوي وبيجي.

حسن : خليني أحكي معه على الجوال.

(ويقوم وينزع الجوال عن وسطه)

حسن : يابا مرحبا، أبو حسن، خذلك هال الخبر الحلو أنا نجحت يابا ..طيب بتجيب

معك الحلوان الهدية إللي وعدتني فيها..

(تغادر الأم المطبخ فيما الولد يتنطط، ويضع المسجلة على أغنية : وحياة قلبي

وأفراحه ويدندن مع الأغنية).

تدخل يارا : مرحبا حسون، يا سلام عليك شو مزوق أنت عرفت إني نجحت حاطط لي هالأغنية الحلوة.

حسن : شو يعني هادي الأغنية إلي أنا إللي نجحت.

يارا : أنا كمان نجحت وطلعتها الأولى.

حسن : وشو يعني ما أنت بتطلعي كل سنة الأولى، بس أنا نجحت هالمرّة من غير ما أقصّر ولا في مادة.

يارا : يا سلام عليك، لا والله شاطر، بسلامة الدروس الخصوصية.

حسن :بلا طولة لسان ها، هادا بدل ما تفرحيلي وتغنيلي كمان.

يارا : أغني لك؟ وبينها ماما..

**وتنادي: ماما..ماما.**

تحضر الأم : يارا شفتي يا حبيبي أخوك نجح في المدرسة.

يارا : وأنا كمان يا ماما نجحت وطلعت الأولى.

الأم : مبروك يا بنتي (بفتور أقل).

يارا : بابا بعدو ما رجع من الشغل، بدي أبشره.

الأم : أخوك بشره وحكى معه على الجوال وراح يجيب الحلوان.

يارا : وأنا يا ماما بدي أبشره.

الأم : لما يجي يا ماما ..لما يجي.

وتغادر إلى المطبخ.

يارا : حسن أعطيني جوالك، خليني أحكي مع بابا وأبشره أني طلعت الأولى.

حسن : تبشريه، ما أنا خلص حكيت معه .. وبعدين الجوال ما في كرت.

يارا : الله يخليك يا حسن.

حسن : خلص خلص مش ماما حكلك لما يجي بيعرف ..يارا ..يارا ..شو بدك تجيبي لي هدية في عيد ميلادي.

يارا : أنت شو بدك تجيب لي ..ما أنا عيد ميلادي قبل عيد ميلادك.

حسن : أنا أجيب لك ..آه أنت شو في نفسك؟

يارا : إلي بطلع منك.

حسن : إلي بطلع مني ! ولا شي (يضحك)

يارا : أنت تجيبي مسجل بسماعات على الدان زي إلي معك.

حسن : بعطيك إياها وأنا بجيب وحده إلي.

(يدخل الأب ومعه أشياء مغلقة، حسن يركض إليه)

يحضنه الأب ويقول : مبروك يا ابني، والله مبسوط فيك كثير، آه هيك بدني إياك، دائماً ناجح شد حيلك يا بطل.

يارا : وأنا يا بابا.

الأب : يارا ..آه وأنت شو صار معك؟

يارا : طلعت الأولى.

الأب : ممتاز كثير ..يعني زي كل سنة.

يارا : وأخذت تفوق.

الأب (في نفسه) : والله كان نفسي أنت تكوني حسن، وهو يكون يارا.

يارا : شو قلت يا بابا.

الأب : لا أبداً ولا أشي.

حسن : وين رحنو ..وين الحلوان يا بابا.

الأب : هيهنا قدامك يا الله افتحها وورينا يا بطل.

حسن : ياما ..ياما تعالي، أبويا إجا وجاب الحلوان معه.

(ويتناول المغلف ويفتحه)

(ثم يذهب لأبيه يعزم عليه، يتناول الأب حبة الشوكولاته ويأكلها وتدخل الأم، يعزم

عليها، تفعل الشيء ذاته، ثم إلى يارا ..ويضع المغلف جانباً).

(يارا تذهب وتتناول باكيت الحلوى وتعزم على الأب، يتناول قطعة ويضعها في

جيبه) ويقول : مبروك علينا يا أولاد والله فرحتونا (وتعزم على الأم وعلى حسن).

حسن : وهديتي يابا إلي وعدتني فيها، وينها.

الأب : وهادي شو هي ويشير إلى المغلف الأخ (يركض إليه حسن ويفتحه) ويقول:

حسن : يا سلام عليك يا أحلا أبو في الدنيا، البيانو إلي وصيتك عليه.

يارا : وأنا يابا.

الأب (بارتباك) : ليش ما خبرتوني انو يارا كمان طلعت الأولى، على العموم ولا

ترعلي، بكرة بجيبك الموسوعة العلمية اللي وعدتك فيها.

يارا : بس أنا يابا!!

يقاطعها :خلص قلتك بكرة ..يعني بكرة.

## المشهد الثاني

(يارا تجلس على جهاز الكمبيوتر وترتدي النظارات، تدخل عليها الأم) .

الأم : ايش يارا طول انهارك قاعدة على الجهاز يعني ما بدك تساعدني في شغل البيت.

يارا : والله ياما زهقت من قعدة البيت، حتى في العطلة ما في عطلة، كمان بدني أشتغل في البيت.

الأم : يعني وين بدنا نروح يا بنيتي؟ وبعدين ليش ما تساعدني في شغل البيت مش لازم تتعلمي.

يارا : أتعلم الطبخ والكنيس والغسيل ياما؟

الأم : آه، لازم يا بنيتي، مش مصيرك تتجوزي وتشتغلي في البيت؟ مين بكرة بدو يطبخك ويكنسك ويغسلك؟

يارا : ايش معنى حسن، طول نهاره بره، بطلع مع أصحابه، بيتمشوا، بيروح النت، وبيروح مع أبوه على قرايينا، وما بيخلوا مناسبة.

الأم : ما هو الولد زي أبوه والبنت زي أمها.

يارا : الولد مع أبوه لبره، والبنت زي أمها في البيت!!

الأم : هادا نصيبنا يا بنتي هيك تقسمت ياما.

يارا : بس الدنيا بتتطور ياما، والست اليوم بتشتغل زي الراجل.

الأم : لا ياما، الست ست والراجل راجل، الراجل بيشتغل وبيصرف على البيت  
والست بتطبخ وبتغسل وبتربي الأولاد.

يارا : والله هالعيشة بتزهق.

(يدخل حسن فرحاً ويسلم).

حسن : مرحبا، شو طبختي اليوم إلنا ياما، ما بدنا نتغذى ؟ أنا جعان.

الأم : استنى يا ولد لما يجي أبوك الغدا بيكون جاهز (وتخرج للمطبخ).

يارا : حسن ..حسن ..تعال قلّي وين كنت.

حسن : رحنت مع أصحابي لفينا شوي ..وبعدين رحنت عالنت.

يارا : نفسي والله مرة أجرب هالنت.

حسن : شو والله ناقص بس تصيري حسن صبي، وتيجي معي تفتحي التشنات

وتحكي مع الناس.

يارا : أنت بتحكي مع مين عالنت.

حسن : مع شباب وصبايا عرب وأجانب، وبنفتح على مواقع يا سلام يا يارا (يبدو

منشراحاً).

يارا : وأنا حقي ناقص يعني؟

حسن : آه ..حقك ناقص، ليش أنت ولد؟ ما أحلاك والله وأنت مصاحبة لي شباب، الله

يعلم من وين هما.

يارا : طيب اشمعنى أنت كل شي مسموح لك.

حسن : بدك تسكتي وتضبي لسانك، ولا بقول لأبويا لما يرجع.

يارا : شو بدك تقوله؟

حسن : بقوله بنتك بدها تروح ع الننت تصاحب شباب.

يارا : طيب ..خلص ..وايش عملت كمان.

حسن : قصدك في الدورة.

يارا : آه الدورة ..الله بيدي الحلق للي ماله ودان.

حسن : ايش قصدك؟

يارا : أبداً، هيك صار لك شهرين بتتعلم موسيقى ايش سويت؟

حسن : صرت أعرف أعزف وتعلمت أغنية جديدة.

يارا : صحيح؟ كان نفسي أتعلم في الدورة زيك.

حسن : نعم، علشان نعمل ثنائي يعني، فور إم ولاً فور كاتس.

يارا : طيب تعال، وريني شو تعلمت.

حسن : طيب بشرط.

يارا : شو هوي.

حسن : أنا بعزف وأنت بتغني.

يارا : موافقة.

(يبدأ حسن بالعزف على الأغنية ويارا ترافقه بالغناء).

### المشهد الثالث

(يظهر الأب جالساً يراجع بعض أوراقه، تدخل عليه الزوجة بفنجان القهوة، تضعه أمامه وتهم بالمغادرة).

الأب : استني يا أم حسن عايزك في شغلة.

الزوجة : شو في يا بو حسن.

الزوج : هي العطلة خلصت والأولاد على وجه فتحة مدارس، سنة زمان والبنت بتاخذ التوجيهي. والولد بعد سنتين زمان بيصير بدو يدخل على الجامعة.

الزوجة : صحيح، في ايش بتفكر؟

الزوج : البنت شاطرة كثير وأكد راح تاخذ مجموع كبير.

الزوجة : بتفكر توديها على الجامعة؟

الزوج : أنت ايش رأيك؟

الزوجة : يا أبو حسن مانت عارف البنت مسمية لابن عمها.

الزوج : آه ..شو يعني؟

الزوجة : بناخذ رأي دار أخوك.

الزوج : معك حق، يعني ممكن البنت تتجوز وتكمل تعليمها إذا بدو جوزها وأهله، وإذا ما بدهم يعني ايش لازمة الجامعة ما هي البنت مصيرها لدار زوجها.

الزوجة : والولد.

الزوج : حسن ..والله لو بدفع دم قلبي لعلمه أحسن تعليم.

الزوجة : وإذا ما بدو.

الزوج : شو .. ما بدو على كيفه يعني.

الزوجة : طيب شو رأيك ناخذ رأيهم.

الزوج : رأي مين؟

الزوجة : الولد والبننت.

الزوج : ما في مانع.

(يدخل حسن).

الأب : ابن حلال يابا، تعال.

حسن : طبعاً ما أنا ابنك كيف ما بدو أكون ابن حلال بالله.

الأب : بدو تشد حيلك، ضايك سنتين وبتخلص توجيهي وتشوف وين بدك تكمل

تعليمك.

حسن : انت شو رأيك يابا؟

الأب : هادي ما فيها رأي بدك تكمل الجامعة وتسافر برة.

حسن : وإذا ما جيت مجموع؟

الأب : بوديك على أوكرانيا تدرس طب ولا هندسة.

حسن : طب .. هندسة .. أنا بدو أسافر على أمريكا أدرس موسيقى.

الأب : ما في مانع المهم تجيب الشهادة .. أمريكا .. منيح كثير.

الزوجة : والبننت.

الزوج : ناديها.

الزوجة : يارا .. يارا .. تعالي ياما.

(تدخل البنت ويبدو أنها كانت تمشط شعرها)

الأب : والله كبرت بابا وصرت عروسة.

(تخجل البنت)

الزوجة : مش بعيد يجوا دار عمها ويطلبوها رسمي.

البنت : أنا بدي أكمل تعليمي بابا.

الأب : ما في مانع بس أنت تجيبي المجموع الكبير وبوديك على الإسلامية أو

الأزهر.

البنت : بس أنا بدي أدرس أوبرا.

الأب : أوبرا ..وين؟

البنت : في ايطاليا.

الأب : ايطاليا ..شو؟ انجيت يا بنت؟

البنت : أيش بابا ما أنا لسة سامعاكوا بدكو تودوا حسن لأمریکا يدرس موسيقى.

الأب : عال والله ..بدك تطلعي فنانة ..تغني ..يقولوا عنا عيلة نور ..تأدي يا بنت.

البنت : بس الأزهر والإسلامية ما فيها غير يا صحافة يا تجارة يا أدب عربي.

الأب : وفي كمبيوتر كمان ..على العموم ..ما بنقدر نوديك برة ..يا دوب نتحمل

نوديك الجامعة هان لازم تكوني قدام عنينا.

البنت : ما أنا بابا طول عمري بغني في المدرسة، وبشارك في كل المناسبات،

والكل بيحب صوتي وبيقول عنه حلو، ومحتاجة دروس على أصول.

الأب : الغناء.

البنت : شو فيها؟

الأب : ما في عادة، عمرك سمعتي بنت بتطلع تدرس برة من قرابيننا ولا جيراننا،

ولا أصحابنا ..وشو غناء كمان!!

الزوجة : خلص يا جماعة أستهدوا بالله, وخلصونا بلا ما نسبق الأمور, ليجي الصبي  
بنصلي ع النبي .

### المشهد الرابع

أبو حسن يدخل وينادي زوجته.

أم حسن ..يا أم حسن.

(تحضر على عجل) : ما تواخذني ثواني والأكل بيكون جاهز.

أبو حسن (يجلس) : لا تعالي هان بدي أحكي معك.

أم حسن : خير إن شالله شو في.

الزوج : اليوم حكى معي أخوي أبو خليل، وسألني عن يارا.

الزوجة : وايش قتلته؟

الزوج : ايش بدك أقول يعني ..البنت للولد ما في كلام.

الزوجة : مثل ما بدك.

الزوج : ماشي خليني أروح أبدل تيابي.

الزوجة : وأنا بكون خلصت، ثواني ويبيكون الغداء جاهز.

(يخرجان ويدخل حسن ويارا).

حسن : شو يارا؟ سمعت انه أبوي وعمي بيذكروا يقرأوا فاتحتك.

يارا : فاتحتي على مين؟

حسن : يعني مش عارفة على مين؟ ..ابن عمك خليل .آه خليل انت عاجبتيه وبننت

## الأعمال الكاملة: المسرحيات

عمه، بينزلك عن ظهر الفرس.

يارا : وانت ليش ما تتجوز بنت عمك سحر؟

حسن : سحر ما بتعجبني.

يارا : البنت بس لازم تعجب الشب علشان يتزوجها.

حسن : آه.

يارا : وهو لازم يعجبها كمان.

حسن : لا وأنا أبوي بيقول لو بدك بنت الملك لأجوزك إياها.

يارا : وأنا؟

حسن : انت لابن عمك إذا بدو إياك .. يارا .. سمعت انه إلك صاحبة حلوة كثير.

يارا : مين هند؟

حسن : حبييتي يارا .. عرفيني عليها.

يارا : أعرفك عليها؟ ليش؟

حسن : يمكن تعجبني وأقول لبابا يخطلي إياها.

يارا : أعرفك عليها، انت عندك استعداد تعرفني على أصحابك؟

حسن : إيش بتقولي، أعرفك على أصحابي.

يارا : يعني بفكر شوي على طريقتك.

حسن : ما تنسي ولا لحظة إنك بنت وأنا شاب.

يارا : هادا اللي مجنني، دائماً انت شاب وأنا بنت يا سيدي هادا أشي طبيعي، بس

اللي مش طبيعي انه انت مسمو حلك كل شيء، وأنا محرومة من كل شيء .. ليش يميزوا

بيني وبينك .. أنا وانت إخوة من أب واحد وأم واحدة متربين سواء، وعائشين سواء، وفي

عمر واحد تقريباً .

(يدخل الأب) : شو فيه يا أولاد، صوتكو طالع.

حسن : أبداً يابا بس كنت بأقول ليارا ..إنه.

الأب : إنه شو؟

حسن : إنه ..إنه ..ابن أخوك خليل..

الأب (متفائل) : آه ..انت على طول ما بتنبل في تمك فولة ..يا سيدي على العموم

اختصرت علي الطريق ..شوفي يارا ..زي ما انت عارفة يابا، من وانت صغيرة، وزي ما هي عادة الناس، انت مسمية لابن عمك، وعشان حق الناس علينا، ما نشرق ونغرب، ونقول جامعة ما جامعة، أنا لمحت لخوي أبو خليل وهو صرح لي إنهم بدهم إياك لخليل.

يارا : بس أنا يابا بدي أكمل تعليمي.

الأب : وماله، بنتناقش معهم في الموضوع ..ولا جوزك قصدي إلي بدو يصير جوزك مالو حق يحدد مستقبلك.

يارا : مستقبلي أنا بحدده يابا.

الأب : ماشي يا ستي بس ما بتحدديه لحالك.

يارا : بنتشاور معاك ومع أمي ومع أخوي حسن.

الأب : ومع خليل كمان.

يارا : ليش خليل؟

الأب : ما هو راح يصير زوجك ومسئول عنك.

يارا : لسة ما صار.

الأب : بس بدهم يتقدموا إليك رسمي.

يارا : ولما يتقدموا، أنا ما وافقت عليه.

الأب (ينتهي صبره) : شو يعني ما وافقت، يعني يمكن ما توافقي؟  
لا .....هادي بيني وبين أخوي أبو خليل ..إذا اتفقنا خلص ..إنا أعطيت كلمة  
خلص ..انت موافقة.

يارا : بس يابا..

الأب : ايش فيه يا بنت.

يارا : انت كيف تجوزت أمي.

الأب : شفتها, عجبنتي وصار النصيب, وتجوزتها .

يارا : وهي لما شافتك عجبنتها؟

الأب : عجبنتها؟ ايش قصدك؟ اسألها ..أنا اللي بعرفه إني خطبتها وأهلها وافقوا  
وصار النصيب.

يارا : بس يابا أنا ما عندي مشاعر تجاه ابن عمي.

الأب : مشاعر ..انت ايش بتقولي؟

يارا : ما بحبه.

يجن جنون الأب : مين قال انك لازم تحبيه ..والله لو فكرت تحبيه، حتى لو هو ابن  
عمك لحرمتك عليه .امشي من وجهي قبل ما ارتكب جريمة ..قال حب قال ..

(تذهب يارا، وتقول لنفسها، والله لو غصبتوني على عمل واحد ما بحبه لموت

حالي)

تسدل الستارة

أبو عرب في خانة إليك



إضاءة خفيفة على المسرح يظهر الديكور من خلالها شبه ظلال، نسمع موسيقى ألف ليلة وليلة، ثم يأتي صوت حكواتي، في هذه الأثناء يكون الممثل جالساً على خشبة المسرح.

الحكواتي:

وفي الليلة التاسعة والتسعين بعد المائة الثامنة سقطت غرناطة، الملقبة بشام الأندلس، ووقع المصاب الأكبر إذ قتل أبو عبد الله الأحمر وخير المسلمون بين القتل أو التنصير فكان تقتيل وتدمير، أما الأعراب وبعد طول غياب، صاروا يحجون إلى ناطحات السحاب، أما شهرزاد التي أسكتها بعد الفجيعة الصباح وحتى لا تتهم بحيازة السلاح فقد صمتت عن الكلام المباح.

آح. آح. آح.

"يضاء المسرح تدريجياً حيث يظهر الممثل وتتضح معالم الديكور"

أبو عرب في حالة إنهاء صلاة.

السلام عليكم ورحمة الله ... السلام عليكم ورحمة الله

"يبدأ بالدعاء"

يا رب افتحها في وجهنا كل الأبواب المسكرة.

طنيب عليك يارب ولا يعجز عليك طلب تفتلنا طريق أيرز يعني، مضلش ولا حد إلا أديننت منه.

يا رب تأخذ من طريقنا كل الحواجز والمحاسيم دمرها، فجرها، انسفها يا رب لا . لا . لا بلاش تنسفها بعدين يقولوا عمل إرهابي ويسكروها كمان أكم من شهر، أنا ايش الي دعوى في كل هالحكي، أصلاً أنا لازم أصلي ع السكيت، وأنت "يشير إلى المصلية" لازم أخبيكي بعدين تكون عمل إرهابي وأنا مش داري .

آه يا عمي هيك أضمن ابعد عن الشر وغنيلوا لحسن بعدين لما أرجع على الشغل  
معلمي يشوفني بصلي يفكرني حماس ولا جهاد واكل هوا . ويسحب الممغنط وحلني  
بعدين على ما ألقى شغل.

( يخاطب المصلية ): ايش رايك ارميك ( ويلقي بها ) وابطل اصلي بالمره, آه  
شيوعي, جبهة شعبية , وايام اليهود اتهموني اني فتح, وهيك بصير لحالي وحدة وطنية,  
خليني في حالي أحسن .

"يسمع صوت إشارة الأخبار"

"الأخبار" يتوجه إلى إطار التلفزيون يحمله ويضعه أمام وجهه.

إليكم هذا البيان الصادر عن لجنة الأمن والأمان:

بأمر من الناهي والأمر يستمر الإغلاق على جميع المعابر.

"ينزل إطار التلفزيون على الأرض ويسرح قليلاً"

اشتقت لصوتك يا أبو مروان .. اشتقت لصوتك .. صوتك .. صوتك.

"للجمهور" كان كل يوم يجيني من صرصير الصبح.

أبو العبد .. أبو العبد .. أبو العبد.

هش بكفي تجعر بتفكر حالك عبد الحليم يا خي .. صوتك زي صوت الجحش.  
صرت ألف مرة قايل لك تقعدش تجعر علي يا زلمة من الصبح, هيك بتصحي الجيران  
.. بصيروا يبهدلوا فيه لما أروح من الشغل.

ايش ذنبنا تصحينا معاك الساعة تنتين بالليل.

أغلبهم موظفين بيصحوا على الساعة ثمنية، أما صحيح واحد...

ايش بدك تعلم في المتبلم يصبح ناسي .

وفر واحنا نص نيمين وعلى ايرز وقبل ما نصل الحاجز بنشوف العجب وأحد بيقلي  
فلافل زي المكينة اتقول اتصم هيك يصحي من الساعة تنتين ويبدأ يقلي فلافل .. زلمة  
اختيار مسنود على حجر فش ولا شعرة سودة براسه بستنتي في معلمه الخواجة علشان

يجي يوخده يمكن يجيه على الساعة 8 .. 10 يمكن ميجيهوش.

بصات زيارة المساجين .جارتنا أم محمود عجوز تسعينية مع إنك يدوبك كملت  
الستين .. بتصيحي، صيحي ..ابنها محمود محكوم 3 تأبيدات صرلها عشر سنين  
بتروح اتزوره وبتصيح .. عمرکوا شفتوا حدا بيصحي من الساعة 3 الصبح يصيح.

ابنها الثاني اسمه أسامة كان أعز أصحابي وأحلى شباب المخيم .طلعوا يكتبوا  
شعارات على الحيطان طلعت عليهم قوات خاصة طخوا زميله خالد، فش الا شارع  
واحد قدامهم مفتوح .أسامة شرده أصحابه .. سد الشارع بصدرة .طلع اسلحه ونزل  
فيهم طخ.

فجأة لقينا السما كلها فوانيس .. الطخ زاد .. العسكر فزعت .. المخيم هب .الله أكبر  
..الله أكبر .. الله.....

الله يرحمك يا أسامة على قد ما كان شبابك حلو، كانت موتك أحلى.

أخوي فارس كان دائماً بيقول كل ما مات شهيد اتذكروا انه مات عشان الأرض  
ترجع ولما الأرض ترجع الشهداء كمان بيرجعوا وانت يا فارس بدكاش ترجع يا خوي،  
بدوش الله يطمني عليك في الأرض ولا في السماء، ميت ولا طيب أنت وين يا خوي  
وين يا فارس .وين يا خوي.

يا الله روح .. أنا يا خوجة ليش.

بقولك روح فش شغل .. يا خوجة حرام عليك الي صاحي من التنتين وراي ولاد  
بدي أربيهم.

إن ما روخت من هون راح أطوخك ..بين وبينكو مضلش في راسي مخ وبهداك  
الميزان وفي دين راسه طاخ طاخ طوخ . فشيت غلي فيه هادا اللي كان في راسي اني  
أعمله لو روحتي أنا ايش اللي دعوى ما في ميتين وخمسين مليون غيري، همه  
يضربوه..

اطلعت حواليه والا الكل صافف في الطابور زي المسطرة لا حس ولا خبر.

آلاف العمال روس بتروح يمين وروس بتروح شمال، يمين شمال، شمال يمين، الله  
وكيل ما اتقول إلا يوم الحشر.

رفعت حالي شوي شفت بلدنا .بلدنا .بلدنا .بلد زغيرة على الحدود بالزبط اسمها  
دمرة، شميت ريحة البابونج .اسمعت صوت العصافير جاي من بعيد اتذكرت كل كلمة  
حكتهامي.

البيير في نص البلد .على اليمين دار عكاشة على شمالهم دار أبو ركبة بين دار أبو  
ركبة ودار عكاشة في شارع صغير مسكر بجميزة معمرة مفش إلا فتحة صغيرة.  
كان لما سيدك يلحقني بدو يضربني .أزرق من الفتحة، يصير اينادي علي تعالي  
ولي .ها .. ولك تعالي ولي ..هقه..

مرة بعد ابوك ما خطبني بكم من يوم كنت رايحة املي مية من البيير فجأة طلع أبوك  
علي زي الفارس .كان لابس حطة مقصبة وقمباز أبيض ودماية بيج .أول مرة بأشوفه  
بعد ما خطبني .أنا وياه لحالنا في الحارة قرب علي .جيت بدني أقع في البيير من  
الخوف .الجرة وقعت من ايدي انكسرت جري علي مسك رجلي طلع منديله ولف  
رجلي .ايديه انتلن دم اطلع في عينيه .كتب بالدم على حجار البيير .زينب وعبد الكريم،  
ثاني يوم وأنا قاعدة بألقط ملوخية ما استفتقت إلا سيدك هاجم علي بالعكاز .يابيه عليك يا  
عبد الصمد .عبد الكريم قاعد بكتب اسمك على البيير وناقش اسمك عالجميزة،  
"يضربها" .

يا به أنا ايش إلي دعوى هو اللي بكتب اسمي، ايش الك دعوى لولاك مورجياه عين  
كان بكتب اسمك.

وتاني يوم سيدك جوزنا علشان يلم الفضيحة، ومنها لليوم قصة النقش اطورت مع  
أبوك لحد ما صار يشتغل نقاش .بس بعد ما اتجوزته بكم من سنة ايدي تنكسر ما يقول  
اعصبلها اياها ولا أوديتها على لسترلي أه طول عمره منشف ريقني وعقله جص.

امي يا جماعة الخير مرة بسيطة وعل نياتها .هذه القصة حقيقة مش تمثيل .أنا ساكن

في غرفة 3 متر x 3.5 هي نفس الغرفة اللي ربيت فيها أنا واخوي فارس واتجوزت فيها وخلفت فيها .أنا عندي دش .عندي دش, حصتي من الغرفة نص متر كل يوم بفرشلي فيه فرشاة وبنام وبصير أتقلب يمينا شمال، شمال يمينا .من حقي أتقلب مهو نص متر .الصباح لما أقوم من النوم أولادي الستة بناموا حوليه .اللي بالأقي وجهه وارم .واللي عينه زرقة . منا طول الليل أتقلب .كل يوم امي بتيجي تسهر عندي .أمي حبتها قليلة من فوق نص متر ومن تحت مترين وعشان تتريح في القعدة بتركز ظهرها على الحيط.

ولك بس ولا سيب أخوك.

يمه رجعي راسك بدي أنفرج على التلفزيون.

آيه ولك بس ولا موته ولك دشره يا بيه عليكوا يا ولاد اليوم اقلوبكو ميتة.

يمه رجعي راسك مش شايف بدي انفرج على التلفزيون.

الحاصله كانت فايعة قصة النكبة .حطيت على مصر المذيع قال النكبة الخمسين، أبو ظبي النكبة الخمسين، الجزيرة النكبة الخمسين، فجأة امي دارت راسها .ايش يا بنيه يعني النكبة الخمسين شيفهم شهر ملهمش شغلة ولا عمله غير النكبة الخمسين.

ايش يا امه مش عارفة ايش النكبة الخمسين هذه ذكرى لمهاجرة صرلنا خمسين سنة مهجرين من لبلاد يا امه.

ايش يا امه خمسين سنة مهجرين من البلاد .آه يا يمه يا وردني عليكي وعلى اللي جراك يا زينب.

يامه احنا وياهم والزمن طويل لو بعد مليون سنة بلادنا راح ترجع.

الله يقطعك ويقطع لبلاد يمه.

ايش يا امه يقطع لبلاد على ايش الك من الصباح بتصيحي.

لما هاجرنا من لبلاد كان عمري 20 و 50 يعني صاير عمري 70 سنة يا ابن

الكلب.

ولما قامت شوفت قدامي عجوز عمرها مش 70 ، 100 سنة.

من كثر امي ما تحكي عن لبلاد يوم قبل الانتفاضة جبت سيارة وخذتها على البلد  
يمه هادي مش دمرة.

يمه هادي دمرة هيا بلدنا.

أهي بتفكرني عجزت وخرفنت هادي مش بلدنا، يا سواق يابنيه يا سواق هادي دمره يا  
بنيه . بلدنا جنب بيت حانون "تنظر" مزبوط هادي بلدنا بس وين بيوتنا وين حكورتنا وين  
زتوناتنا .وين الصبر اللي كانت الصبرة هلقد .وين الجامع وين الجامع يا بنيه .واحنا  
صغار كنا نتجمع أولاد وبنات عند الجامع ولما الدنيا تشتي نصير نغني يا مطرة رخي  
رخي على قرعة بنت اختي .يا رب تمطر يا رب خلي العجايز تنضب . "ترتمي وهي  
تبكي على الأرض ترى البير".

هي البير يا بني هي البير أبوك كتب اسمه هان . "تشاهد الجميزة" الجميزة أبوك كتب  
اسمي على الجميزة وين اسمي يمكن نظري خف.

لأ يامه يمكن الجميزة طولت .استني أشوف "يصعد" يا امه هي اسمك هيوه زينب  
وعبد الكريم اسمك في البلد يا امه.انت في البلد.

وبعدين في هالدويخة بعدين طول عمرنا واحنا ديخين من هجرة لهجرة ومن مصيبة  
لمصيبة، هو واحد غلبان زي قادر يستوعب اشي علي الطلاق بالثلاثة من أم العبد  
أقول العالم ما اله شغلة وعملة غير احنا.

يوم بأسأل أبوي يا ابه عمرك شفت يوم تبكي عليه يعني افرحتك يوم زي الناس،  
والله يابني بتذكرش.

طيب سيدي، يعني أبوك شافله يوم زي الناس، سيدك لأ طول عمره في الشقاء  
والتعب ولو انبسط كان قلي.

صحيح الحياة كانت صعبة كلها شقاء وتعب من الحصيدة لتلبيش الحب بس كنا مريحين بالننا وعيشين زينا زي بقية الناس "يعطس" روح نام يا حج ريح راسك.

"يخرج علبة دخان تايم اسرائيلية وينظر إليها ويضحك" تايم ... أي نعم تايم ما هم خشوا ف الهوا الله بنتنفسوا واحنا كمان خشينا في عيهم، أبو مروان صاحب تاع أبو العبد لما راح يزور ابنه بره اللي إله عشر سنين مشفوش في المطار مسكوا معاه علبة تايم شرشحوه شرشحة، بهدلوه بهدله، اخبط ارقع، قالوا له هذا تطبيع، بتطبيع، خليه الله لا يرده، ومن بعديها بطل التدخين، بس وين أنا لما سافرت علشان أدور على أخوي فارس مهوا اللي قال لي انه في سوريا واللي قال لي في لبنان واللي هان واللي هان من حد ما وصلت المطار.

فلسطيني خش فلسطيني خش فلسطيني ... خش

أنا خشيت أول واحد واطلعت آخر واحد ويا حرام هالأجانب مرميين الهم ثلاث تيام بالمطار وشنطهم مرمية وأولادهم لصغار حوليهم بيصيحوا، واحنا فلسطيني خش ولما يشوفوا أمريكياني اقعده ثلاث تيام قلبي انقطع على الأمريكيان أنا خشيت فيكو حدا بدوا يخش اللي بدو يخش يخش أنا خشيت .

"صوت إشارة الأخبار"

الأخبار "يقف خلف إطار التلفزيون غاضباً".

مسكرة بدهمش يفتحوها ايش اسويلكوا يعني وخصوصاً أنت يا ابو عرب اضلكاش تبعت مرتك لمرتي واتقولها جوزك بفهم في السياسة وقتيش بدها تفتح انا ايش عرفني أنا خلقة موظف بيقلوا لي اقرأ هالورقة بقرأها بس ولا بلاش اتضلك تلعب في التلفزيون حسديني عالراتب وحية الله ما هو مكفيني قربطات وبدل ايش بدكوا أقرأها حاضر.

وتداولت وكالات الأنباء أخبار الجهود التي ذهبت هباء حيث عادت جميع الوفود بدون أي وعود وبذلك تظل الأزمة قائمة والمواضيع على الموائد المستديرة قائمة.

ما انتوا فولتوا علينا من أولها أزمة، أزمة :أي هوة اللي عندوا أزمة بيطيب ما جارنا لختيار عنده أزمة طول انهاره يقحح وكل شوية بنقول عده فطس صرنا جايبين له مية بخاخة ومش قاطع فيه في الآخر ركب موتور ومن حد ما يشغلوا والبخار يطلع الجيران بلتموا حوالين الدار يقعدوا يشمشموا كل الناس نفسها ضيق.

وانتوا هيك عجلة السلام مبنشرة وكلكوا مش قادرين اتزقوها طب اعملولها بنشر ولا هية تيوبلس، طب افتحولنا طريق ايرز ولا هادي صعبة طب خبر واحد عن أخوي فارس خبر واحد عن فارس فش.

في يوم جمعة ليلة سبت قلقت معرفتش أنام قلت القلق دليل صحة نزلت اتمشى على الشط نقطة سودة جاية من بعيد، النقطة صارت اتقرب واتقرب قعدت على صخرة وصرت أراقب، وصلت الشط افلوكة مطاط نزلوا منها شوية شباب هجموا على المركز ..يهرب إلى البيت ... "يسمع صوت طرقات على الباب" مين جيش، يهود "ينظر حوله " كلكلو علي "يضربوه ثم يضعونه في السجن "يا خواجه ليش أنا هون "يضربه". يشاهد الحاكم العسكري، يا سيادة الحاكم لأيش جيتوني هان هادا أخوك فارس ... "يرفع الفرشة التي صارت عبارة عن شهيد" , "بيكي" ثم يتحسس خده يتحسس الشامة الموجودة على خده فيتذكر شامة أخيه فارس.

لأ أخوي فارس كان له شامة على خده الشمال كنت وأنا صغير أقوله ايش هادي يقولي هادي علشان امك تلقاني لما أضيع، وضاع فارس وما خلىنا مطرح إلا ودورنا عليه فيه، انت وين يا أخوي يا فارس، يوم ما رجعوا الغياب ما صدقتيش حالي كان زي الحلم هي صاحب زمان تعال في حضني يا حبيبي شفت أخوي فارس "لا أجابه"، هي صاحب أبوي اللي حكى لي عنه اسمعت أخبار عن فارس "لا إجابة"، فارس، فارس؟ ...قالوا لي انه في واحد بيعرفه، ضليت أسأل عليه لما اندليت، ساكن على الدور

العاشر.

اطلعوا .. وين نطلع .. كيف حالكو ... ملاح، شفت فارس ... فارس مين، فارس أخوي .. لا والله يا عمي ما شفتوا .. طيب انت ناقصك اشني .. والله ما نقصني غير انتو.

كنت مندر لله يوم ما يطلعوا اليهود من بلادنا لو من شبر واحد منها، لأرقص في نص البلد، وطلعوا اليهود ورقصت رقصت رقصت وكان نفسي ارقص في جنين ونابلس وطولكرم وبس باستنى في الممر الأمن.

يا رب اتحقق لي ها الندر وارقص في نص القدس، القدس يا رب وانزل على ركبي والناس اتزقولي "ينزل على ركبتيه" اللي بزقش مش وطني، يعني لازم لما تسمعوا كلمة القدس تزقفوا إذا ما زقفتوش للقدس وللخطابات لأيش بدكوا تزقفوا.

إخواني أيها الأخوة الرفاق، أيتها الأخوات الرفيقات إن البرقمانية تندفع من الديكتاتورية وتستمد ايحاءاتها من البرولوتورية إن البرولوتورية يا إخواني إن البلح البلح البلاء إخواني إن التكنكرات التكنكرات والسلام عليكم ورحمة الله وبركاته هو هيك لبلاد ابترجع.

يا رب اتحقق لي هاالندر يا رب وارقص في نص القدس ليش لأ هو احنا قصرنا في اشني ثورة واعملنا وانتفاضة وصارت كيف ما لفت وكيف ما دارت بدنا نعيش أوادم ومحترمين بالحرب بالسلم بالف بالدوران بدها تعدي واللي عاجبوا عاجبوا واللي مش عاجبوا" الجمهور" يشرب من بحر غزة، هو انتوا اللي قلتوا مش أنا بعدين ايش ناقصنا يعني معارضة عندنا بعترض بعترض بأعترض، أحزاب القارمات املية البلد حزب ال تلت تلتيني حركة ال لا لا لايطي جبهة ال الجبهة .. حركة .. أحزاب دابة البلد، والشعب يعني الشعب امكتر غلبته ومش عاجبه العجب قال بدهم قانون خدمة مدنية قال ايش يعني لما الراتب يخلص في 10 ولا في 8 الشهر نزل من السما حجر لازم يعني يخلص في 30معروفة الراتب بخلص في 3 الشهر 500 ش للدكنجي و 400ش كهرباء ومية تلفون

وغاز 100 ش كيس طحين، آه أول امبارح اشتريت كيس اطحين جريتوا على الدار زي الأسد سنداتوا على الحيط هيك بعد يومين خشيت المطبخ بطل على الكيس وانو عامل هيك، مجلس تشريعي عندنا يوم الانتخابات صلبت حالي بيحي أربع ساعات عالطابور معلوم لازم اصلب حالي أول مرة بيصير عندنا سلطة وطنية وبانتخب طول عمري وأنا بأشوفهم في التلفزيون وهمة بحتوا المكتوب في الصندوق قضيت عمري وأنا نفسي أحتوا .. في الصندوق خفت بعدين ما احطوش .. في الصندوق يطلع في عين ابني صندوق وأصير الف فيه على الدكاترة وبدل ما يقيموله الصندوق يرفعوا له اللوز واورط المهم أوصلت الصندوق حطيته .. حطيته في الصندوق من هان والدنيا صارت اتلف في من هان ضليت يومين في الفراش صابنتي انفلونزا حادة وصرت ارتك رتك وما صحيت إلا على بشارة الدكتور لما نجح في الانتخابات معلوم لازم ينجح ما أنا وقفنلوا في الباع والدرع الصحيح مش أنا لحالي اوقفنلوا كل اهل المخيم وقفوا معاه ومن يومها مخلصتش من المختار.

قال صحيح يا أبو عرب بدكوا اتصوتوا لابن أبو أصبع، وماله يا مختار الزلمة دكتور فهمان احنا بننسى امبارح ابننسى انو كان فاتح عيادته لولادنا في الانتفاضة، ماشي الناس آخر زمن بتسيت اكبارها وبتدور على صغارها خلي ابن أبو أصبع ينفحك، مع السلامة يا مختار إذا هو بأصبع أنت بظهر .

يوم الانتخابات كان بالنسبة إلى زي العيد ما انا طول عمري غلباوي وحامل الدنيا على كتافي كنت زي اللي مجوز ابني البكر صرت ألف على زلامنا لمبينة واللي فيها الخير، يا أستاذ فتحي رشح حالك، أنا ضد اوسلو، طيب.

يا أبو حازم انزل الانتخابات انت زلمة محترم وكلنا عايزينك بزبطش هيك مفش عندنا قرار بالمشاركة، والنتيجة شو النتيجة شو "يبدأ بالرقص".

والنتيجة شو هربت خطيفة مع سعد الفران هربت خطيفة مع سعد الفران وجوزوا لطيفة لأبو ريالة لهان "يستمر بالرقص والدوران" هربت خطيفة مع سعد الفران وجوزوا لطيفة.

يا حسرتي على اللي ماتوا الله يرحمك يا أسامة ويرحم كل الشهدا كانوا قناديل  
بتضوي بليل فلسطين كل ما اشتدت الظلمة بيزغرد رصاص وبيضوي شهيد ليلينا.

كنا عايشين على أمل تطلع الشمس ع زنودهم وكل ما طال العذاب بنضوي شموع  
بعدهم وبنزف توالي العرسان والصبايا "تسمع موسيقى سبل عيونه يبدأ بالرقص  
البطيء على ضوء الشموع" الله يرحمك يا أسامة كنت تتمنى تعيش وتشوف بلادنا  
محررة شايف هينا تحررنا هينا في غزة ونابلس وجنين وطولكرم والخليل وانشاء الله  
القدس على الأبواب حيلك حيلك، حيلك انت مصدق كل هالحكي.

اسمع لما افلك أنا كل ما مسكت طرف خيط بنتط لي انت مين مفكر حالك، أه مين  
مفكر حالك.

يا زلمة هادا أنا أبو العبد وألا أنا غلطان، أنو أبو العبد فيهم ما فيه مية أبو العبد في  
البلد، أبو العبد حسن أبو العبد الفران، أبو العبد الهادي انو واحد.

الله يساهل عليك يا فارس كان أكره ما عليه كلمة عبد، هو اللي سماني أبو عرب،  
"يسمع صوت زفة"، والله وصرنا نعمل زفات و أعراس يا عم، الله يخلف على أوسلو  
ويخلي لنا السلطة زمان كنا بنجوزهم على السكيت زي الأرامل والعزبات بس اليوم ..  
"ينظر من الشباك إلى الزفة".

هه هادي هية آخريتها يا أبو ريالة بنتجوز على لطيفة هادي آخرة صبرها عليك  
بتطسها بالضرة بس ايش بدي أقول على رأي المثل ذنب الكلب عمره ما ينعدل، وايش  
هالولدّه اللي حواليك اشي قصة الأسد واشي قصة المارينز وايشي هيببيز هادي هية  
زلامك يا أبو ريالة، أه صحيح ما انت طول عمرك تاع ازملة ... كنا بنموت في  
الانتفاضة وانت هناك بتقش مصاري يوم ما سافر، يا شباب أنا مسافر بانصحكوا  
تحطوا في دان طين وفي الثانية عجيين.

هب والا انت في العلالى ولما ارجعت أجبت تبني لنا براج قال يعني الوضع تمام  
التمام وأولاد المدارس بيتعلموا فترتين وثلاثة وكل سنتين ولد في صف ومش ناقص

علينا غير الأبراج طب اتبرعلك في بناء صف لمدرسة, يوم ما رجع رحت اسلم عليه يدوب حط طراطيف اصابعه في ايديه وبعد ما قاسني من فوقي لتحتي, انت لسة ضايل بتكتب شعر؟ لا يا أبو ريالة بطلته من زمان, ساق الله على أيام الشعر, كنت أقعد لحالي بهالغرفة افتح الشباك واسكر الباب واطفي النور اطلع من الشباك اشوف القمر وحوليه النجوم بتوتس وحدته اتذكر حبيبة القلب لطيفة واكتب أحلى شعر نجوم السما تضوي على الورق وأشوف الكلام أحلى من العسل أسرح في السما أشوف صورة أخوي فارس مطبوعة على وجه الغيم أحلم ببلادنا وبلطيفة.

بتتذكري لما كنت أبيع كتب وكروت معايدة للحبيبة وأضل أمشي وراك على السكيت لحد أهلك ما بطلوكي وقالوا البنات استوت هادا أنا كاين أحبك وانت عجرة وضليت مربوظلك على باب الدار وبس أشوفك اطلعت أمشي وراك وهي خصلة شعرك اتطير وقلبي يطير وراها وضلينا هيك نظرة لنظرة وضحكة لضحكة وعالسكيت لحد ما اجا الصيف وشرف أبو ريالة اللي زغول عينين أبوكي بالدولارات وراحت لطيفة وراح معاها الشعر والحلم صار كوابيس, كوابيس, كوابيس.

أنا مين، أنا مين باعترضش باعترض ايش سبع سنين في الانتفاضة واحنا بنتكسر على التلفزيونات مين عمل لنا اشي, طيب أنا مع السلام ... آه مع السلام، مهمة أخوات الشلن مش امصلين على النبي وكل يوم بطلعوا لنا بموال شكل مرة طرق التناقفية ومرة استيطان طيب أنا ايش اللي بدى اياه ... أنا مين أنا ليش .. ايش فيه هه يمكن يجي كلام الخواجة اللي كنت اشتغل عنده لما قالي راح يجيك يوم يا خبيبي ما تعرف راسك من اجررك ... "ينظر إلى قدميه" فشرت يا عرص بناكلها خبزة وملحة وما بنخ، مش مهم دم أبوي مخلوط برمل البلد واسم امي لسة على الجميزة وان راحت الجميزة بضل محفور بقلوبنا وعقولنا وعمرنا ما بننسى دمرة والمجدل وسدود وتل الترمس .. ايش اتفاقيات معاهدات على عيني وراسي الاتفاقيات احنا طول عمرنا بنتلزم بكلامنا وبنحترم كلمتنا بس عاد انتوا ... انتوا اللي الواحد ما هو عارف يمسكوا من وين، أي

من عناد راسكوا أمريكا صارت تكرهكوا ... صاروا يحبونا بدي اقص ايدي من هان إذا مش انتو وراء قصة كلنتون آه قال لفنسكي باقية وكلنتون الثاني كاين .. عيب عيب كلنتون بعملش ها الحكي بس لفنسكي تاعت القيل والقلنا كلنتون البسة بتاكل عشا مسكين بعد العملة اياها مش عارف يطلع يمشي في الشارع زي المخزي صار، حتى لشيوخ شيوخ البيت الأبيض ولا واحد راضي يخش عليه المكتب لحاله بخشوا عليه اثنين اثنين .. قبل أكم من يوم في واحد خش عليه لحاله علشان يمضي أوراقه ولما طلع هيك كان وجهه أحمر ومطمّل راسه في الأرض ايش فيه الله اعلم والتموا حواليه الشيوخ يا شيخ مالك ايش فيه أبدأ ساعة يحكوا معاه مش راضي يحكي ايش فيه بعرفش، يعيش كلنتون تسقط لفنسكي تعت القال والقلنا.

ليدز أند جنتل مان فلسطين سلام ازرائلي شلوم بيس بيس وإذا شاف واحدة حلوة قاعدة قدامه بيس بيس "يعمز عينيه" قال الرملة خشت في عينه بس وبين احنا صاحيين له من يوم العملة لليوم ولا حرمة من عندنا تصل أمريكا كله زلام، أقل واحد طوله مترين .. ومسلحين، وهناك الشاطر بشطارته كلنتون برحمش أبوه يعيش كلنتون يعيش، يعيش، يعيش سلام، سلام، أي سلامة تسلمك يا كلنتون سلامة تسلمك وسلامتك من الآه سلامتك من الآه ... وسلم على سلم على لما قابلني وسلم عليه ولدي يا ولدي سالم على، وسلامي لكم سلامي لكم يا أهل الأرض المتنازع عليها .. المتنازع عليها.

آخ من ها الحدوتة آخ من ها الحدوتة كر وفر فر وكر وصبح وليل وليل وصبح وحرب وسلم وسلم وحرب وحرب ولطيفة لسة مجوزة وأنا بحلم بالمستحيل وأمي بتحلم بالبلد وأبوي بحلم بالحل محنا طول عمرنا واحنا بنحلم ايش صار يعني نزل من السما حجر ولا تعدينا على أحلام الناس صار لازم نسلم طيب ليش بطلنا حرب عشان ملناش حيلة فيهم بيجي يوم وبتغيروا الأحوال قال يعني احنا كنا نحارب مش همه إلا كانوا كل عشر سنين بيحتلوا منا بلاد قتلوا المرحلة تكتيك سياسي فوضنا أمرنا لالله لكن أنقول يافا للشكناز لا الناصرة للحرديم يفتح الله مغتصبوش فلسطين الله ما قال هيك اغتصبوا

فلسطين والسلام عا الله يكون ختام على الله يكون ختام

"صوت الحكواتي".

وفي الليلة التاسعة والتسعين بعد المئة التاسعة اجتمع أهل الحكمة والبراهين ونظراً لأنكم اثبتتم أنكم مؤدبون, فقد خرجوا لكم بهذا القرار المبين, يسمح واعتباراً من الآن للعمال والعاملين بالذهاب إلى أماكن أعمالهم على أن تكون أعمارهم فوق الأربعين.

فارس أنا رايح والله ما أنا عارف مين فينا اللي ضايح يمكن أنا ... أنا تعبت .. بطلت اصدق أي ايشي لقمة العيش يا خوي مرة .. والله ما اللي عين تشوفهم هوة أنا اشتقت لصياحهم نفسي أشغل في الزبل هان بس .. أنت يا خوي خليك .. خليك في حلمي ووجداني الأمل اللي عايش علشاناه وأنا راح أضل أحلم وأحلم و أحلم.

قبل سنة ونص عرضنا مسرحية كانت تشبه المسرحية هادي بالنهاية وكانت النهاية أنه العامل اللي بيشتغل في إسرائيل بقرر أنه يمزع التصريح ويضل قاعد في البلد ... بعد العرض كنا عازمين مجموعة من الأدباء والمتقفين قالوا كيف بتقعدوه في البلد, هادا كان لازم يشتغل في إسرائيل أنت عارف أكم عامل عندهم 100 ألف عامل هادا حل رومانسي ... في المسرحية هادي عملنا عرض تجريبي وكان خيارنا أنو أبو عرب يرجع على شغله, فبعد العرض قالوا كيف بترجعوه على شغله هادا كان لازم يضل قاعد هان.

بعديها قعدت أنا والمخرج يومين انفكر انسرحه ولا انقعه في الآخر قلنا من عند وأنا راح أضل أحلم بحكي لكو القصة وانتو احرار اللي بدوا يقعه يقعه واللي بده يسرحه يسرحه بس على مسؤوليته احنا ملناش دعوة والمسرحية خلصت والسلام عليكم.

مسرحية أبو عرب في خانة اليك

---

لمشاهدة المسرحية على يوتيوب

<https://www.youtube.com/watch?v=SjBfsgspXQo>

<https://www.youtube.com/watch?v=Fn12QmCLcfY&t=10s>

# السيد المدير العام

كومديا اجتماعية

في فصلين

## الشخصيات:

- جمعة: مدير عام كان مراسلاً  
أبو ماضي: المدير العام السابق  
سوزان: سكرتيرة  
أبو إسماعيل: مدير إدارة  
أبو عدنان: مدير تخطيط  
حاتم: مدير علاقات عامة، عريف حفل  
خالد: مترجم  
نادية: مديرة شؤون المرأة  
أبو زياد: عضو المجلس الأعلى  
حامد: مراسل  
عادل: صحفي  
فدوى: موظفة شابة  
بهيجة: زوجة جمعة  
موظف: مدير المشروعات  
مندوب البنك

## الفصل الأول

(تفتح الستارة على مكتب المدير العام مجهزا بأحدث وسائل الاتصال الحديثة :  
تيلفون، فاكس، انترنت، دش، مكتب فاخر مع حرف T , كنب، سجاد، تحف،  
ووضع على المكتب لوحة كتب عليها "المدير العام" مع رفع الستارة، يبدو  
الغبار بفعل قيام المراسل بتنفيذ المكتب وهو يحمل أداة التنفيذ)

المراسل : والله تقول إن حضرة المدير العام صار له سنة غايب عن المؤسسة مش  
كلهم يومين بالعدد أخ ايش هالغبرة كيف لو إني بنفضهاش كل يوم.. آه يا عمي هادي  
الغبرة من كثرة الشغل

(يواصل التنفيذ والترتيب يزيل الأواني والأدوات، يرفع الشرف من على  
الطاولة، ثم ينفذ، ويقوم بإعادة ترتيب الأدوات الموضوعة على الطاولة، يتأملها، ثم  
يرفع سيجاراً ويشمه ثم يبدأ في تنفيذه وهو غير مشتغل)

المراسل : عز يابا بس لناس وناس،(ثم يدور حول الكرسي)، وبعدين في هالغبرة آه  
يا عمي مانت طول اليوم وفود طالعة وفود نازلة، مش ملحق تستقبل شخصيات  
ومسؤولين، إشي عرب وإشي اجانب، والموظفين طول نهارهم بشربووا شاي وقهوة  
وبتثاوبوا وبيحلموا حدا يزورهم وكل ما بزهبو يرجعوا بقروا جرايد، مساكين وكل  
شوية بيتطلعوا في الساعة، غلابة ويرجعوا يقروا جرايد لحد ما يطقوا من الزهق،  
وآخر الشهر يروحوا لمدير الادارة، بدهم ساعات اضافية، وبدل طبيعة عمل .

(يواصل الترتيب والحديث) الله وكيل .. أبو اسماعيل لا مخلي خبر عن مطلقه ولا  
معلقة .. ولا عن وفيات ولا تهاني، من شره، وأول ما بفتح على الكلمات المتقاطعة،  
ويلاقي الكلمة الضايعة، قال الكلمة الضايعة، ما أنا لو سألت أي ولد صغير في  
الشارع راح يعرفها!!

(يتأمل المكتب ويتحرك باتجاهه، ثم يدور حول الحرف T ويكمل حديثه ) أي علي

الحرام من راسي، أنه مديرنا العام أكثر مدير عام يعمل اجتماعات في الدنيا، وعلى هالاجتماعات اللي بيعملها، المفروض انه ما ضلت مشكله الا وانحلت، ياالله كله سداد ودين، وهيهم النشامى ببسدوا اياها مهمات، واليوم قال بيرجع، ان شالله رجعة سبع عاد ..

(يتوقف قليلاً تم يواصل) بس انا ماقهرني غير هالأجهزة الي حوالية ..

(يتطلع الى الأزرار) ويقول: مية زر وزر، اكبس وشبيك لبيك .. كيف بيعرفهم من بعض؟ ما هو بيضل يلعب عليهم باصابعه زي البربنط

(يقوم جمعة بتجربة الأزرار فيجيئه صوت مدير الإدارة عبر الانتركوم)

مدير الإدارة : نعم يا سيادة المدير العام ! صباح الخير مالك مبكر اليوم، الحمد الله على السلامة إحنا في الخدمة

المراسل : (يرتبك جمعة قليلاً، لا يدري ماذا يفعل، كلما همّ بالحديث يتردد، ثم يقوم بتقليد المدير العام)

قول للزفت الأستاذ جمعة، يجيب لي فنجان قهوة

مدير الإدارة : حاضر .. حاضر ..

(ثم يسمع صوت مدير الإدارة عالياً وممدوداً) : جمعة .. جمعة ..

(جمعة يخرج من غرفة المدير العام سريعاً يجيب على مدير الإدارة)

الإضاءة تنتقل إلى مكتب الموظفين

مدير الإدارة : يا بني آدم ست آلاف مرة صرت، قايل لك من حد ما يخش المدير

العام، بتلحقه بفنجان القهوة زي الريح .. ياالله طير

(جمعة يخرج غاضباً ويبرطم ببعض الألفاظ غير المفهومة ويسب مدير الإدارة في

سره ثم يذهب لغرفة المدير العام يضغط على نفس الأزرار التي ضغط عليها سابقاً

فيأتيه صوت مدير الإدارة)

مدير الإدارة: نعم يا أستاذ فنجان القهوة ما وصلش

جمعة (مقلداً صوت المدير العام): لأ وصل بس يا محترم (باستخفاف) مش حفي لساني، وأنا أقول أول ما اخش المؤسسة بدي أشوف الورد عالمكتب؟ ليش ما صرفنتش حق الورد تبع امبارح؟ أي هو احنا بنجيب الورد علشان نشمة؟ يا الله .. روح .. مع السلامة..

(ويغلق الخط كأنه يغلق في وجهه متعمداً، جمعة يجلس على مكتب المدير العام، يدور به يميناً وشمالاً يتأمل المكتب والكرسي والأجهزة يسحب سيجاراً، ويبدأ حالة التقمص، يرفع السماعه دون ان يفتح الخط)

جمعة: الو .. ابوة .. نعم .. احنا الصحيح (ويعدل جلسته) قايمين مهمتنا على اكمل وجه، بس الظروف صعبة، والميزانيات، يعني الحالة مش ولا بد .. المزبوط يعني الوضع كله ماكل هوا ها ها ها ..

(يضع السماعه ثم يفتح جهاز التلفزيون، يشاهد بشغف، ثم يغير المحطات تباعاً، يتوقف عند واحدة)

جمعة: يا سلام، ايش هالمحطة؟ والله الواحد بيقضي يومه يتسلى حتى كل ساعات الدوام ما بتكفي

(يقوم باشعال السيجار ثم يضغط على الانتركوم)

جمعة: وينه جمعة؟ كباية شاي زي هوا (ينتبه) ولا بلاش جمعه ابعت لي حامد

(يضع السماعه ثم يتابع جلوسه على المكتب)

(تنتقل الإضاءة إلى قاعة الموظفين، مدير العلاقات العامة "حاتم"، يكون عند مدير

الإدارة، يوقع على دوامه، بعد الإجازة ينتبه إلى أن المدير العام قد عاد فيبادر)

حاتم: المدير العام هان؟ خليني ادخل لعنده، أحطه في صورة المناسبات اللي لازم

يحضرها أو يشارك فيها عشان أجندة مواعيده

(تعود الكاميرا إلى جمعة، ما زال يتفرج على التلفزيون ينتقل بالرموت كمنترول من محطة إلى أخرى فيما يبدو الاندهاش على وجهه)

جمعة :هي هي .. له له .. ولعت .. علناً علناً يا عالم

(يصل حاتم فيقرع الباب)

جمعة : ادخل (من الداخل دون تفكير)

(حاتم يفتح الباب ويدخل فيجد جمعة يجلس على مكتب المدير العام وفي هيأته فيعتقد

بأنه صار المدير العام)

حاتم : ألف مبروك يا أستاذ، أنا والله من زمان كان قلبي حاسس انه في اشى غلط في المؤسسة والحمد لله تصحح اليوم .. والله هادي أحلى مفاجأة، أنا مكنتش متصور إنني اخش المكتب وألاقيه منور بحضرتك بس كيف هالمناسبة بتمر وما بنقوم بالواجب؟ لازم نعلن ونهني ونحتفل، إحنا في هادا اليوم إللي تصير فيه حضرتك مدير عام المؤسسة.

(تدخل السكرتيرة تحمل أوراقا، تسمع نهاية حديث حاتم ترى المشهد فتفاجأ وتقف

تراقب الوضع، ثم تتقدم من جمعه فيما يدخل المراسل حامد بكأس الشاي)

جمعة : يا أخ حاتم شكراً على هالاطراء، بس الموضوع..

حاتم (يقاطعه): لا شكر على واجب يا أستاذ، أنا كنت جاي عشان مواعيد الأسبوع،

ايش رأيك نخليها لوقت تاني شايف الوقت مش مناسب

جمعة:مزبوط .. خليها مرة ثانية

(يخرج حاتم وتتقدم السكرتيرة من جمعه)

السكرتيرة :ألف مبروك يا أستاذ (بأدب) إن شاء الله منها للأحسن منها، أنا الصحيح

جايبة بريد اليوم للأستاذ (ثم تتدارك) قصدي لحضرتك..

جمعة :بلا حضرتك بلا أستاذ تعالي جنبي هان، قولي لي ايش فيها ها الأوراق..

(ثم ينتبه إلى حامد الذي يبدو متفاجئاً هو الآخر)

جمعة: هات كباية الشاي ويلا مع السلامة

(يخرج المراسل بعد أن يضع كأس الشاي أمامه على المكتب)

السكرتيرة: بس مش يا أستاذ تطلع عليها الأول؟

جمعة وهو يرتشف من الشاي: ايش هالشاي الله يرحم اللي كنا بنعمله

(تتطلع فيه السكرتيرة باستغراب)

جمعة: قصدي اللي كنا بنشربه، ما تدقيش .. وهادي الأوراق، ايش فيها؟ بس انت

قولي لي ايش المطلوب؟ والله اقولك ردي عليها بنفسك ما أنت هان الكل في الكل، انت

اكتبي اللي بدك اياه، وأنا بوقع .. ولما تخلصي، بنكمل كلامنا، ايش رأيك؟

السكرتيرة: زي ما تشوف يا أستاذ

وتغادر وهي في حالة مفاجأة.

(يدور حامد يخبر الجميع بأن جمعة قد أصبح المدير العام، يجري قليل من اللغظ بين

الموظفين، ثم يبدأون في الحضور إلى مكتبه ليباركوا له . يتجمع الموظفون حول

المكتب، حيث يجلس جمعة الذي يغطس بدوره في مكتبه (خجلاً وخوفاً) في هذه الأثناء

يكون قد تم تبديل ملابسه تحت المكتب وتغير مكياجه وفي لحظات يظهر جمعة بلباس

جديد فاخر، بدلة سموكن سوداء وحذاء جديد، وسيجار، ويغني أغنية فيما يتحول

الموظفون إلى كورس

انت (اسمع يا كبير)

انت (اسمع يا صغير)

ارخيلي دانك ..فتح لي عينك

على اللي بيصير

كله يفتح دياته .. حنوزع من كراماته

اشي كثير واشي قليل

حتى على الي ماتوا

انت من انهي حموله

ولا امك مسؤولة

ورح تتفتح لك الأبواب

من وأنت في الكفولة

حنعبي الهوا بقرايز

آيز آيز آيز

ونوز ع ع الكل برايز

آيز آيز آيز

ومهو كل شيء ممكن وجايز

في نهاية الأغنية يصرخ جمعة قائلاً: اجتماع

(يجلس على مكتبه فيما يجلس الموظفون أمامه)

جمعة : يا جماعة، بدنا نقعد قعدة عرب، ونحكي على المفتشر، أنا عارفكوا واحد

واحد (ولا نسيتموا)

هاالله هاالله ع الجد والجد هاالله هاالله عليه، لازم كلنا نكون ايد واحدة، كباية الشاي

نشربها مع بعض .. وكل واحد على شغله .. على شغله ياالله، اتفضلوا، من غير مطرود

يعني..

\*\*\*

(ابو عدنان يدخل لعند ابو اسماعيل، يجلس امامه) ويقول:

معقول يا ناس؟ المراسل يصير مدير عام؟

أبو إسماعيل : لا تستغرب يا صاحبي ولا على بالك، كل شي بصير زي الكذب  
أبو عدنان :بيصير .. نعم بيصير .. بس هيك من غير مقدمات وفي لحظة من القفة  
لدانها؟ والله اشي بيجنن

أبو إسماعيل :اسمع، بلا قفة بلا دانها، قوم نطلع لعنده نحطة بصورة الشغل ..  
ونشرب فنجان القهوة أحسن

أبو عدنان :شفت بالله (وكأنه لا يسمع صاحبه ويتابع استغرابه) وأنا اللي من الصبح بقولك  
قوم نشوف المدير العام بكون رجع من السفر وبنكون أول ناس ببسلموا عليه، واتاريه -الأخ  
جمعة- قاعد مطرحه.

أبو إسماعيل :يا أبو عدنان، بلا كثر غلبه، قوم طاوعني نروح لفوق ويعني بالله احنا  
ايش بتفرق معانا؟ اللي بيتجوز امي بقوله يا عمي..

أبو عدنان :بس هيك في لحظة؟ يا زلمة أكيد في سوء تفاهم في الموضوع !  
أبو إسماعيل : لا سوء تفاهم ولا يحزنون، وتلاقيه هالقيت قاعد يخاطب المسئولين  
اللي داعمينه واللي وصلوه لفوق، وبيوقع المراسلات، قايم بدوره على خير ما يرام  
أبو عدنان: (بدا انه اقتنع على مضض) يالله قوم، ندعبس ونتحقق ونشوف ايش  
المشكلة.

أبو إسماعيل :ياالله نقوم بالواجب

أبو عدنان (موافقا) :ياالله نقوم بالواجب

\*\*\*

(عند السكرتيرة في مكتبها، يوجد شاب صحفي ينتظر، يرن هاتف السكرتيرة، ترفع  
السماعة وتخفض صوتها)

السكرتيرة: نعم حضرة المدير العام، في أخ صحفي طالب مقابلتك

جمعة: صحفي ولا صحفية؟ (صمت) ذكر يعني؟ خليه يستنى شوي

(لا يكون مشغولاً بشيء لكنه يواصل اللعب بالرموت كمنترول ويتفرج على مباراة

كرة قدم، ينتقل معها يضغط على زر)

جمعة: ابعثي لي خالد بسرعة

(ويتابع المباراة الى ان يدخل عليه خالد فيبادره)

تعال يا خالد، ترجم إلي ايش بقول المعلق، مش لا أهلي ولا زمالك، يالله ولا البلاش

بتفرج ع الأجنب، بركي بنروح بمهمة كروية ع بلاد بره

(تفتح السكرتيرة الانتركوم تذكره بوجود الصحفي)

جمعة: ماشي الحال خليه يدخل، بس ما يطولش، ربع ساعة بس، الاستراحة بين

الشوطين

السكرتيرة تقاطعه باستغراب: نعم يا أستاذ

جمعة: لا ولا اشي، اسمعي ما تنسيش بكرة تعلميني على لعبة الشدة اللي بتلعبها ع

الكمبيوتر مبين عليها حلوة

السكرتيرة: الصحفي من زمان بستنى

جمعة: آه .. طيب، خليه ينفضل

(ثم يتناول صحيفة كأنه يقرأ ثم يتناول نظارات يضعها على عينيه يقرأ في حظ اليوم

الذي يقوله له "تلقتي اليوم شخصاً مهماً يبدأ اسمه بحرف الجيم"، يدخل الصحفي،

فيتطلع إليه من وراء النظارة، ويسأله مباشرة)

جمعة: اسمك جمال؟

يتفاجأ الصحفي: لأ

جابر:

لأ:

جون:

اسمي عادل

جمعة ضاحكاً: أهلاً تفضل يا جي عادل!

ويتابع: طيب ايش برجك؟ ليكون الحمل؟

عادل: مزبوط

جمعة: آآ يعني هذا الحظ إلك بدك تقابل شخصية مهمة يبدأ اسمها بحرف الجيم  
(ثم سعيدا باكتشافه): هذا أنا جمعة ... شخصية مهمة يا الله تفضل واستفيد من حظك

اليوم

(ينتبه إلى أن الصحفي مازال واقفاً) :

اتفضل اقعد يا جي عادل

(يجلس الصحفي ومعه كاسيت وكاميرا)

جمعة: أنا جمعة ابن خميس الهبيان، عمري 40 سنة متزوج من بهيجة بنت خديجة  
الجعار، عندي ست أولاد وأربع بنات، بحب الفوطبول وطبيخ الفاصوليا، الفاصوليا مع  
لحمة الخروف البلدي، الفاصوليا البلدية اللي حبتها صغيرة، اوعى يضحكوا عليك  
ويبيعوك من الإسرائيلية، وبتفرج ع(الدش) واليوم صرت مدير عام هيك خبط لزق ما  
هو أنا برج الحمل .. وحظي وحظك ضارب اليوم بس لو كنت بعرف كان عبيت اللوتو  
وكان صرنا فوق الريح..

(بيدي الصحفي استغرابه):

يتابع جمعة: شاي ولا قهوة يا أخ؟

الصحفي: مفيش لزوم

جمعة: طيب فستق، بزر، قضامة، يا الله يا درة بلدي "وكأنه يبيع"

(ويضيف): كله موجود، المالية لسة ما عملتش جردة النثریات، وإحنا في أول السنة، وزر بيحي حامد شبيك لبيك  
(يضغط على الزر تدخل السكرتيرة)  
جمعة: شوية مكسرات لو سمحت  
بعد خروج السكرتيرة  
الصحفي: خيلنا نبدأ الحوار، وعشان الوقت (يتطلع في ساعته) ربع ساعة بس،  
وكأنه يذكره

جمعه: اه معلوم، بتحب تسأل عن اشي معين ولا انا دي حاتم يسألك وتجاوبه هأها؟  
الصحفي: لأ، الصحيح، إحنا بنعمل تقرير عن الإنجازات خلال السنة، وبدنا  
مؤسستكو تعطينا صورة عن أعمالها  
(تدخل السكرتيرة تضع بعض المكسرات على الطاولة ويبدأ جمعة بأكل فزدق حليبي  
ويتكلم)

جمعة: إحنا الصحيح ما صورنهاش لأنه ماكنة التصوير عطلانه  
الصحفي مصححاً لما اعتقده جمعة:

بقصد تعطيني فكرة، ملخص أو موجز..

جمعة: موجز زي تبع الأخبار يعني، يالله كله صحافة بصحافة

الصحفي: أو تقرير عن العمل

جمعة (كأنه يفهم أخيراً): أه يعني بدك ايش اشتغلوا الموظفين طول السنة

الصحفي (مؤكداً): طول السنة

(جمعة يضغط على الزر، تظهر السكرتيرة يطلب منها الملف الذي يتضمن تقرير

العمل)

جمعة (يداعب الصحفي): وايش اخبار الجريدة والتلفزيون

الصحفي يرد إليه السؤال :انت ايش رأيك؟

جمعة : أنا بموت عالفزندق الحلبي خصوصاً لما يكون طازة

جمعة يعتد كالمسئول : هو يعني فيه تطور والأخبار يعني أول بأول، والصحافة  
مغطية والتلفزيون ما شاء الله بالألوان، ع الهوا وبسجل برامج كل الفضائيات وأحلى  
المسلسلات عشان يوفر علينا والناس مش عاجبها، من وين بدهم يجيبوا لكوا يعني؟

(تقع حبة فزندق حلبي على الأرض فينزل جمعة للبحث عنها وأثناء ذلك يتابع كلامه

مع الصحفي)

الصحفي : والإذاعة

جمعة : هنا لندن، صوت العرب من القاهرة

الصحفي : لا إذاعتنا

جمعة : انت بس تعال كل فترة وفترة وانا بهتم بأمرك يعني اذا بدك تتوظف ولا مش

عاجبك الراتب

(تدخل السكرتيرة)

: هادا هو الملف

جمعة : يالله يا خال سجل

يبدأ الصحفي بالتسجيل

جمعة (يتابع) : بمين نبدأ؟ بالأستاذ جميل، ولا الأستاذ عمر؟

الصحفي :حسب الدوائر

جمعة :آه الترجمة .. لسة قبل شوي الأخ خالد ترجم لي تعليق كروي

الصحفي :يستمع ويسجل

جمعة :السكرتارية، حل 271 مربع كلمات متقاطعة، وانجاز 23 لعبة شدة ع

الكمبيوتر، دائرة المرأة (ويتتبع الملف) 27كنزة صوف، 15 ثوب فلاحى، و 29

مريلة أطفال ... الإدارة صرف 357 فاتورة بنزين و 764 فاتورة مطعم و 25 مهمة للخارج 63 .. إنذار و 450 يوم إجازة، وخصم 47 يوم تخلف عن الدوام (يعلق قائلاً) آه يا ولاد الملعونة، خصمتوا علي نصهم.

ثم يتابع :وصرف 842 ساعة عمل إضافي (أنا ولا ساعة منهم)

الصحفي مستغرباً :يا حضرة المدير العام

جمعة :إيش ما بدك نكمل؟

الصحفي :لأ ..انا بحكي عن الانجازات .. الانجازات الملموسة

جمعة :إيش يعني؟ مش عاجبك التقرير؟ هاتي يا سوزان (ويضغط الزر) ورقة وقلم

..خلي الأخ يكتب اللي هو عايزه

الصحفي ينهض :أستاذ جمعة .. شكراً

جمعة :وين، لسة تقرير دائرة الضيافة، تبعتي سابقاً 7856 كاسة شاي 3622 +

فنجان قهوة..

الصحفي يغادر

جمعة يتابع : والسواقين والناس والبلد

ثم يقول :أما صحافة .. أي البلد ع باب الله من قلة؟

\*\*\*

(أبو عدنان وأبو إسماعيل يدخلان على جمعة فيجدانه جالساً على المكتب بزهو)

أبو عدنان : مرحبا يا جمعة، قصد يا أستاذ جمعة

أبو إسماعيل :قال صحيح..

(أبو عدنان كأنه يأخذ الكلام من زميله)

:مش كنت تقول يا زلمة، يعني هو احنا كنا نكره؟

أبو إسماعيل :بس عشان الواجب يعني..

أبو عدنان :آه مش واجب برضه نقوم بالواجب؟

جمعة :طيب خلص .. يعني كان لازم اشاوركوا ولا ايش؟ هو الموضوع كله صار صدفة.

أبو عدنان : صدفة؟ كيف يعني؟

جمعة (بتدراك) :قصدي صار بسرعة، من غير تخطيط ..

أبو إسماعيل :زي كل اشي

أبو عدنان :هيك أحسن، لو كان فيها تخطيط..

(أبو عدنان يمد يده يريد ان يأخذ فزرق حلبي جمعة يضربه على يده)

جمعة (يقاطعه) :بيكفي عاد عملتوا لي اياها حدوته وحكاية تفضلوا اعدوا .. تشربوا

شاي ولا قهوة؟

(يجلسان فيما يدق على الجرس الداخلي يطلب لهما شاي وقهوة ثم يسأل)

:ايش أخبار المؤسسة؟

أبو إسماعيل :بالمناسبة لازم نعمل احتفال

(يمد يده ليأخذ فزرق يضربه على يده)

جمعة :بلا احتفالات، بلا مهرجانات، هي انطلاقة يعني ولا تأسيس؟

أبو عدنان :انت ليش مصغر حالك؟ والله أهم من انطلاقة وأحسن من تأسيس.

أبو إسماعيل :ليش لأ يمد يده على الفزرق، والموظفين الصحيح مبسوطين ومفكرين

ينزلوا إعلان في الجريدة

جمعة مفاجئاً: إعلان (ويضربه على يده)؟ جريدة؟

أبو عدنان: ليش لأ، عشان الناس تعرف.

أبو إسماعيل: آه عشان المسؤولين يتصلوا فيك ويخاطبوك رسمياً.. (كأنه يتذكر شيئاً) .. بالمناسبة، ومن غير مؤاخذه لو حضرتك تفضل وتبعث للإدارة صورة من الكتاب؟

جمعة: كتاب؟ أي كتاب؟

أبو إسماعيل: كتاب التعيين

جمعة: كتاب التعيين؟

أبو إسماعيل: ايش هو ما وصلش؟

جمعة: لأ .. لأ موجود

(ثم يدس يده في درج المكتب فيخرج أي ورقة)

(أبو إسماعيل يحاول أن يتناولها)

جمعة: لأ بعدين ببعثك صورة عنها

(يستأذنان، جمعه يحثهما على البقاء، وهو يقف، ويفتح الباب طيب قزقزوا فزدق

فيعودان)

:لسة بدري يا إخوان يمد يده ويسلم عليهما وكأنه يطردهما، على العموم سلمولي

على الزملاء الموظفين، وأنا هيك إن شاء الله نص ساعة زمان وبكون عندهم، يعني

جولة ميدانية، بس هه ديروا بالكوا .. خلوها زيارة مفاجئة .. صحيح والشاي والفزرق

جمعة: بعدين بنشرب شاي وبناكل حلو كمان

(جمعة يعود إلى مكتبه يتأمل الورقة، يفكر، ثم يخرج من الدرج خاتماً ويكتب:

يعين السيد جمعة ابن خميس الهبيان مديراً عاماً للمؤسسة العامة اعتباراً من أمس

قراراً وجاهياً غير قابل للنقض مع موافقة العائلتين بالوافق والتراضي بينهما والله من وراء القصد .. قبلتك زوجة .. قبلتك بعلاً، وعليه أوقع، ثم يوقع ويختم الخاتم، ثم يعيده إلى الدرج ويبدأ في إخراج الأوراق)

جمعة: طلب تعيين سكرتيرة .. عادة أبو ماضي .. آه يا عمي هادي بتكون من القراب .. مع الموافقة طبعاً .. هادا .. كمان طلب تعيين دكتوراه في التخطيط والإدارة .. من وقتيش 6 .. أشهر .. يؤجل .. طبعاً بلزمش .. ويش هادا .. طلب مساعدة .. عشرين ألف .. آه مانتوا يا حرام ناقصين مصاري .. (يتابع التفتيش) .. فاتورة مهمة للخارج، موقعة للصرف .. وقبل ما ترجع، طبعاً .. صحتين يا با، ماهو المال السايب ..

(يرن الجرس الداخلي)

السكرتيرة: أستاذ في أنسة ع الخط طالبه حضرتك

جمعة (بفرح): قلتي أنسة أنسة، مش أنسة يعني بنت ؟

السكرتيرة: (تؤكد) نعم أنسة أسماها فدوى مصره تحكي معك

جمعة: هي موجودة

السكرتيرة: لأ ع التلفون، بس بدها موعد

جمعة: أعطيني إياها، بكلمها، وبحدد موعد، بس أوعي تقولي لحدا

(جمعة يعدل من هيئته ويرتب شعره)

الو، نعم .. أنا حضرتي .. الأستاذ المدير العام، مين حضرتك

فدوى:

يا سلام اسم بيجنن، وأكديت أنت حلوة زي اسمك .. وقديش عمرك يا فدوى

17: سنة

: عال العال .. متزوجة يا فدوى

: لا

:مخطوبة

:لا

:محبوبة .. كمان لا، وقت ما بدك تعالي يا فدوى هان ولا في البيت؟ هان .. هان  
ياالله بتحضري معنا الحفلة كمان..

: شكرا كثير دكتور

:لا شكر على واجب

ثم يغلق الخط ويتساءل:

دكتور .. وكمان دكتور؟ ياالله كلها سفرة لبرة وبنعمل منها مهمة للخارج بنروح على  
روسيا ولا أوكرانيا .. زي ما عمل هضاك الواحد وبنرجع بزينة وزمبليطة  
تدخل السكرتيرة ببعض الأوراق

يبادرها بالقول : تعالي هان قربي، مالك مستحبة

سوزان :في اشى يا أستاذ

ينتبه فيقول :ايش رايك تعلميني ع الكمبيوتر؟

سوزان بخبث :ع الكمبيوتر ولا ع اشى تاني؟

جمعة :ايش رايك يا سوزي، لو تقربي مكتبك، تيجي عندي هان، بلاش تضلك  
رايحة جاية .. يعني عشان المشوار بعيد..

سوزان بدلع :انت قلقان علي والا

جمعة :قلقان و(والآ ) .. ايش رايك نزيح هالديكور، ولا نقربه، ولا حتى ندخل  
مكتبك في غرفتي؟

سوزان ضاحكة :ايش بدى أصير مدير عام كمان؟

جمعة مستاء :ايش مدير عام؟ لالا بلاش خلي مكتبك غاد، بس انت تعالي هان

سوزان :يا أستاذ احنا في الدور مش ورا الستاير

جمعة: ويعني هو احنا عنا اسرار؟ والله ما نفسي إلا ونعمل مسرحية، ونفضح فيها  
بلاوي الفنانين..

تضع الممثلة أوراقها وتخرج وهي تحاول إخفاء ضحكتها .

## الفصل الثاني

(تفتح الستارة على الموظفين جميعاً وهم مجتمعون ينتظرون المدير العام وقد زينوا المكان حتى اذا حضر جمعة بادروه بالغناء)

الموظفون : أهلاً .. أهلاً يا مدير انت الأول والأخير..

ما في غيرك بنحب ولا غيرك ببصير مدير..

أهلاً بالمدير العام .. يا علم فوق الأعلام..

انت الكفاءة والجد..

وانت أصل الاحترام..

جمعة يرد عليهم :يا موظفين .. يا حلوين

خليكوا دائماً .. ساكتين

وطول ماننوا في الشغل..

خليكوا على طول نايمين..

(ضحك هرج ومرج)

جمعة :شكراً .. شكراً .. تفضلوا

(يجلسون على المقاعد)

يبادر أبو إسماعيل :لو تسمح لي يا أستاذ باسم الموظفين جميعاً، اللي اجو يباركوا ويهنوا، بقول انه احنا جميعنا تحت تصرف حضرتك، وفي الخدمة، واحنا مش قادرين نعبر أو نوصف مدى فرحتنا، ويا ريت لو تتكرم حضرتك، وترفع للمسؤولين، وتقول بالنيابه عنا جميعاً، عن تقديرنا للقرار الشجاع والحكيم، بتعيين حضرتكم ..

هذا القرار (كأنه يخطب) الذي يؤكد سياسة تعيين الرجل المناسب في المكان المناسب والذي يفتح الباب واسعاً (يؤكد واسعاً) أمام تطور المؤسسة ورفعتها .. والى الأمام سيروا فعين الله ترعاكم.

(تصفيق حاد من قبل الجميع)

أبو إسماعيل: وبالمناسبة يا ريت يا أستاذ تتفضل بالحكي

جمعة (مأخوذاً): أنا احكي؟ ايش أقول؟

أبو عدنان (يتدخل): قبل ما الأستاذ يتفضل بالحكي، يا ريت إذا حدا من الإخوان حابب يقول اشي؟

(على الفور يبدي أحد الموظفين رغبته في ذلك)

:لو سمحتوا لي؟ يهدأون

جمعة: مين حضرة الأخ؟

الموظف: أنا رامي مدير المشروعات

جمعة (باستخفاف): انت مدير؟ مدير ايش؟ C برضه؟

الموظف: صار لي ست أشهر مدير C والأستاذ أبو إسماعيل مرضيش يرفع اسمي بقوائم الترقيات آخر السنة

جمعة: طيب بنشوف، يعني حسب نشاطك ايش مدير مشروعات؟ لما نشوف آخر مشاريعك؟

(يبدأ جمعة بإلقاء كلمة):

بسم الله الرحمن الرحيم، أعزائي أحبائي وإخواني والصحيح الصحيح والغلط محدش برضى عليه (ثم يتابع) أنا الصحيح اليوم شربت أحلى كباية شاي معاكم، والصبح اشتريت فول وفلافل من عند أبو طلال بثلاثة شيكل، وضليت الغ فيهم لما يعني عبيت الطاسة، وصارت أمور المؤسسة مفولة .. أنا مبسوط إني صرت واحد منكوا .. ولا

يهمكوا .. والله لأضل وراكوا لما تصيروا كلكوا مدرا إن شاء الله .. إن شاء الله.. إن شاء الله آه .. آه والسلام عليكم ورحمة الله وبركاته

(تصفيق حاد)

:يحيا العدل، يعيش الأستاذ جمعة نصير الموظفين

(يتقدم منه حامد ويبلغه خيراً، يصفق بيديه، فينتبه الجميع)

جمعه: أشكر كوا فرداً فرداً وعن ازنكو اسمحو لي جايني ضيوف

أبو عدنان: إذتك معك يا أستاذ، نورتنا

(يغادر جمعة إلى مكتبه، ثم يجلس على كرسيه ويرفع الانتركوم، يسأل سوزان)

جمعة: مين؟ مندوب البنك؟ خليه يتفضل

آه أكيد عشان القرض اللي قدمت عليه

(يدخل الضيف فيفاجأ جمعة أنه أجنبي، فيهز رأسه ويطلب منه الجلوس، ثم يرن

الجرس يطلب من السكرتيرة إرسال المترجم خالد، والى أن يحضر خالد يظل جمعة يهز

برأسه ويقول (yes no) ستاند أب، سد داون، قد مورنتق بويز، قد مورننيق جيرز

:يبين وقت والتاني الواحد لازم يراجع لغته هي لنجليزي اللي تعلمناه في سادس نفع

يدخل خالد، يبادر بالتحية، ويحيي الضيف: ويل كم .. ول كام أهلاً وسهلاً

خالد يقدم جمعة للضيف: السيد جمعة، رجل عصامي، متفاني في العمل، محبوب،

كفاءة مشهود الها، عملي جداً

(إعادة هذا المشهد "مشهد الاجنبي" وكان المدير العام السابق كان قد قدم على قرض

بقيمة 70 مليون دولار وفي نفس الوقت جمعة مقدم على قرض بقيمة 70 مليون

اغورة ومن هنا تبدأ ملابسات المشهد)

يتدخل جمعة: ولكم .. ولكم .. في مكتبنا .. ويلكم ويلكم

(يترجم خالد ويقدم الضيف وحين يلفظ اسم اورينت)

جمعة: آه اورينت .. الاورينت هاوس؟ آه عرفت

الضيف: نو .. نو اورينت, هاوس فور يو!

جمعة: صار إلي والله ما أنا عارف، طيب ايش عليه صار، عندي بنك؟ ما علينا

نخش في الموضوع (الضيف يسأل عن احتياجاتهم)

يترجم خالد

جمعه (يهز رأسه): أول اشي وأهم اشي بدي قرض، مش انتو البنك؟

يترجم خالد والضيف يوافق ويسأل عن كيفية دفع المبلغ

جمعة: بدي السبعين مليون كاش واليوم قبل بكرة، يعني اذا ما فيها تقله

(يترجم خالد، يسأل الضيف عن موجبات القرض)

جمعة (ضاحكاً): عشر أضعاف الراتب، ما أنا عارف القوانين، بطلعوا 70 مليون،

إذا بدكوا تحسبوا ع راتي الجديد بطلعلي هبرة حرزانه

(يترجم خالد ويسأل الضيف عن طبيعة المشروع)

ويترجم خالد

جمعة: آه فهمت عليك، الصحيح ولا مؤاخذة بدي أسقف الأوضة

(ويضيف موجهاً كلامه إلى خالد)

: وضّح له، صار لي 30 سنة في القرميد، كل شتا بتهر علينا الميه، تقول بحر،

وأنا صرت موظف والناس بنتطلع لي، والشتا جاي والأولاد بدها تقراء، بركي بنخلص

من الدلف والمزrab

(يترجم خالد، فيسأل الضيف إن كان ينوي إقامة فندق خاص أو بيت للضيافة)

جمعة: يا عمي فهمه أي فندق هادا محل الإقامة في المعسكر، أسأله بدو كفلا، ناديلك

2موظفين

(يترجم خالد، ينتبه الضيف إلى أن هناك خطأ)

يقول : نو .. نو 70 .. مليون دولار، مستحيل عشان منزل خاص.

جمعة يسمع كلمة دولار فيقول (قبل أن يترجم خالد)

: حدا جاب سيرة الدولار؟ نو .. اغورة .. اسرائيلي.

(يترجم خالد ويضحك الضيف، ثم يسأل كم يساوي المبلغ بالدولار)

خالد يقول: 1700 دولار

جمعة : اسمع يا خالد إذا هو مصر على دولار يدفع زي ما بدو

خالد : هو بيقول إنهم بيمولوا مشاريع عامة

جمعة : ما فيش مانع، احنا 3 مليون يعني 300 ألف عيلة، كل عيلة 1700

دولار، يعني يحول لي حصتي على حسابي ويحول الباقي للناس على مهلة..

وبالطريقة اللي بتعجبه، وبعدين أنا مدير عام مش مدير خاص .. ترجم له

ثم يسأل أنادى الكفلا؟

يترجم خالد، ثم يتحدث الضيف عن أنه سينقل الصورة إلى مسئولى المصرف

الدولي وسيوصي بصرف المبلغ من أجل السكان الفلسطينيين وسيخبرهم بالنتائج لاحقا

جمعة : يعنى ضيعنا وقتنا ع الفاضي يا الله يابا الزيارة انتهت ويل كم..... ول

عليكو ول عملتوا البحر مقاتى .. سى يو تومورو؟

ينهض الضيف يمد جمعة يده قائلا

: سلم لى على شومان ووصيهم علينا بلكى أخذنا القرض وسقنا الاوضة.

يخرج الضيف ومعه خالد، السكرتيرة تفتح عليه الهاتف الداخلي

: استاذ ما تنساش حفلة اليوم ولا الكلمة اللي حضرتك لازم تلقيها على الحضور.

جمعة : مفهوم.. مفهوم في اشي كمان.

السكرتيرة : بعدين الأستاذ أبو زياد في المستشفى لازم عمله زيارة.

## الأعمال الكاملة: المسرحيات

جمعة : مين هادا أبو زياد؟

السكرتيرة : عضو مجلس إدارة المؤسسة .

جمعة : آه يعنى مهم وبين هو.. في الشفا؟

السكرتيرة : لأ في المقاصد

جمعة : المقاصد؟ ايش هادى مستشفى؟

السكرتيرة : آه مستشفى في القدس

جمعة : وايش بدو يوصنا للقدس بالك بعملوا لي تصريح، وألا بيعتبروني شخص مهم؟

السكرتيرة : إحنا بنكلف المكتب هناك، بيعث له ورد باسمك وأنت من هان بتعمل له الو...  
الو...

جمعة : وبنزل في الجريدة إعلان .. اكتبني عندك .. الأخ أبو زياد .. نتمنى لك الشفاء العاجل، حتى تعود لبيتك وأولادك زي الحصان والله من وراء القصد .. جمعة ابن خميس .. اوعي تنسي تكتبي اسمي بالبنط العريض أهم اشي يكون اسمي مكتوب .. ها

السكرتيرة : حاضر يا أستاذ

(جمعة يدير قرص الهاتف)

: الو صباح الخير .. كيف حالك يا أنسة .. صوتك حلو .. أكيد انت حلوة كمان ..

أنا .. أنا الأستاذ جمعة .. مين بدي.. المراسل.. لأ.. لأ المدير العام

(ينتظر قليلاً ثم يسمع صوت موسيقى عبر الخط يبدأ يحرك جسده، كأنه يرقص ثم

تتغير الموسيقى إلى آه نص)

: يا عيني على ها الموسيقى، والله الواحد يضل فاتح الخط، وكأنه فاتح راديو

(يتغير صوت الموسيقى فينتصب) ثم يتحدث

: الو .. أهلاً يا زميل، أبدا فيش اشي بس حبيننا نتصل يعني عشان لازم يكون في اتصالات بين المؤسسات التي بتشتغل زي بعض، والمسؤولين اللي على المستوى، لازم يحكوا مع بعض، مش هيك .. أهلاً وسهلاً، وأنا جمعة الهبيان .. الله يزيدك شرف، طب يا ريت تشرفنا حضرتك ع الحفلة اليوم، انتو عاملين حفلة .. طيب يا سيدي خيرها في غيرها، والله يديم الأفراح، وان شاء الله يجمعنا عند قبر النبي .. آمين يا رب

(ويغلق الخط، فيما السكرتيرة تفتح عليه الخط الداخلي مجدداً)

:أستاذ جمعه، الجماعة جاهزين، وبستنوا حضرتك

جمعة : وانت جاهزة

السكرتيرة (باستنكار) : نعم؟

جمعه : ليش بتفهميني غلط يا ست سوزان؟ قصدي عشان ترافقيني ع الحفلة

السكرتيرة : نعم الكل جاهز

جمعة : يالله على بركة الله

(يخرجان باتجاه القاعة حيث تبدأ الحفلة، وتظهر المصقات ولوازم الضيافة، يدخل القاعة، فيرافقه التصويت، يوجد على الطاولة مشروبات غازية وبسكويت، بمجرد دخوله يصب كولا ويبدأ بأكل البسكويت بشكل مضحك)

عريف الحفل : إنه ليوم مجيد، أن يحتفل معنا السيد المدير العام، الذي يدلل وجوده معنا على مدى ما يكنه من احترام وتقدير للمرأة، نصف المجتمع التي تتمتع بكل الحقوق الوطنية .. ونحن نقول بكل وضوح وصرامة بأننا سنستمر في مناصرة المرأة إلى أن تختفي الفوارق في المجتمع ونقول بأنه لو كانت في منصب المدير العام امرأة لما كانت نصيرة لها، مثلما هو مديرنا العام..

(يواصل التصفيق)

عريف الحفل : وإنه ليشرفنا أن نطلب باسمكم جميعاً من المدير العام، التكرم بإلقاء كلمته التاريخية في هذه المناسبة..

جمعه (مرتبكاً ثم متشجعاً) : اشي منيح يكون للنسوان يوم، بس بقية السنة لمين؟ المهم نكون كلنا ايد وحده عشان نربي الأولاد، طيب علي (الطلا .. يتراجع) من غير يمين، إنه النسوان الله يعينهم كل سنه حبل وميلاد وطول اليوم طبيخ وجلي ومسح وكنس .. وهس ولك .. اسكتي .. حاضر طيب .. والسلام عليكم ورحمة الله وبركاته  
تصفيق :

يوشوش له عريف الحفل:

نعم .. يالله تفضلوا ع البوفيه

(تخفت الإضاءة، وتتحرك الموسيقى هادئة، ثم يبدأ الجميع في الأكل والشرب، وبعضهم في الحديث، تتقدم منه صبيه، تسلم عليه)

جمعة : اهلاً .. اهلاً..

البننت : أنا جيت ع المعاد

جمعة : معاد أي معاد ؟

البننت : مش اليوم معادنا .. أنا فدوى

جمعه : آه فدوى

(ثم يتناول عصيراً)

: تفضلي يا آنسه .. الصحيح مبين عليك يا فدوى .. كلك مؤهلات (ويتفحص

جسدها) ويتابع : خلص اعتبري حالك معينه من اليوم

فدوى : وايش الوظيفة

جمعة : زي ما بدك المهم خليك قريبة مني

(في تلك اللحظة تحضر امرأة عندما يراها، يحاول ان يخرج من القاعة، فتمسك  
بكتفه)

بهيجة : وين رايح، وايش بتسوي هان؟

جمعه : هس .. هس .. خذي كولا وبتي فور كليهم، وآلا اسمعي، خللي الولد يجيب  
لك كيس بتي فور تروحي فيه للأولاد..

بهيجة : يعني مش شايفاك بدور على الموظفين بصينية الشاي والقهوة  
جمعة : اسمعي يامرة انا زلمة مهم، وغيرت جلدي، تخلنيش أنسى العيش والملح  
وأغيرك كمان

(تبتسم له فدوى، التي تبدو قريبة منه لكنها لا تسمع ما يدور بينه وبين زوجته)  
بهيجة : طيب .. طيب .. اليوم شفت أبوك في السوق، وقال أنهم جايبين لعنا، قلت أجي  
لك تعطيني متين ألف اشترى طبخة للضيوف.  
(يمد يده في جيبه ويخرج ورقة نقدية)

جمعة : خدي هي نص مليون بحاله، بس انت توكلي، هان شغل يا بنت الحلال.  
(سوزان تراه فتعتقد بأنه يمنح صدقة لطالبتها فتبتسم)

جمعة ينادي : حامد .. حامد .. ولد يا حامد  
حامد : نعم يا استاذ

يؤشر جمعة على بهيجة : شوف الست عبي لها كيس بتي فور حرام، ولادها  
بستنوها، طول عمرهم ما شافوه، أنا بعرف حالتهم منيح .. خليها تدعيننا.  
(ثم يخرج من القاعة وسط احتفال الجميع)

\*\*\*

(جمعة في مكتبه وقد انتهت الحفلة، بعد قليل يحضر المدير العام السابق، يحمل سيجارة، ويدخل على السكرتيرة التي تفاجأ به، حيث لم تعمل حساباً لحضوره)

أبو ماضي : صباح الخير

سوزان : نعم يا أستاذ

(لا يعيرها انتباهاً ويدخل، يتوجه الى مكتبه، فيفاجأ بجمعة)

أبو ماضي : جمعة، ايش بتسوي، لساتك بتنظف؟

(جمعة الذي كان مشغولاً باللعب في جهاز الكمبيوتر)

: نعم؟ ايش الحفلة خلصت؟ على العموم حضرتك، كنت مدعو وتأخرت؟ مش مشكله، تفضل .. تفضل..

أبو ماضي : حفلة ايش؟ ومدعو مين؟ مالك يا جمعة أنت نسيت حالك، وأنت تنظف وألا ايش؟

جمعة : بنظف .. ايش بنظف .. آه بنظف كل اشى أصل الأستاذ الله يسهل عليه كان

..

يقاطعه : ايش بتقول؟ ياالله كباية القهوة المزبوظة بسرعة

جمعة : وبينها كباية القهوة؟ يعني شكلك مش..

أبو ماضي : ايش صار لك يا جمعة .. قوم شوف شغلك..

جمعة (يعرفه لكنه يتجاهله) : يا حضرة .. ما أنا شايف شغلي، وألا كنت مستنتي

واحد زيك، يوريني إياه يعني؟

أبو ماضي (يتراجع) : أنت مين؟ مش جمعة المراسل؟

جمعة : أنا جمعة .. نعم .. أنا جمعة .. بس أنا المدير العام .. بس انت مين

حضرتك؟

أبو ماضي (غاضباً) : أنا، وبتسألني مين أنا، ولك أنا المدير العام، ايش صايرلك؟  
ايش صاير في المؤسسة؟ قوم فز من مطرحك.

جمعة : اسمع، أوعك تغلط ها، أنا هان المدير العام، فش مدير عام غيري .. بعدين  
انت كيف بتدخل هيك من غير احم ولا دستور؟

أبو ماضي : احم ايش ودستور ايش؟ ايش الدعوة يومين وطارت عقول الناس؟  
(ثم يقترب من جمعة ويبدو اهدأ)

جمعة.. أنا أبو ماضي، الأستاذ، ايش صار لك ايش فيه؟

جمعة (هادئاً) : آه أنا بشبه عليك، كان في عنا واحد موظف ببشبهك، بس هادا كان  
زمان.

أبو ماضي (منفعلاً) : موظف وكان زمان؟ يا زلمة كلها يومين وأنا المدير العام.  
جمعة (مستنكراً) : ما تقولش المدير العام، لأنه ما في مدير عام غيري، ما في مدير  
عام وأنا موجود

أبو ماضي :وبعدين في هالمسرحية .. ايش يا جمعة انت مفكر اليوم عطلة يا الله ما  
هم اهلك سموك جمعة .. عشان جيت .. أكيد في يوم عطله .

جمعة : ماله يوم الجمعة وماله اسم جمعة .. الناس بتتريح فيه وبتتبسط كمان  
أبو ماضي : بس يوم العطله، يوم عابر يوم مؤقت، يوم لعب، مش يوم جد ..  
وهالقيت خلينا من اللعب وخلينا نرجع عالجد

جمعة : وايش الجد.. انك تستغرب إنني أكون مدير عام؟ هاد الجد؟ وانك انت بس  
اللي بطلعك .. هادا هو الجد .. اللي إلك مصلحة فيه هو هادا الجد واللي ملكاش لعب ..  
يا سيدي ما أحلاه اللعب ويا ريت كل حياتنا مسرح في مسرح .. وقال يعني اللي احنا  
فيه مش زي المسرح.. بس بعدين يا سيدي يومين ولا ساعتين .. ليش مستقل فيهم يعني  
.. ما الدنيا بتصير الفوقاني تحتاني في يومين؟ انت بتسمعش الأخبار وألا ايش؟ في

لحظة بتقوم حرب وزلزال وانقلابات

أبو ماضي : آه .. فهمت يعني عاملين انقلاب يعني؟

جمعة : أنا بقول ثورة

أبو ماضي : بلا طول حكي .. ثورة ولا انقلاب .. المهم أنا شايف انك زودتها، قوم خليني أشوف شغلي واقعد على مكتبي .

جمعة : قصدك .. هدولة هبل وعلى نياتهم لا يابا يفتح الله احنا هان غير شكل، احنا بنقعد ومن هان للقبر..

أبو ماضي : يعني ما في حل؟

جمعة : لا .. فيه

أبو ماضي : ايش هو؟

جمعة : استنى

(ويضرب الجرس)

: أبو إسماعيل أبعث لي كل الموظفين، وتعال معهم انت كمان حالاً..

ويتابع : انت تفضل اجلس هان ع الكنبه وشوف بعينك

(يدخل الموظفون يلقون التحية ويتجاهلون مديرهم السابق)

جمعة : أنفضلوا كل واحد في مطرحه المخصص اله.. (يتوقف) - ثم يقول- في

واحد منكم بيعرف الأخ؟

أبو عدنان : الأخ أبو ماضي (يتهلل وجه ابو ماضي) كيف ما بنعرفه؟

جمعة : نعم .. نعم .. هو أبو ماضي، ايش بتعرف عنه يا أبو عدنان؟

أبو عدنان : كان مديرنا قبل يعني ما تصير حضرتك المدير

جمعة : بالزبط هادا الكلام الصحيح .. وأنا بقول يعني إنه ما بصير نتخلي عنه، ولازم نقوم ابه، وإذا لسه بحب يضلّه معانا احنا لازم نشوفله شغله . وأنا عشان الأصول والواجب، راح أوقع قرار حالاً بتعيينه مدير قسم التقاعد

أبو ماضي (محتجاً) : ايش مدير قسم من مدير عام المؤسسة لمدير قسم فيها؟

جمعة : يا سيدي ولا تزعل مدير عام في المؤسسة

أبو ماضي : يا زلّمة أنا كفاءة ومؤهل وخبرة

جمعة : بعرف، والله بتستحق تكون مدير عام الكرة الأرضية، بس بدك شاغر، ايش رأيك تستنى لما يصير مدير عام المؤسسة شاغر؟ وألا أقولك تاخذها من قصيرها وتشتغل مراسل وتستناني لما أسافر بمهمة (يضحك) وإذا بدك بوديك على مؤسسة ثانية، وتعمل زي ما أنا عملت وتاخذها بدراعتك؟

(أبو ماضي مستغرباً)

جمعة : خلص انتهى النقاش، وانتو (مشيراً إلى الموظفين) تفضلوا على مكاتبكو

(يخرج الموظفون)

أبو ماضي : اسمع ما تفكرش انك بتقدر تهيلم علي، والله بوصلها لأعلى المسؤولين، وبفضح الدنيا، انت خليك مدير عام، بس أنا برضه مدير عام

جمعة : والكتب؟ والصلاحيات؟

أبو ماضي : بنقسم كل اشي

جمعة : كيف؟

(أبو ماضي يجر كرسيّاً ويضعه خلف المكتب، ويقسم المكتب إلى قسمين)

أبو ماضي : هيك أنا هان وأنت هان

(يرن جرس الهاتف فيتنازعان المكالمة)

أبو ماضي : مين بدك، المدير العام، أنا المدير العام

جمعة يخطف السماعة : أنا المدير العام، نعم بخصوص مشروع الإسكان؟

أبو ماضي يأخذ السماعة : ايش في مشروع الإسكان، العمل متوقف؟

جمعة يأخذ السماعة : طيب خلي العمال ياخذوا استراحة ايش بتقول مخاسر

وتفتيش؟

يعطي السماعة لأبو ماضي : ايش لجنة

(يعطيها لجمعة، ثم يرفضان كلاهما متابعة المكالمة، ثم يجلسان على كرسيهما

يتزاحمان)

جمعة : اسمع هيك ما بزبط معنا ايش رايك نقسم هيك..

(وينقل كرسيه إلى الجهة المقابلة، يجلسان مقابل بعضهما، ويضعان فاصلاً (خيلاً

بينهما)

أبو ماضي : تمام

في الأثناء تكون نادبة مندوب اتحاد المؤسسات قد جاءت لتأخذ توقيع المدير العام على التقرير السنوي للمؤسسة، فتشاهد ما حدث بين الرجلين، تطلب توقيع المدير العام على التقرير، فيوقع كلاهما.

نادبة (مستغربة): هاداقراركو؟

أبو ماضي وجمعة: بالإجماع

(يرفعان أيديهما، بينما تنتقل الإضاءة لأبو إسماعيل وأبو عدنان، تصلهما نادبة وفي

يدها الملف)

نادبة : شفتوا الإخوان ايش قرروا.

(أبو عدنان وأبو إسماعيل ينظران في الملف، تظهر عليهما علامات الاستغراب)

أبو عدنان : لأ هيك المسألة زادت عن حدها احنا كنا في واحد صرنا في اثنين

أبو إسماعيل : الأمور صارت شوربة، المشاريع، القرارات، الإجراءات..

نادية : إذا الأتحاد بتصله هالتوصية بتقوم الدنيا وما بتتعد، وبتصير فضيحة في كل  
البلد

أبو إسماعيل : أنا رأي نبعث التوصية، وخليها توصل لحد ما توصل، ما هي إذا ما  
اشتدت ما بتفرج.

أبو عدنان : يا ناس مالكو .. هادي المؤسسة إلنا .. ولازم احنا نتدخل وندافع عنها

أبو إسماعيل : ايش يعني رايك نسوي مظاهرة ولا ثورة؟

نادية : يعني هو يا هيك .. يا هيك .. مخصناش يا بنولعها؟

أبو عدنان (مفكراً) : ليش ما نبعث خبر للمجلس الأعلى؟

نادية : ومين بدو يخاطبه غير المدير العام؟ قصدي اثنين مدير عام!

أبو إسماعيل : آه كيف بدنا نتجاوز التسلسل الوظيفي؟

كيف

أبو عدنان : ابدأ، لازم نتحمل المسؤولية، ونطلب رقابة علينا !

\*\*\*

أبو ماضي وجمعة متقابلان

أبو ماضي : اسمع لما بصلك بريد بتمرر لي إياه

جمعة : وانت كمان

أبو ماضي : وقبل ما تبعته، بتمرره على الجهاز الأمني

جمعة : والحواجز ما تنساش الله يخليك

أبو ماضي : لازم ما تنسى انه أنا وياك صرنا الحال من بعضه

جمعة : أنا وياك واحد

(ثم ضاحكاً)

جمعة : تيجي نقسم القمر

أبو ماضي : أنا نص وأنت نص

: أهلا أجمعة نص مدير عام

: أهلا أبو ماضي بيبك النص الثاني

جمعة : ايش رايك يا صاحبي أنا مش عاجبني قصة مدير عام مؤسسة

أبو ماضي : ايش اللي مش عاجبك في الموضوع؟

جمعة : يعني عام وعامة، يا زلمة بدنا اشي خاص

أبو ماضي : آه يا ملعون فهمت عليك

جمعة : يعني لو قلنا مدير خاص للمؤسسة العامة، بنختلف عن الناس لأنه الشغلة

مالها طعمة هيك

أبو ماضي : وألا مدير عام المؤسسة خاصة

جمعة : يعني رايك انه أحسن، خاص وألا خاصة؟

أبو ماضي : يا زلمة سيبك من الشكليات وفكر في المصلحة الخاصة

جمعة : كيف؟

أبو ماضي : هات نشوفلنا طريقة نرتب فيها بربوزال

جمعة : يعني أن جي أوز؟

أبو ماضي : اشي زي هيك، وبدل ماحنا متقاتلين على اشي مش حرزان، خلينا نتفق

على الاشي الحرزان

(يرن جرس السكرتيرة على الخط)

سوزان : الأستاذ أبو زياد وصل

جمعة : مين أبو زياد؟

السكرتيرة : عضو المجلس الأعلى

جمعة مرتبكاً : ايش؟

(ويعطي السماعه لأبو ماضي)

أبو ماضي : خليه يتفضل

يدخل الرجل ويسلم ويسأل : مين المدير العام؟

(جمعة متردداً وأبو ماضي متردداً)

أبو زياد : مين فيكو؟

كلاهما : احنا المدير العام

أبو زياد (متعجباً) : هيك مع بعض؟

(وينفحص الأوراق ثم يسأل)

: مين أبو ماضي مين جمعة؟

ولا ينتظر الرد

: في عنا مخاطبات بتوقيع جمعة ومخاطبات بتوقيع أبو ماضي.

(وكأنه مستغرب للفكرة)

: وكيف الشغل ماشي؟

جمعة : احنا بنحاول نعمل شغل

أبو ماضي : وبعدين بنفكر كيف نمشيه

أبو زياد : وكيف انتو شغالين مع بعض

جمعة : على بركة الله، على فيض الكريم

أبو ماضي : سيرى فعين الله ترعاك

(يجلس ابو زياد ثم كأنه يقرأ)

: التقارير بتقول انه الوضع مزري والمشاكل متفاقمة، وعشان هيك المجلس الأعلى

أخذ قرار بوضع المؤسسة تحت الوصاية

أبو ماضي وجمعة معاً : ايش يعني

أبو زياد : يعني أنا بدى أظل معكو هان في المؤسسة، أتابع العمل بنفسى, عندكو

مانع ؟

كلاهما معاً : ابدأ، أهلاً وسهلاً، بنقسم المكتب ع ثلاثة.

أبو زياد (محتدأ) : ايش بتقولوا، انتو مجانيين، ايش بنقسم ما بنقسم، عمركو شفتوا

سيارة سايقها اثنين وألا ثلاثة؟ وبعدين هو الموضوع، موضوع وجاهة وألا مسؤولية؟

وبعدين مين قال المدير العام أهم من المراسل؟ المهم كل واحد يقوم بعمله، كما يجب،

والمراسل القايم بشغله أحسن من المدير العام اللي مش قايم بواجبه، انت مدير عام، وهو

مدير عام وهي مدير عام وكل واحد بده مدير عام، ليش يعني؟ والمؤسسة هادي مش

مؤسستكو، مش بتعيشوا انتو وولادكو وعيالكو من وراها، ولازم تحافظوا عليها؟

جمعة (بأدب) : يا سيد ابو زياد يعني هو أنا بعرف أكون مدير عام، وألا كان في

بالي، ما أنا طول عمري مراسل، بعمل الشاي والقهوة، زي الفنية، ويقول موظف

وحامد الكريم، بس الشغلة صارت زي اللعبة .

أبو زياد : لعبة .. أه لعبة .. لعبة والنتيجة؟ لازم كلنا نحس بالمسؤولية، كل واحد في

مطرحو بيسوى وفي غير مطرحه بهدله، مش بس إله، وللناس والمؤسسات كمان، تعالوا

حطوا ايدكو في ايدين بعض, مدراء وموظفين ومراسلين، عشان حالنا كلنا يتعدل ويصير

منيح، وعشان نطمئن على أولادنا، يعيشوا أحسن من ما عشنا .

جمعة ثم ابو ماضي : ياالله، لعيونك يا ابو زياد  
(ثم بقية الموظفين جميعاً, يضعون أيديهم في أيدي بعضهم) لتسدل الستارة

**انتهت**



جنون العظمة

## وصف للمسرح

يوجد مكتب على يمين مقدمة المسرح، مع كرسي دوار، وعليه جهاز هاتف، ومحارم فاين، مقلمة، ويوجد في الزاوية جهاز تلفزيون، كذلك طقم كنباتات، وتوجد ثلاجة صغيرة، فيها زجاجات ماء وكولا، شيكولاتة، وتوجد مرآة كبيرة (يلاحظ خلال العرض انه كثيرا ما يقف أمامها بخيلاء، يتأمل هيأته)، كذلك هناك صورة له كبيرة الحجم معلقة على الجدار، وهناك رشاش مخبأ في درج المكتب.

كذلك يوجد غاز صغير، حيث هناك مرطباتات قهوة وشاي وسكر وعسل، خلال العرض، يقرمش شيبس، ويشرب كولا، ثم يعمل قهوة وشاي ويشرب . كما يدخل السيجار،،

يضع نظارة سميكة، وله انف عريض (مكياج) وهو رجل في مطلع الستين !

عسكري / مدني :يرتدي زيا مضحكا، قميص عسكري وبنطلون مدني (برمودا مثلا) .

تتم تهيئة القاعة على أن هناك شخصية عظيمة، تقترب من دخولها، يمكن لبعض الأصوات، أو العاملين أن يقولوا :

-هدوء، افتح الطريق ... لو سمحت . مع إضاءة مناسبة، ثم موسيقى عسكرية، حتى يدخل كجنرال كأنه يستعرض حرس الشرف.

تفتح الستارة مع دخوله الخشبية (تماما)، يستدير نصف استدارة للجمهور، ينظر إليهم، يؤدي التحية العسكرية، ثم يتجه إلى مكتبه، يضع الباريه، يذهب لمرطبان العسل، يتناوله، ويضع الملعقة فيه، ثم يأخذ ملعقة عسل

-اها هيك ع الريق، خلينا نصحح، هو في ناس وصفوا لي حبة البركة مع العسل، لفيت البلد كلها، ما لقيت، وصيت عليها من برة، وهيني مستني، بلكي خلصنا

من هالفاخ (يتحسس كرشه)، ومن الروماتزم وكركبة المفاصل.

ثم يتحسس رأسه، يكتشف صلغته، وانه قد كبر في العمر:

-أربعين سنه خدمة؟ ايش يعني؟ والله لما أموت، ما هم الناس بدهم هيك . أسيب البلد لمين؟ للفوضى؟ وألا للصيغ؟ كل شويه بطلع لي ولد هان، صلوك هناك . قال ايش بده تغيير، والله اللي بتتنفس لافعصه فعص .. بس ولا نفس.

أربعين سنة، عيني ما غمضت، وإلا ايش؟ هي بتيجي بالساهل؟ الناس بس إليها الظاهر، دايمًا بيشوفوا من الآخر، كيف صار وكيف جرى ما حدا بعرف، على العموم هيك أحسن.

يجلس على مقعده، يدق على الجرس تحت سطح الطاولة، وين المرافقة، السكرتيرة، الموظفين، ايش في اليوم، وينادي بأعلى صوته:

محروس، ولك وين القهوة، أخ مالهم اليوم، ايش في؟!

ويتناول ملفا ملقى أمامه، يبدأ بفتح واستعراض ما فيه .

يتناول ورقة - :

ايش؟ طلب ترقية؟ عملت لي إياها عادة .. بفكروني مش عارف اشي وألا نايم على وداني، على طول؟ أمبارح قدمت لي تقرير عن تنظيم شبكة سرية، هه هه، على الأغلب العملية مفبركة من حضرتك، طيب ماشي..

يتطلع إلى رتبته:

-ما دام كله تحت هالرتبة، ما فيش مشكلة.

على العموم هادا المقدم يحيى مثال الانضباط والطاعة، أنا متبعه من لما كان ملازم صغير . (هه .. هه) ما بعرف غير حاضر سيدي .. أمرك سيدي . ياما اختبرته، طموحه محدود وأحلامه صغيره، لا والله ما أحلاه ويكون غير هيك.

يرن التلفون، يرفع السماعه:

-مطعم ايش ياخو؟ اها، مين اللي حجز عندك، اهو مهو أنا كل يوم عزائم، غديات وعشيات، وكله بحسابه، القصة معروفة، حكّ لي لأحك لك، اليوم غدا وبكرة، يا بيبك والله خجلانين منك، ما إلنا غيرك، بدنا خدمة بسيطة بس، في قطعة أرض بدنا نعملها استراحة، ايش بدنا نعمل، كله في خدمة الوطن، ويا ريت الناس بتقدّر، إلا عينها فارغة، وما منهم غير الحسد، يعني أنت سيد العارفين، تسجيل وهات ورقة من المحكمة ومن البلدية ودائرة الأراضي، كله تضييع وقت، الصيف قرب، وبدناش يعني الناس ما تلاقي مطرح تشم الهوا فيه ... طيب ماشي، بس أنت عارف الشباب بدهم تحلاية،، ولو، تكرم عينك يا بيبك!

يضحك من أعماق قلبه، يلا بيبك بيبك،

يخرج من جيبه صفارة، ينفخ بها ويصفر، كما لو كان هناك جنود أمامه، يقف ويخاطبهم

-أجمع، كله يجمع، للخلف دور

طول عمرنا للخلف دور، والله اللي عمره في يوم بيغلط وبيقول للأمام دور، لأعتبر أمه ما جابته، (يحك رأسه وكأنه يفكر) طيب للييمين دور

-اها يعني هادي ممكن، ثم ينط كمن لدغته أفعى، لا ولا هادي كمان، مستحيل، لا للأمام ولا للييسار .

\_طابور، استرح، يلا كله عالمهجع.

يجلس على الكرسي، يتأفف ويمسح العرق

-أوووووف، كل يوم هيك، يعني كان لازم هالعسكر؟ تقول في حرامية بالبلد،

بيكفي شرطة، يتلفت يمينا ويسارا (بيبدو مرتكبا) شكلي خرفنت أنا ولا أيش؟! !

يفتح التلفزيون

نسمع لنا شوية أخبار لنعرف ايش بيصير في الدنيا

-ما زالت الحرب مستمرة في أفغانستان، حيث قذفت الطائرات الأمريكية موقعا يعتقد انه لحركة طالبان، فيما أعلن في بغداد عن تفجير مسجد في الأنبار،(خلال النشرة يقوم بتمسيد شواربه وهو ينظر بنهم للمذبة) وتقول المصادر الأولية أن ما لا يقل عن خمسين قتيلًا سقطوا،، يغلق الراديو،،

-أما سمّة بدن، وبين ما نروح حرب وقتل واكل هوا، ما في استراحة محارب يا

خي؟!!

-بس يخرّب بيت اهلك من مذبة!

تدور الموسيقى راقصة يقوم بخلع رتبته العسكرية ويتناول عصا ويبدأ في الرقص

بعد أن تنتهي وصلة الرقص، يجلس متعبا على كرسي، ويتناول كوب ماء.

سقا الله على أيام النضال الثوري في بيروت والقاهرة، آخ على أيامك يا تونس،

(ويتذكر)

ما أهبلني كاين، أول وحدة ملّعة شوي شفتها، قال ايش حبيتها، بدي أتجوزك،

ههههه، أول ما سمعت الكلمة، شخت ع حالها من كتر الضحك، في حدا بتزوج بنت

ليل؟!!

شكلي سكرت من أول كاس (يتطلع لكوب الماء) يمسكه ويتأمله :

لا ما عاد شربنا غير المي!

واللي زاد الطين بلّة، ايش؟ قال رحّت اطلب إذن من العميد أبو الرز (يتوقف قليلا،

أه صحيح هم ليش سموه أبو الرز، من كتر ما كان يحب المناسف ويلغ رز ولحمة، لما

كرشه صار طوله مترين ههههه)، منيح إني طلبت منه أذن، ومنيح انه الشغلة ظلت



له، اليوم ما في، الزلزمة صفدي، والله يا دوب بنحصل الراتب، ناشف، لا حوافز ولا إضافات ولا حتى ساعات إضافية، هههههههه، تحرير فلسطين يمر عبر التقشف!  
يغلق الموبايل ويلقي به متأففا، ثم يجلس على المكتب، يفتح الدرج، ويخرج اليوم صور،

يرن الموبايل،،

-وبعدين، مالهم استلموني اليوم، يرد، ابوة، نعم، مين، أبو صالح؟ أبو صالح مين؟  
ابن عمي، اها، اهلين يا ابن عم، أوامر، جارك، ماله؟ مزودها عليك؟ أبعث اثنين عسكر  
يخوفوه؟ حاضر حاضر غالي والطلب رخيص، مبدكاش اشي كمان، اسكر لك محل  
السوبر ماركت اللي جنبكو ليكون بيضارب عليك، وألا أحط لك حاجز على مدخل  
الشارع، ما بدك حراسة على البيت.

يتطلع إلى صورة زفاه

-ياه، صاروا عشرين سنة، والله ما بنكر انك شخلعتيني، جددت فيك شبابي، لكن  
هلكتيني، ما خليت جريديس في البلد، ولا سلطان إبراهيم، حتى السكنبله شطبتناها، وآخر  
متاخر، حولنا على الفياجرا (ينطقها هكذا بتفخيم)، ويا دوب طالع معك براس، يخرب  
بيتك، دايم مولعة نار، تقول بتفطر شطة وبتتعدى لفلل وبتتغشى بهار، مش أكلها من  
أكلي، يا سيدي العمر اله أحكام برضه، والزمن صار غير، جيل، أعوذ بالله منه، فاتحها  
غربي...

يرن الهاتف:

اها بنت حلال والله، لساتني عمالي بتفرج على صور عرسنا، حبيبتي، (يبعد  
الموبايل عن أذنه) كما لو كان سمع شيئا غريبا، ايش بتقولي :حلمة ودنك اقرب لك من  
هالحكي، ولك مالك مصبحة تهاتي مهتاه، وتحكي شروي غروي، حلمانة بإشي؟  
يسمع فجأة صوت إطلاق رصاص، فيختبئ تحت المكتب، لحظات ويدوي انفجار،

يملاً المسرح غبارا ودخانا، يخرج من تحت المكتب وهو يرفع منديل (كلينكس أبيض):

يتكلم وهو يرتجف:

-ايش فيه، هو إحنا ما في فكة يعني عن الحروب، وبين ما رحنا بنلاقيها قدامنا، مين هجم على مين، يا خوفي أموت قبل ما أترفع، هي ظلت شحطة واسكر الرتبة،

(يقوم بتنظيف رتبة العميد، اها كمان وحدة وبصير لوا) يفخم صوته اللواء الركن المتقاعد، لا شو متقاعد هاي من وين اجت لي؟! العميد الركن، اوووف عميد شو، حكينا ظلت لنا رتبة ونسكر الطابق، اللواء الركن، المهيب المنيب المريب، شو مريب، يضرب وجهه بقبضة يده،(يقول وهو ينظر في المرأة) أنا عارف من وين بجيب هالحكي، لحتى أنغص علي حالي عيشتي، أنا عارف كانوا يقولوا عني البسة ماكله لساني، ايش صار لي ولساني صار فالت، تقول إني كاين محوش كل الحكي أربعين سنة، وطلع معي مرة وحدة!

يضحك (كمن يتذكر شيئا): كله بالأقدمية، وكله بناء على الولاء والطاعة، واحترام النظام، وألا ايش يعني، عمل إلنا أبو الغضب شيخ منصب، وقال ايش بده تتحدد الرتب بناء على معطيات (يمط الكلام بلسانه) ومحددات ومقومات ومدري ايش، طيب زي ايش يعني، قال اكمن صهبوني قتلت، بأكم عملية شاركت، اكمن دورة عسكرية اخدت، نتائج التقارير العسكرية، والمهمات والمسؤوليات، طيب واحد متلي من وين بدو يجيب هالحكي، أنا اسألني اكمن طنجرة طبخت، أكم صحارة بندورة جبت، أكم طاولة سفرة جهزت، شوفوا تقارير الإدارة والمالية، أنا شوية وكنت طباخ الرئيس - آه طلعت زكريا يعني - وإلا هو الجيش كله عسكر؟ مش في دكتور وفي صيدلي ونجار وخياط وطباخ - مثل حضرتي - وإلا هذول مش بني أدمين.

بعدين تعال هان، هي الدنيا تشقلبت فوقاني تحتاني وألا ايش، مش في اشي اسمه ابن عيلة وناس، ومش في - زي ما بيقولوا مواهب، هيك خلقه الله، هيني طول بعرض، ابن عيلة (يتدارك بالقول - مع انه كل الناس أولاد ناس وكل الناس خير وبركة)، (يشمشم بأنفه) وبشم ريحة الفلافل عن بعد 2 كيلو، مالها الفلافل؟ أحلى سندويش فلافل لأخوك

أبو العبد، الله وكيلك مش الفلافل بس، حاسة الشم قوية، صحيح النظر مش ولا بد، والسمع تفل، والركب بترج، والظهر مخلع، لكن بشمها من بعيد، قبل ما تصل بكثير، مش كان لازم يسلموني المكافحة وألا الجنائية، أه زي أبو كلبشة، مش هو الختار بجلالة قدرة، نقبني بابو مناخير (يتحسس أنفه الكبير باشمنزاز)، ويومها قال لي اسمع، لولا انه إحنا ثورة، وما عنا حبوس، كنت نقبتك أبو كلبشة . أنا من أيدك هاي لأيدك هاي أخ أبو عمار، وحملت المجروفون، بالروح بالدم نفديك يا أبو عمار !يا فلسطين يا فلسطين، كبير والله مثلك ما جابت النسوان .

يجلس على طرف خشبة المسرح، ويتربع

-طيب وإحنا ليش بدنا نبعتها ونقربها، نطولها ونقصرها، مش ياما جيوش انهزمت من ورا بطونها، كيف انهزم ثعلب الصحراء - رومل - وليش أكلو هوا نابليون وهتلر في روسيا، مش بيقولك طرق الإمداد، وألا حتى للي متذكر معركة بدر، لما الرسول محمد (يطول الحكى هنا) صلى الله عليه وسلم، وزيدوا النبي كمان صلاة، وكمان صلاة، أمر بردم بير المي، حتى صاروا المشركين يرموا حالهم في مضرب سهام المسلمين وهم راكضين وراء نقطة مي.

يعني ما تنتشاطر علينا يا أخ أبو الغضب الله لا يغضب عليك، والله يرضى عنك ويرحم والدينا ووالديك، ولا تخلي الغضب يعمي لك عينيك، ههههه حلوة هاي لو سمعني كان طخني!

يطلب على موبايله أرقام، ثم يتحدث :

ولك وينك يا سعيد، من الصبح برن عليك وما بترد، مش بيكفي إني اجيت عحالي واخذت تاكسي واجيت اليوم مواصلات، وقلت بلا ما اصحيك بدري، طيب بعد الدوام ومشغل تاكسي المؤسسة عمومي، قلنا ماشي، خليه يطلع له قرشين يسلك أحواله فيهم، أحسن ما يسرق من السلطة، أما انك تصير تيزنس بساعات الدوام، لا هيك تخنتها،،، (يصمت قليلا، ثم ينفجر):



وما لحقت مية القهوة نشفت وكنت واقع على بوزي طب.

بيدأ يقلب المـج ويتطلع فيه، اعوذ بالله، شو هالفال، طريق طويل وعر، كله شوك ومطبات، وفوق منه طير جارح اسود، اعوذ بالله، غراب، فال الله والا فالي (ويتفتف في عبه) .. لا يكاد يكمل الجملة حتى تجيئه رنة رسالة على الموبايل.

يقرأ، نعم نعم، دعوة خلع، يا غراب البين، نروح نضب حالنا أحسن، صارت النسوان تخلعنا، وتحلف علينا بالطلاق، ناقص تتجوز علينا اتنين وتلاتة واربعة، طيب يا ناهد، والله لو آخر يوم بعمرى لأفش غلي كله فيك.

خلينا نفتح هالفيسبوك، نشوف ايش فيه، مين طلق، مين تجوز، مين صبح ماكل فول على هالصبح، والأهم انه ياكل فول مع بصل، واول ما يشوفنا هاتك يا بوس، تقول صبحنا مشتاقين لأهل ابو اللي خلفه، الواحد صار حاسس حاله نايم في الشارع، الله وكيلك، ما في وحدة مخليه عن جهدها جهد، حاطة كل مكياج الدنيا، وهاتك يا نفخ خدود وشفافيف لما صاروا براطيم، واشي محزق واشي فوق الركبة بمتر، واشي ملهلب، وبدك ما يحطوا هالشباب المكبوتين الفين لايك وستمية تعليق، وطابور على الخاص،،

أيش عيد ميلادي، والله صح، ايش اليوم (بيحلق في الموبايل) اشوف التاريخ، اه والله، 2015/11/10، يعني طبقنا اليوم الستين؟ يا رب تعين!

كل سنة وانت طيب يا عمو

كل عام وانت بخير يا بيك

عقبال المية سنة (مية سنة، ليش ما تخلوهم الف، والا بلاش خليهـم عشرين سنة، هو احنا بدنا نكبر والا نزرغ، مية سنة قال، مستعجل يا حبيبي، هياها قربت، عشرين سنة زمان، والله اعلم، والسلام عليكم ورحمة الله وبركاته)

يفاجئه صوت ماسج على الموبايل



اجيت، كل اهل البلد صاروا قرايب ونسايب وجيران، واللي مش قريب كاين بصفي وكاين انا واياه قاعدين على بنك واحد، وقال ايش، متذكر لما اخدت مني القرش لتشتري حمض حلو، هالقرش هذا دفعني بداله اكثر من الف دينار، وين كل هذول اليوم، هيك كله في لحظة، بح

(يقول الكلمة بتضخيم حتى يسمعها كل من القاعة) ..

يهدأ قليلا، يضع يده على خده ويجلس على الخشبة،

واحنا ليش نقربها ونبعدها، اخوتي اولاد امي وابوي بطلوا يسألوا، كنت من زمان بقول الناس بتجري ورا مصالحها ما حدا صدقني، وانهم برقصوك طول ما انت واقف، واول ما تقع هات يا سكاكين، اذا ابني اللي من صلبني، مش عارف وين هو، والا بنتي اللي من دمي ولحمي، باعته لي على الفيسبوك، كل سنة وانت طيب يا بابا، وكله كوم، وناهد ستميت كوم، مرتي اللي كل ليلة بتنام في حضني، في لحظة باعته لي طلب خلع، هذي كاينة متجوزة رتبة، والا كرسي، مش بني آدم من لحم ودم،

بدي أحكي ليش من الصبح الدنيا صايرة غير شكل، مشقلبة رأسا على عقب، حاسس حالي في بلاد برة، ما حدا بيتصل، ولا حدا بيدق الباب غير الزبال وغير تبع المطعم وكل واحد إله حساب بده ياخده قبل ما الله ياخذ وداعتك يا أخ (ينظر الى صورته المعلقة على الجدار)، يذهب الى الصورة، يقف أمامها، يؤدي لها التحية دون حماس، سحبوا الكرسي من تحتك، (يقوم بانزالها من على الجدار ويشقلبها)، وقعت على ظهرك طب وما حدا سمى عليك، هي هيك، مع الواقف، تفو، عليك من عيشة ! (في نفس الوقت يضع الصورة على المكتب).

يمج نفس سيجارة عميق،، على اي حال أنا بستاهل، من الأول على هيك تعودت، وعلى هيك عودتهم، كان اللي بيضحك في وجهي بشلحني اواعي، واللي بيجاملني بياكل بعقلي حلاوة، انا بستاهل، من الأصل كنت وهمان بالحف والزف، ولا فكرت لحظة، انه راح يجي هاليوم،،، ويصير كله بح، كل هالزبد يروح، وما يظل الا

الصاحب اللي ما إله مصلحة ...

بستاehl، انا بستاهل، مليون مرة بستاهل،

ينظر الى نفسه في المرآة

هم لولا شوية هالشيب، ما تقول تغير علينا اشي، رشاقة وحيوية وقوة، بس كمان لولا هالسكر اخو الشليئة اللي طمّع فينا المرة وبطلنا نقدر نقول لها كخ، ولا تلت التلاتة كم، هو يعني بس لولا شوية هالضغط، كان لقيتني كل يوم بركض الصبح رياضة، وباخدها من المنطار لشط البحر، يا سلام عليك يا ابو الشباب، يعني هو لولا شوية هالزهايمر، يعني صرنا ننسى من كتر ما شفنا ياخو، كان كل شي تمام، لا وخبرة يعني كل اشي على أصول، وعال العال .

بصراحة أنا مليت من حالي، أربعين سنة وأنا لابس الكاكي وعايش ميرري وحاطط هالرتب، ورافع هالشوارب، عنتر زمامي، مش ديك وناقش ريشه!

أربعين سنة راكب ومركوب، حاضر سيدي، اشخط وامخط هههههههه.

بلاوي زرقة بهالعجب، والسبعة وزمتها بهالجيب،، (يرفع الصورة من على المكتب وينظر إليها)، تفوه على هالشكل (ويبصق بوجهه)، ثم ينزل للقاعة حاملا الصورة، انت تف عليه كمان، بلكي ربك غفر لنا، وانتي كمان، تفو على هالشوارب، تفو على هالمنظر،،

يقوم هو بإطفاء الضوء على المسرح، ثم يغلق المكتب، وينزل الستارة، ويجلس على حافة الخشبة، ويضع يده على خده لمدة 5 دقائق، في إحاء أن العرض انتهى.

-خلص هيك، ضبيننا الدفتر، وين نروح؟ ع التقاعد، ايش يعني، ملجأ عجرة، وألا نكتب مذكرات، وألا اللي إله حفيد يمسكه من ايده ويوديه المدرسة، وألا ايش بدك يا كنتني من السوق، بندورة، خيار، بصل، طيب هاتي السبت، وألا اللبس المريلة وأقعد في الدار اجلي صحون وأساعد في شغل البيت!؟

ثم يبدأ بالصراخ، ولكو تفو على هيك ناس ويؤشر على ذاته، لو ما تفتتوا علينا،

بنزل راكبين على ظهوركو، ولو صح لنا ما بنوفر نسوانكو، ثم يسرع إلى المكتب  
ويتناول رشاشه، ما بدكو تفوا، طيب خدوا، ويبدأ بإطلاق النار على المتفرجين، موتوا  
أحسن الكو والي، يلعن أبو اليوم، اللي شفنا حالنا فيه عليكو، ثم يطلق النار على  
نفسه، ويقول: هيك أحسن، سامحونا، بلكي الله سامحنا!

عمان / الأردن

10 / 11 / 2015

# مفہی الإبداع

المسرحية من فصلين:  
الأول / في الكوفي شوب  
الثاني / على بوابة المعبر

الشخصيات 3: فتيات "مغنية ورسامة وجرسونة"، 3 شباب "شاعر وملحن وجرسون"، "رجلان" مدير المقهى ورجل أعمال" + (للمشاركة الخارجية فني صوت وفني إضاءة) .

الديكور (في الفصل الأول - يافطة مكتوب عليها "مقهى الإبداع" في أعلى مقدمة الخشبة، 3 طاولات، واحدة وسط المسرح، والثانية على يمينه والثالثة على يسار المسرح، التي في الوسط عليها كرسي واحد والأخرى على كل واحدة كرسيان) لوحات فنية تزين الجدران، كذلك هناك كاشير (مدير المقهى)، مع كوة تدل على المطبخ.

## الفصل الأول

في الكافي شوب

تفتح الستارة على مقهى كوفي شوب، على الجدران معلقة لوحات، وهناك "الكاشير" يجلس عليه المدير، وهناك جرسون / شاب وجرسونة فتاة، وهناك طاولتان، واحدة على مقدمة يسار المسرح، يجلس إليها شابان، واحد شاعر والثاني ملحن، يبدو أنهما يقومان بإعداد أغنية، يتم تسليط فوكس الضوء عليهما، فيما تكون هناك على يمين مؤخرة المسرح الطاولة الأخرى، تجلس عليها فتاتان، واحدة رسامة (تبدو كظل لكنها ترسم) والثانية مغنية (يبدو أنها تستمع بتمعن لما يندن به الملحن والشاعر، وتردد الغناء معهما)، لكنهما يظهران كظل، لأن عليهما إعتام . ثم شيئاً فشيئاً، يقترب منهما الضوء لنرى المغنية تنسجم مع الأغنية وتأخذ بالغناء ثم الرقص فيما زميلتها تصفق لها .

(الإضاءة تملأ المسرح)

علي يا علي يا بتاع الزيت

غيرك يا علي أنا ما حبيت

قلي يا علي أمك في البيت

في عرسك يا علي رقصت وغنيت.

علي يا علي يا بتاع الفول

حبيبي يا علي والله لتقول

بحبك يا علي عرضين وطول

لاقيني يا علي على باب المول.

علي يا علي يا شفير الباص  
بحبك يا علي بصدق وإخلاص  
ويقولوا يا علي ما يقولوا الناس  
بحطك يا علي تاجن ع الرأس.

علي يا علي تعالى لي تعال  
قلبي يا علي بغني موال  
حبك يا علي على راسي شال  
وأنت يا علي دايم ع البال.

لا تبعد يا علي عني وتغيب  
والفكر يا علي يودي ويجيب  
أنت يا علي يا أغلى حبيب  
تعالى يا علي نلعب طرنيب.

علي يا علي يا بتاع الورد  
حبك يا علي أحلى من الشهد  
أبوسك يا علي بوسة ع الخد  
واحفلك يا علي أبقى ع الوعد.

بعد أن تنتهي الأغنية ينتقل فوكس الضوء إلى زاوية البنات، تقول الرسامة

-ايش رايك، حلوة الأغنية، مش هيك

-آه كثير، بتجنن

-طيب ليش ما تغني معه

-مين قصدك هذاك الملحن

-آه وألا مين بقصد يعني.

-لا بستحي، شو بدني أقول له، بدني اغني معك، هيك من غير مقدمات .

-طيب أنا بروح له واحكي له

-لا يا هبلة أوعك، بيشوف حاله بعدين، وهم أنتين وإحنا تنتين، بيفكروننا بنتحركش

فيهم وانه صرنا تبعهم.

إعتماد عليهما مع فوكس إضاءة على الشابين

الشاعر - ايش رايك أنا مقتنع كثير باللحن

الملحن - وأنا كمان

الشاعر - طيب متى مفكر تسجل؟

الملحن - مش عارف، الشغلة بدها تفكير، بدها مصاريف، أستوديو وأجور تلحين،

مزيكاتية، وبروفة، مواصلات وأكل وشرب، على الأقل يومين تلاتة .

الشاعر - لا أستوديو ولا ما يحزنون، كلها يوتيوب وخلصت الشغلة

الملحن - كيف يوتيوب؟ ما فهمت.

الشاعر - يا رجل مثل ما كل الشباب بتعمل هالأيام، الواحد وهو قاعد في البيت

بسجل لحاله وينشر على يوتيوب، وأنت وحظك، في ناس بتسجل مكاملة موبايل

وبتنشرها وشوف مية ألف مشاهدة .

الملحن (مندهشا) -معقول؟ طيب والصوت مش بدني حدا يغني؟

الشاعر - أو حدياية

الملحن (ضاحكا) آه مهى أصلا الأغنية لمغنية بنت يعني مش شب .

الشاعر يحك رأسه

تنتقل الإضاءة للبنات

تظهر الرسامة وهي ترسم لوحة، فيما الأخرى تنظر إليها وتضع سماعة الموبايل

على أذنيها

يدخل على الكوفي شوب رجل أربعيني، يبدو انه رجل أعمال، متأنق، (يصفق

بيديه)

وينك يا معلم، يجيئه الجرسون راكضا

ويسحب له الكرسي، منتصف مقدمة خشبة المسرح

\_تفضل يا أخ، طلباتك

\_ طلباتي ههههه، شيشة بحريني، وايش في عندكو

\_ شاي، قهوة، نسكافية، ليمون، مشكل فواكه، عشاء كل اللي توامر فيه حضرتك

\_ هات لي شيشة، وهات لي من كل اشي عندكو، عينة - يقولها كهذا بتأن وبيبط

(ضاحكا، بمزح معك) مع فنجان قهوة تركي مزبوط

ويجلس واضعا ساقا على ساق.

ينتقل الفوكس على الشابين

الشاعر - اسمع مش إحنا رايعين المهرجان

الملحن - يفترض

الشاعر - ايش يعني يفترض

الملحن - يا زلمة قول إن شاء الله، كله تساهيل.

الشاعر - طيب المهم، مش هم تبعين المهرجانات عندهم إمكانيات

الملحن - حسب

الشاعر - حسب ايش

الملحن - حسب المهرجان، يعني دبي بتفرق كتير عن قرطاج

الشاعر - اووووووة لا قرطاج ولا دبي، إحنا رايعين المغرب، وأكد المهرجان

بيصور العروض.

الملحن - طيب وايش يعني

الشاعر - يعني، عرضنا بتصور، وأغنيتك كمان، بناخدها بعد هيك وبننشر لك إياها

على الفيسبوك ويوتيوب.

-الملحن يهز رأسه

يتابع الشاعر - ومين عارف مش يمكن تعجب حدا من تبعين الفيديو كليب ويعمل

معك عقد وتبطل تتطلع في خلفنا

يحتضنه هنا ويقول له :له له يا صاحبي، مش أنا.

ينتقل الفوكس إلى رجل الأعمال الذي يكون قد بدأ يدخن، والدخان ملأ المكان.

يكون قريبا من البنات، تبدأ المغنية بالسعال، ثم تبدأ الأخرى بالسعال

تقول المغنية :ايش هاد، الدخان ملأ المكان.

الرسامة :تنادي بصوت عال :انت يا استاذ، وبين مفكر حالك، ايش هالدخان

لا ينتبه ولا يرد

البنتان تذهبان اليه:

انت لو سمحت، خفف شوية من هالدخان

يشير باصبعه إلى نفسه

انتو بتنادوا علي أنا؟ أنا الأستاذ، آه طبعاً، أنا الأستاذ وليد، أي خدمة يا حلوات؟

الدخان، الأرجيلة، لو سمحت، ينشأ جدل بين البنات ورجل الأعمال،،

بتصل ع الشرطة هه،

اتصلي طيب لأشوف مين بده يرد عليك، وحتى لو ردوا، مجرد ما يعرفوا أنها

مشكلتك معي بتصير مشكلتك معهم ههههههه

مين مفكر حالك حضرتك، وتبدأ بالاتصال، تشعر بإحباط،

-ما في رصيد للأسف

وليش للأسف، كل الرصيد عحسابك، قديش بدك عشرة عشرين خمسين، خليه

خمسين، ماشي قديش الرقم ويبدأ بإجراءات التحويل

رقم شو؟

رقمك

نعم نعم كمان شوية بتقولي ايش اسمك؟

اه ايش اسمك

محسوبك وليد، ابو خالد (يتوقف ثم يتابع) أبن الوليد، ههههه-

هبة؟ منى، سارة، حنين، تسنيم؟

لا هيك كتير يا حضرة لو سمحت،

ولا تزعلي، حاضر هيني قعدت مطرحي، أرجل أحسن لي

رجعنا للأرجيلة؟

على راسي من فوق، انت يا جرسون، تعال، شيل شوية من النار، وابعدني شوي

عن البنات.

يقوم بجر طاولته وكرسيه ناحية الشباب

يدخن ويملاً المكان

يبدأ الملحن بالسعال، ثم الشاعر،

اوووف ايش هذا، انت يا اخونا، عامل مدخنة، شو قاعد لحالك،

من بعيد، يشير إلى نفسه

مين أخونا؟ أنا؟ يا أخي الملافظ سعد، يا ولد انت واياه شايفيني بلعب معكو جلول

يعني، لا يا أستاذ، يا حضرة، يا عم، ولا حتى يا مختار، هيك يا أخ خبط لزق؟ !

انتو مالكو، أنا وبين قاعد وألا وين واقف وألا حتى وين ماشي، مش كوفي شوب

هاض، ومش فيها اراجيل، هو أنا قاعد بجامع وألا بدار أبوك انت وهو

يجيئان اليه

يبادره الملحن : لو سمحت، خفف شوي

يرد عليه :كيف اخفف يعني، اشفط نص نفس، وألا اشمها ع الريحه، ولا ايش رايك

أروح أدخن في الحمام

يقول الشاعر :شكلك بتتريق علينا

يرد - مهو كلامكو مش معقول،

يتصايحون :انت اللي كلامك مش معقول

انت ما عندك منطق، يا أخي حريتك تنتهي عندما تبدأ حرية الآخرين

نعم نعم، يا جرسون، شو هالكوفي شوب تبعكو، حاسس حالي في مدرسة، الشباب

من وين؟ طلاب جامعة؟ ولا طلاب مدرسة

احترم حالك، ايش خصك انت

يحضر الجرسون على عجل، وتحضر الجرسونة وكذلك مدير الكافي.

يا جماعة هدوا حالكو، ايش في، اهدوا شوي وبنحل لكو المشكلة،

البنات هناك تراقبان .

هو يتدخل ويخاطب مدير الكافي :يا أخي احتجوا البنات أبعدنا عنهم شوي، ما  
خلصنا من الإخوان، وين نروح بهالأرجيلة يعني؟ ننزل على الجمهور، ويقول  
للجرسون، هات ايدك معي، يلا نزل الطاولة على الصالة (يخرج من بين الجمهور هنا  
أحد ما ويقول - لا لو سمحتوا بنسيب لكو هالمسرحية وبنروح).

ينظر إليه المدير، ويقول له اقعد و ارتاح انت بس، ويخاطب الشباب :لو سمحتوا  
ارتاحوا على طاولاتكو.

ويطلب من الجرسون :هات لي كرسي يا ناصر

ينظر اليه :حقك علي أنا، لا تزعل ولا تاخذ ع خاطرك، دخن وعلى حسابي، نورت  
المحل يا رجل.

يبدأ في هندسة ملابسة :من ذوقك بس يا أخ، هي الناس اللي بتقدر . أتفضل اقعد  
معى، خلينا نتعرف على الناس الطيبة  
المدير - أخوك أنيس مدير المقهى  
رجل الأعمال - آه المخرج يعني،  
يضحك أنيس ويهمس له :احنا على الخشبة يا وليد، مش بالبروفة، تفضحناش، احنا  
قدام الجمهور.

يتلفت وليد :هه والله، يا زلمة ايش بتفرق يعني، أنا ما بحب اخبي اشي، المهم، حاول  
تتذكر معى، احنا ما التقينا قبل هيك؟ !

المدير :وين بدنا نلتقي يعني، انت اجيت عنا هان قبل هيك

رجل الأعمال :الله وكيلك أول مرة، وبصراحة مش عارف يمكن تكون بعد هالفصل  
آخر مرة.



لا تغلظ، دوري مهم كثير، أنا (ويلعب أصابعه) أنا الممول، المنتج!

اها، ينشرح بال المخرج،

والله فكرة، طيب منيح، بننقق، وليكون بدك بروبوزال؟

ايش البربوزال هذا؟ لا ما بدي منك اشي، غير يكون لي دور، أشارك في

المسرحية، يعني تحطني على الخشبة لو تلزقني لزق .

المخرج (على مضض): طيب ماشي، بنشوف لك دور (يخفض صوته كأنه يحدث

نفسه حتى لا يسمعه) ثانوي.

رجل الأعمال: اتفقنا طيب بس ظل في شرط

المخرج: من أولها بدينا نتشرط؟

رجل الأعمال: اه، لا تجيب لي سيرة طخ، وحرب، مقاومة، انتفاضة، بدنا حب

بحب، بدنا مسرحية تشخ من الضحك، خلي الناس تنبسط، وتنسى حالها شوية، والا

ايش رايك

المخرج - يعني بنفق معك لكن مش مية المية

رجل الأعمال - طيب يا سيدي نتفق 90 المية 80 المية

المخرج - اها المهم تكون مسرحية جادة

رجل الأعمال: يعني ايش؟

المخرج - يعني تبيض الوجه ونطلع فيها برة ع المهرجانات وهييك اشي

رجل الأعمال - يا سيدي مهرجانات مهرجانات، والله فكرة، وبطلع معكو هه، بدي امثل،

يا عيني خليني ازبط سمية الخشاب، وألا حورية فرغلي، بيقولوا الممثلات في تونس

والمغرب غير شكل.

ينتقل الفوكس الى البنات

المغنية للرسمية: صحيح هالحكي اللي سمعته

ترد عليها صاحبتها :اه صحيح

تقول المغنية :هو انت عارفة عن ايش بسأل

الرسامة :آه عارفة، هو احنا يا سماح لسة بدنا نعرف بعض، مش بتسألني عن  
المهرجان المسرحي

المغنية :صحيح، والله جد راح نشارك، ونطلع برة (بفرح شديد)

الرسامة :قولي ان شاء الله

المغنية (تنظر الى ناحية رجل الأعمال) :معقول، هذا (باستهزاء) هو اللي زبط  
الشغلة (تذهب له الأضواء، ليظهر عليه الزهو)

الرسامة :أنا عارفة، باين عليه مهم، معه مصاري.

تنتقل الكاميرا إلى المغني والشاعر

الشاعر :يلا يا حلو حضر حالك، باين عليها حتروق وتحلا

المغني : بس لو انها مش عن طريق هذا ابو ارجيلة (ينظر إليه رجل الأعمال  
بعتب)

الشاعر : يا رجل ما محبة إلا بعد عداوة، اعتبره مثل ابوك، مش ابوك بأرجل يا  
حسام

المغني (على نياته) :اه بأرجل، ليش؟

في الحين يدخل المخرج (أنيس) مدير الكوفي شوب ويده فاكس، وهو يرقص  
ويغني

بكرة السفر، بكرة.

تهرول له الجرسونة :ايش فيه يا استاذ شايفتك فرحان

ينظر اليها ويتابع غناه

تلح عليه :استاذ استاذ، عشان خاطري، احكي لي، اجت الدعوة

يلوح لها بالورقة، ويقول

وبكرة السفر بكرة

حينها تفن زغرودة

فيما ينصب المخرج الدحية

و يبدأ الجميع بالغناء والرقص.

\*\*\*\*

## الفصل الثاني

### على بوابة المعبر

صالة المغادرين، شباك الجوازات، كراسي جماعية، الممثلون مع شنطهم  
ولابتوباتهم.

يمكنون ثلاثة أيام على بوابة المعبر

في اليوم الأول -

رجل الأعمال: جوازاتكو يا شباب وهوياتكو كمان، وفوقهم خمسين شيكل.

ينظر إليه شذرا مدير المقهى: نعم، ايش اتفقنا ياخو

يرد رجل الأعمال: بمزح معكو يا زلمة، اه اتفقنا، انتو ما بتعرفو اشي، خلو كل

الحمل على ظهري، "ويضرب على رقبتة " هذه سداة.

(هنا يعطيه الملحن والشاعر والجرسون والجرسونة والرسامة جوازاتهم، فيما تبدو

المغنية تبحث في شنطتها)، ينتبه المدير لها.

فيقول: ايش في يا سماح، لتكوني نسي تي جوازك في البيت.

يعلق رجل الأعمال قائلا: اه مهو اللي مش كاره يا ناره

ترد الرسامة: أنا عارفة، عملت الجواز وانتهى وما سافرت، وهيني جدته من سنتين،

وان شاء الله هالمره أسافر . وتذهب إلى عند صديقتها، تأخذ منها شنطة اليد، وتدلق كل ما

فيها، يظهر هنا ماكياج واحمر شفاه، زجاجة عطر، وأشياء أنثوية، ولا يظهر الجواز.

من بعيد يعلق رجل الأعمال حين يرى محتويات شنطة المغنية: حطي كالونيا حطي

جاتوة

يقترّب رجل الأعمال من المغنية : ايش صار يا بنات، ما بين هالجواز؟  
تقول الرسامة للمغنية :لا تتلبي فتشي منيح، فتشي في جيايك، بعد وقت تكون قد  
وضعتّه في جيب البنطال الخلفية، وحين تخرجه، يفرح الجميع قائلين :الحمد لله اخيرا !  
رجل الأعمال يأخذ جوازات سفرهم، ويذهب الى الشباك، فيما هم يجلسون على  
مقاعدهم، يتحدث الى من في الشباك، اها هيهم كل الجوازات والهويات والرسوم، عد  
المصاري على اقل من مهلك . ثم يذهب ويجلس جوارهم.  
يغنون وقفوني على الحدود، ويتهجون، ونراهم على وفاق، ينتظرون، فقط يتحدثون  
بالجوات، (إعتام) نراهم ينامون على المقاعد، ويتغطون باشيائهم، ثم يحلمون بانهم  
في مطار القاهرة، يطيرون ثم يصلون المهرجان حيث الجميع يحتفي بهم.  
(هنا لابد من الاستعانة بالصوت في الليل، ويمكن استخدام البروجكتور لإظهار  
الأحلام، كذلك الدخان)

في اليوم الثاني – (إضاءة) نرى بعض التوتر، يصلون معا (هنا المخرج يقيم  
الصلاة والمنتج يؤمهم، والنساء تصلي في الخلف)، ثم يعودون للجلوس على المقاعد،  
كل منهم يتحدث في الجوال، أو يقوم بإرسال الواتس أب،  
يذهب رجل الأعمال إلى الشباك ويعود  
المدير يسأله :ما في أخبار  
يرد عليه ضاربا كفا بكف :كله بيستنى  
(إعتام) ينامون فيحلمون بانهم قد اجتازوا المعبر في الباص.

في اليوم الثالث – (إضاءة) يظهر عليهم التوتر، نراهم يتناولون الطعام (سندويشات)  
يقضم الملحن لقمة ثم يضع الساندويش، كذلك تفعل المغنية،  
تقول لها صديقتها :كملي اكلك يا شيخة كلي  
ترد عليها بحزن :ماليش نفس

فجأة ينادي الشباك:

ر هف

تذهب الجرسونة، وتعود بجواز سفرها بيدها حزينة

خالد

يذهب الشاعر ويعود بجوازه في يده يقلبه باستهزاء

وليد

يذهب رجل الأعمال، يتناول جوازه ويدسه في جيبه دون ان يفتحه

سلمى

تذهب الرسامة وتعود بجوازها

حسام

يذهب الملحن، ويعود وهو يلوح بجوازه، ويقول لصاحبه: ايش بدى فيه ايش اعمل

فيه، ويضحك بشكل هستيري: قال جواز سفر قال

سماح

تذهب المغنية وتعود بصمت

أشرف

يذهب الجرسون ويعود وهو يضع جواز سفره على صينية

ويقول ساخرا: واحد جواز سفر وصلحه

أنيس

يذهب المدير: ليسأله رجل الأعمال: والحل

يضحك المدير ويقول له: عمرك شفت جواز سفر، بس من غير سفر

فيرد عليه: جواز مش للسفر

تعتم الخشبة، ونسمع موسيقى حزينة، ثم نرى على يسار الخشبة، سلمى تصيح وهي تمسك بالألوان، يلعن ابوكو، يخرب بيتكو، وبين ما كنتو ومين ما كنتو، وتهم بتكسير أقلامها فتمسك بها صديقتها: هدي حالك، فيذهب لها رجل الأعمال ويقول:

لا مش احنا

يذهب الفوكس إلى يمين الخشبة فنرى الملحن يلوح بالعود، حيث يهم بتكسيه وإلقاءه بعيدا يحضنه صديقه ويمنعه ويأخذ منه العود ويقول: يكون حمار إذا عمري بافكر ألحن وألا اغني، نروح ننظم أحسن إلنا.

يقترّب منه المخرج ويقول له: مش الفلسطينية اللي بتيأس يا حسام

يقترّب وليد ومعه البنتان ويقف إلى جوار أنيس ومعه الشابان، وتأتي رهنف وأشرف، يقفون صفا واحدا، فيقول المدير أنيس:

لا بد إلا ما تفرج، عمر ما سجن سكر على حدا

يقول وليد: ولا يهمكو، والله ليجي يوم ونفتح ابوه، لا مش بس المعبر، والله لنفتح البر والبحر والجو عليك يا غزة

يتابع المدير قائلا: وراح نعرض بالقدس والضفة، غصبن عن أبوهم

يقول وليد: وعد والله، لو بروح فيها أستشهادي، لارتب لكو العرض في جنين ونابلس والقدس . احنا شو

يردون جميعا: فلسطينية يابا، والروح وثابة

يبدأون جميعا بالغناء

"فلسطينية يابا

والروح فينا وثابة

مين اللي يجيي علينا

بندوقوا العذابا" .

فلسطينية والنعم  
منا اللي غنى ميجانا  
منا اللي غنى عتابا  
هاتو ايديكو في ايدي  
لنصطاد الساحابا .

"فلسطينية يابا  
غلابة فتح غلابة  
كل من يجي علينا  
ابنعمله كبابا " .

فلسطينية يا عالم  
بنغني ع الربابة  
مهد المسيح بينادي  
من جوة القدس للبابا

"فلسطينية يابا  
والروح فينا وثابة  
كل من يجي علينا

بندوقه العذابا"

الله وهبنا الشهادة  
لنجاهد ونعلي كتابه  
الله متفضل علينا  
بمسرى نبينا ومحرايه

"فلسطينية يابا  
والروح فينا وثابة  
مين النا بعدك يا الله  
غير محمد واصحابه"

هذا عدوي يا خويا  
سگر علي البابا  
لكني من طرف السما  
نطيت ع ظهر الدبابة

"فلسطينية يابا  
وروحنا وثابة  
واللي بيحي علينا  
بندوقه العذابا".

يلا تعالو يا الربع  
لنشق الأرض وترابا  
نفتح ابواب لأهلنا  
ونفرح غزة وحبابا.

فلسطينية يابا  
فلسطينية يابا.

عمان - الأردن

27 / 11 / 2015

لمشاهدة المسرحية على يوتيوب

<https://www.youtube.com/watch?v=9R-LCJnPbhQ&app=desktop>

<https://www.youtube.com/watch?v=WCqgO7XpC-0&t=1149s>

# تاء التانيث

مونودراما تقدمها ممثلة



الفكرة (فتاة تقوم بعملية تصحيح الجنس لتجاوز حالة الاستلاب في إطار أسرتها والمجتمع الشرقي، وبعد أن أصبحت شاباً، خرجت إلى الخارج حيث تمتعت بحرية كانت مفتقدة، بذلك لم تعد بحاجة إلى أن تكون رجلاً .. تحن لحالتها الأولى كأنثى) ... (يمكن الأستعانة بالاسلايدات، او المناظر، حيث نرى لوحة المعبر، المطار، باريس،، وكلما حضر المشهد الخاص بمكان محدد تقوم الممثلة بالتوجه للوحة، او يقوم فني الأضاءة بتسليط الفوكس على اللوحة المحددة، لتحدث معها وعنهما الشخصية) .

تفتح الستارة على (علي) يقف أمام المرأة، يضع على وجهه الصابون، ويبدأ بحلاقة ذقنه .. يتأمل المرأة فرحاً:

-يا سلام، ما أحلاني هيك .. وينك يأمه لو تشوفيني، كنت طوالي رحتي جبتي لي كالونيا .. نعيما يا بني .. عقبال ما تحلق للعروسة .... (يضحك) .. ما أنا طول عمري ..حلو (يمس على شعره) ... لما كان شعري طويل، كنت افرده على كتافي، يسخسخوا أولاد الحارة .. واللي يغني يا طير يا طائر .. و اللي الشعر العجري المجنون..

بس وينهم اليوم؟ والله اللي بيتجرأ على حرف واحد لافعهه (يتأمل عضلاته).

يمرر يده على خده . كل يوم بحلقها 4 مرات ومش راضيه تخشن، أبوي كل شوي ربي شواربك يا علي . اللي بدري بدري واللي ما بدري بيقول كف عدس . هي لو كان فيها زيت لضوت يا حاج .. ولا يهملك يا بني .. اصبر شوي وكل شي بيصير عال العال

..

عجل يا أبو عبد الله عجل بحاله؟ تذبح لي عجل لما طلعت بالسلامة؟ هادا كيف لو ما كان عندك ولاد .. فرحان يا عمي .. وأم عبد الله هاتك يا زغاريت.. تحدف اللحم على الناس تقول ماري أنطوانيت، أي لما انولدت ما دبطني جاجة .. لما أشوف لما أتجوز

بدكو تدبخوا كمان عجل وألا تخلوها على قد صرصور (مطبخ يبيع المناسف بغزة) ويمكن تضل على قد المطبقيات والسلام.

بس وينك أنا كنت معنتر .. أه مين قدي كنت حاسس حالي أبو زيد الهلالي . مروح ع الحارة شاب، طويل .. عريض بشوارب .. هه .. هه .. (يزبط شواربه المستعارة)

(تسمع موسيقى: أهلا وسهلا باللي جاي، تذكر بعودته من المستشفى للحارة) مش هادا المهم يا حجة .. يتنحج .. صوتي اللي مش راضي يخشن ايش أسوي فيه؟ .. دخن طيب .. دخنت، أرجل أرجلت .. ما ضل إلا يقولوا اشرب حشيش؟ !والله الحاج ما عنده مشكلة .. مستعد يعمل أي شي بس الموضوع يزبط زي ما بده..

(إعتام، ثم فوكس على الشاشة حيث تظهر صور أوراق ومعاملات وأختام) أسهل أشي كان الاسم بدل علي .. كل الفرق حرف .. كان تاء تأنيث شطبناها للتذكير بس ... وانتهت القصة .. معقول؟ قول بدت القصة .. لو كان اسمي جهاد وألا نضال أو حتى كفاح ما كنا تغلبنا بينفع هيك وبينفع هيك .. يعني ع الوجهين وما كنا احتجنا لا معاملة ولا نحلف يمين ولا نجيب تقارير ولا يحزنون .. ع كل حال نحمد الله اللي ما كان سعاد وألا وداد كان علي صار علي وبس .. كيف لو كان خديجة ايش كان بده يصير؟ خديج هاهاهاها وألا نوال؟ دلال؟ .

(تفتح هنا الموبايل وتنظر إلى صورة صديقتها) وتخطبها :

دلال؟ وين أيامك يا دلال؟ تعرفي اشتقت إلك يا مقصوفة الرقبة . كل يوم ترني علي .ولك ما شفتي صلاح؟ لا ما شفته .. أنا مالي وماله يعني عشان جارنا بدي أضل اتبع أخباره وألا أراقب فيه .. عشان خاطري حبييتي .. وتعملي ألف حجة لتيجي عندي كل يوم، اعز صاحباتك أنا .. مش لله كله عشان عيون أبو الصلح

الله يخرب بيتك يا دلال ضليت تجري ورا الشاب لما خرب بيتك .. والله ما أنا عارفة ايش بدك تسوي في هالمصيبة اللي صارت معك من وراه، والله لو اهلك يعرفوا كان دبحوك وصرت في خبر كان . يقطعك ويقطع سيرتك .. هو أنا كنت راح اسلم من

## مسرحية تاء التأنيث

وراكبي؟ ما كان أهلي موتوني من الضرب، ولك ايش لامك على بنت زي هاي؟ طبعاً  
راح ينسوا في لحظة إنا جيران ومتربين في حارة وحدة .. المهم .. السمعة العاطلة زي  
النار في القش، ما أسهل تولع أنت مصيرك الدبح وأنا بضل ببيت أهلي .  
بس الواحد يقول الحق انك بنت عفريته .. عمري ما بنسى لما تحجبتني؟ صارت  
تصلي .. أهلها وكل الناس ما شاء الله والله دلال بنت مكلمة .. ومن غيري أنا اللي  
سرك عندي ما اعرف ايش السبب وألا أنت طالعة منقبة .. وبين لما من طرف لسانك  
...هه يخرب شرك يا دلال .. ولك معقول؟ آه والله كنت معه في المطعم واخوي مش  
بعيد عنا طاولتين بس وما عرفني.

(إعتماد على جزء من الخشبة وفوكس على جزء يظهر المطبخ)

(تضع المريلة على وسطها وتقوم بدور الأم)

الأم تنتظر ابنتها التي تأخرت عن العودة من المدرسة

:مالها بس عليا تأخرت صار له جرس الرواح ربع ساعة رانن، ما هي بنتي وأنا  
عارفاها، بتظلمها تطق حكي مع البنات، مش ع البيت عدل، بتقرص هادي وبتنكت  
لهادي، بتتغنج مع هادي، يووووة شو بتحب المزح واللعب .

تتابع وهي تكنس أرضية المسرح :أول ما توصل بترمي الشنطة، تقول حمل  
وحاطط على ظهرها :يامة تعبانة بدي أنام، تنام عليك حيطه، الغدا ما بستني، ع المطبخ  
عدل، أبوكي زمانه جاي وبدو يتغدى، يلا ايدك على ايدي، تعالي ساعديني.

أنا عارفة :لما تتجوز هالبننت مين بدو يساعديني، أخوتها كلهم صبيان، وبين ووين  
لندبر مهر عروسة عبد الله، وبين ليتخرج ويلاقي شغل، على قد ما أنا نفسي اليوم قبل  
بكرة يجي لهالبننت عدلها، على قد ما أنا هاكلة هم شغل البيت.

(إعتماد على مكان الأم، فوكس على المرأة، مع موسيقى هل عندك شك)

(تنادي على البننت) :ولك يا علية حطي لك شوية مكياج، شوية روج، مشطي شعرك  
منيح، لقطي حواجبك بدل ما همه مثل المكمنة بوجهك . أنا عارفة هالبننت تقولوا حسن

صبي.

(تعود إلى هينتها وهي ترتدي كاجوال / حسن صبي) وتظهر أمام المرأة تمشط شعرها وهي رجل .

يخرج دخان من وراء الكواليس، فتنادي:

يمة الحقي طبيخك شاط، وتضحك الله يرحم ايام ما كنت اقف على رجلي في المطبخ بالساعات، اطبخ واجلي واغسل، بس احب ما علي كانت ريحة الأكل والتقلية، وشو كنت احب اشوف الدخان طالع من الطنجرة مثل مارد علي بابا، شبيك ليبيك، وكنت اشوف الدخان واتذكر السجاير، اه السجاير، كنت احب دخان السجاير، ومن جواتي اتمنى لو اقدر ادخن لي سيجارة، شو بنت وتدخن، يا ويل اهلك.

بتذكر لما امي بدت تخطب لأخوي عبد الله، كانت قاعدة مع ابوي، مجرد قال لها ايش رايك ببنت اخوي أبو جهاد، ايش بتحكي يا زلمة، بدك ناخذ سلوى لعبد الله؟

ايش بتحكي انت يا مرة، انت ناسية انها بنت اخوي

وانا ما بعيب فيهم، الظفر عمره ما بطلع من اللحم، بس هم حياتهم غير حياتنا، شو غير حياتنا، غير حياة كل الناس، الله منعم ومتفضل عليهم من زمان، وعابشين مدنية.

(الأب): والبنت مديرة بالسلطة، وقد حالها.

اه هي قد حالها بعقل، مش بكفي انها لا منقبة ولا محجبة، يا زلمة مش بكفي انها بتشرب سجاير، اعوذ بالله.

ههههه دخن عليها تنجلي، والله وطلع لي شوارب ودقن، وبادخن، مين كان يتخيل، احنا الفرق عنا بين البنت والشب، مش عشان النسل وبس، عشان مية شغلة وشغلة، ممنوع البنت تركب خيل ولا تركب بسكليت، ايش طيب، قال بخافوا على بكارتها، وعيب عليها تسوق سيارة لحالها، ليش، قال لو بنشرت وهي بمنطقة مقطوعة وين بنروح، واذا دخنت سيجارة بتصير مسترجلة، واذا تاخرت بالليل بتكون عاهرة، واذا حبت بتتنطخ .

## مسرحية تاء التائيث

مش بعيد كمان مية سنة نلاقي جنس البنات انقرض من بلادنا هههههه، مين عارف انا باسمع انهم صاروا في الصين يقدروا يتحكموا بجنس الجنين، اكيد عنا كل الناس بدهم ولاد، وهيك بيصيروا ما يخلفوا إلا ولاد، وممكن البنات كلها تغار مني، وتصير تحول يابا، وهات يا هرمونات، ومش عيب البنت تصير شب، شو عيب، هاد يوم المنى، واعوذ بالله الشب يصير بنت، لو اهله ما دبجوه والا استعروا منه، ما راح يقدر يعيش يومين على بعض، ما راح حدا يتجوزها، ولا راح حدا يقبلها تشتغل معه، ولا راح تعرف تمشي في الشارع .

(إعتام، ثم إضاءة تظهر علي وهو بجوار النافذة جالس)

يرن جوال علي:

هلا حبيبتي، انت وين مشتاق لك، والله طيب لحظة . ثم يفتح النافذة

ويضحك من اعماقه

أول مرة تيجي أمي وتشوفني بحكي مع بنت الجيران من البلكونة، ضحكت

وقالت :والله يمة حنان حلوة وشاطرة، واهلها جيران الهنا، بتحبها يمة، اروح

اخطبها لك.

أحبها يمة، اخ منك أخ، وتخطبها لي، نسيت الصيفية اللي فاتت لما كنت بدك

تخنييني، ومعطت شعري، لما دخلت علي الأوضة وكنت يادوب روحت من المدرسة،

ويا دوب شلحت المنديل عن راسي، وبدي اغير مريول المدرسة، الا وانت داخله علي :

ولك ايش هاد، بشعرك والشباك فاتح، افرضي حد شافك، ايش نقول بعدين لأبوك

واخوتك، ولك مش عارفة انت انه اليوم اي ولد ممكن يصورك بجواله، وركضت مثل

الغولة على الشباك تسكره.

يمة انا شو بعرفني، ما انتبهت انه الشباك فاتح، بعدين انا وين والشباك وين؟

لازم تنتبهي ما بودي بستين داهية ألا التوهان وعدم الأنتباه، ديرني بالك يمة، عرض

البنت مثل عود الكبريت، واليوم صورة على فيسبوك بتسبب مشاكل الها اول وما الها

آخر .

(إعتماد مع إضاءة نجوم توحى بأن الوقت ليل)

يؤذن لصلاة العشاء، تقول حتى الصلاة، البنت بتصلي عشان ابوها واخوها وامها بفرضوا عليها، الشب لو ما بده يصلي ما حدا بفرض عليه ولا حدا بفرض عليه يطلق لحيته، لكن البنت، كل اللي في البيت الذكور لو كان فيهم ولد عمره 7 سنين من حقه يؤمرها، وكل النسوان اللي اكبر منها، امها طبعا وخواتها وخالاتها وعماتها كلهم الهم عليها أمر، بفرضوا عليها تنتقب وتتجيب، حتى في بنات عمرهم اقل من عشر سنين ولبسوهم حجاب .

المهم، طبيعي البنت علاقتها بالبيت مع امها، نادرا ما بحكي معها ابوها اكثر من كيف حالك يابا، محتاجة اشي يابا، واصلا لو بدها اشي بتطلبه من امها، الأم في البيت مسؤولة عن البنات، البنات ما الهم طلعة برة الا مع الأم، والولاد لأنهم شباب بطلعوا مع ابوهم في المناسبات خاصة، في الأعياد والزيارات والتعازي .

مجرد رحت للمستشفى هذالك اليوم عليا ورجعت علي، تغير كل اشي بحياتي، بعد صلاة العشا ما شفت ابويا الا وبنادي علي، يابا يا علي روح البس وحضر حالك تروح معنا انا واخوتك لنعزي نسايبنا دار ابو محفوظ، في عندهم عزا .

انا متعود اطع مع امي، وطول عمري علاقتي مع امي، بعرف تفاصيل شخصيتها اكثر من ابوي ههه، وهي كانت بتحبني كثير وما بهون الها في، وصارت تحبني اكثر لما صرت شب، يلا متلي مثل كل الناس، مهو كل زلما بشوف حاله باولاده واخوته، قال شو عزوة .

(تبقى الخشبة شبه معتمة، فقط فوكس اضاءة على شفتي الممثلة، وأمامها اللابتوب) مشكلة مهمة كثير واجهتني، بعد ما تركت عالم الأنوثة والبنات، خسرت صاحباتي، جاراتي وزميلاتي بالمدرسة، حتى قريباتي، بنات عمامي وعماتي وبنات خالاتي واخوالي، كلهم صاروا يطلعوا فيّ ويخلجوا، ما أنا وأنا بنت كان عادي يعني اعرف متى بتيجي

## مسرحية تاء التأنيث

للوحدة الدورة، أو هي ميالة لمين، أو بتحلم في مين، كمان بنات ونسوان الحارة، صاروا يخلجوا مني، يعني تقول انه التحول صار في المحيط كله، وكل العالم النسوي كان نفسه يطلق علي النار، على اعتبار اني باعرف اسرار عنهم ما يعرفوها الرجال . المشكلة انه ما عاد الي صاحبات، واخوتي لسة مش متعودين علي، ولا قرابيبي، والأهم كيف بدى الأقي اصحاب، واصلا اللي بعرفوني من قرابيبي وجيراني، مترددين، كأنهم لسة مش مصدقين اني كنت بنت وصرت شب .

(هنا تظهر لوحة لكافي شوب، فيما نراها تجلس على كرسي وامامه طاولة، وارجيلة)

أول مرة أروح فيها على الكوفي شوب، قلت أخذ لي نفس أرجيلة، مع فنجان قهوة سادة، حطيت اجر على اجر، شوي واجى الجرسون :أؤمري حضرتك، (يخاطبها كما لو كانت بنت)

شو؟!!

أنا أسف تفضل حضرتك

لا ما بدى شي، وحملت حالي وطلعت.

وين ما أروح تقول الناس مفكراني بنت ومتنكرة بلبس رجال، أو عاملة حالي زلمة . كيف ممكن الاقي لي صحاب، ما في غير الأنترنت،، تقوم بفتح اللابتوب، وهات يا فيسبوك

يجد عشرات التهاني بمناسبة عيد ميلاده

كل سنة وأنت طيب يا قمر، سنة حلوة يا عسل، العمر كله يا رب.

ياه كلهم 23 تهنئة، سقا الله على أيام ما كنت بنت، كانت تصلني خمسمية تهنئة

ههههه اليوم كلهم 23 تهنئة، ومن مين، من صاحباتي تبعات زمان

كنا وإحنا بنات، نحتفل بعيد ميلاد كل وحدة فينا، ونظل نرقص ونغني ونهيص،

نغير جو يعني، الشباب ما بعرفوش عيد ميلادهم، طيب ليش، قال الاحتفال بأعياد الميلاد للأولاد الزغار وللبنات .

هي مرة عملت فيها الحفلة أول عيد ميلاد يمر علي من لما صرت شب، اجوني صحابي، اللي جايب لي مصاصة، واللي جايب لي لعبة، واحد جايب لي عروسة، عمري ما بنسى (هنا تتغير لهجة علي لتتحول إلى الأسى) عصام اللي كنت اعتبره اقرب صديق إلي، جايب لي علبة مغلقة وعليها وردة وراس قلب، استغربت، لكن مجرد فتحتها، رميتها بوشه، شو هاد ولا، علبة ماكياج؟

قال شو عشان تتذكر أيام زمان يا حلو .

ومن يومها حرمت اعمل عيد ميلاد . هو أصلا يوم ميلادي كان يوم تعيس، من أول يوم ولدت فيه، بدت معاناتي مع هالجنس الغبي .

(تسمع صوت زفة في الشارع، متزوقيني يا ماما قوام يا ماما دة عريسي حياخدني

قوام يا ماما)

يخرب عقلك يا سارة، الليلة دخلتك، الله يستر بس ما يكون سامي معزوم على فرحك، ولا تشوفيه بطرف عينك، أكيد عريسك واقف جنبك مثل الطحش، مبسوط بعروسته بنت 16 سنة، قال شو بربيها على أيديه، مش عارف أنها كانت دايبة دوب في غرام الولد سامي، أقولك اعقلي يا سارة، تقولي بحبه يختي بموت فيه، ولك حب ايش، إحنا لسة زغار على هالحكي، لا زغار ولا أشي يختي، صار لنا سنتين بتيجينا الدورة .

هيك تخليني اسمع زفة عرسك وأنا في الدار، ما بدك أتعرف على جوزك ههه، ليش ما عزميني يا سارة، أخص عليك، أنسيت أيام الصحوبية، من أول ابتدائي وإحنا سواء، قال شو، أنا صرت شب، كنت صاحبتها زمان، هلقيت ايش تقول الناس، معقول البننت تصاحب شب، بعدين بأي عين بدي أشوفك، ولك كنا مفتوحين على بعض، كل أسراري عندك، وكل اسرارك عندي، ومش هيك وبس، ياما حضنا بعض، وياما شلحنا اواعينا

قدام بعض، وياما لبسنا من بعض، متذكرة لما اجيتي لعندي وكنت بتحمم، دخلت علي الحمام ودعكتي لي ظهري، لك كنت تلبسيني السوتيان، بأي وش ممكن أشوفك هلا وأنت شب، أصلا ما كان من حقك تصيري شب من غير ما نوافق أنا وميرفت .

(تغير لهجتها وتحدث بلسان أمها)

يا الله يما شد حيلك اشوفك بنت الحلال

بنت حلال شو، مش لما أشوف مستقبلي

بصراحة هاي أحلى شغلة انك تكون شب مش بنت، البننت من 14 سنة ببداوا يفكروا يجوزوها، والشب ما بفرضوا عليه، خاصة لما يكون زواجه على حساب أهله .

حببت أسايرها وامزح معها، وسألتها طيب لو قلت لك آه، شو بتعملي

بدور على جاراتي وقريباتي أشوف بناتهم، طيب أنت ايش رأيك بصاحبائك تبعات

زمان

ههههههه، مين يعني؟

سارة اللي عرسها اليوم، آخ يما لو تعرفي سارة كانت متعلقة بسامي، وتظلمها تبعت له بوسات ع الهوى وماسجات، وهو ظلو وراها لما فتحت له كامرا الموبايل، وشافت منه لسنسخت.

وألا ميرفت يا عيني على ميرفت، كانت كل يوم جمعة تروح شارع عمر المختار، عشان تقابل معتصم، يشتري لها سندوش شاورما، ويطلعوا بالتاكسي مع بعض، ومرات يروحوا على خانيونس، على شط البحر يحلموا .

وألا دلال اللي كانت تنام وتصحى وهي تحلم بصلاح أفندي، وشاغلتنى معها .

مين يما من صاحباتي، كلهم كانوا يحلموا بحدا موجود أو مش موجود.

على كل حال أنا لو فكرت بوحدة فيهم، ممكن تكون بنت خالي فدوى، لكن بخلوها

تستناني.

ما صدقت الحجة سمعت هالكلمة وراحت طوالي على دار خالي، بعد نص ساعة رجعت عيونها مليانة دموع، قال شو ايش بتحكي يختي أجوز بنتي لشب كان قبل شهرين بنت؟! !

(يسمع صوت في الخارج) ينادي :

علي يا علي، يلا اطلع ومعك البسكليت بدنا نروح على خانيونس سبق..  
ينظر من النافذة طيب نص ساعة وباجي، روح لك مشوار، وألا أقولك أنا برن عليك جوال

(وفي هذه الأثناء يدخل علي وراء الكواليس ويخرج بالبسكليت ) ضاحكا  
مش قلت لك يمة إنني خايف يجي عليك يوم وتندمي إنني صرت شب  
تف من تمك يمة، معقول والله ولا عمري، يمة البنات همها للممات، الشب وين ما  
راح وين ما اجى بظل سند لأمه .

طيب يا حجة الأيام بينا، وبدت الطلبات والمصاريف  
يمة بدني حق باكيت دخان، أول مرة خود يمة، ثاني مرة أنت لحقت تخلص الباكيت،  
تالت مرة مش يمة لو تخفف أحسن لصحتك، رابع مرة، والله يمة ما معي، استنى لما يجي  
أبوك أخذ لك منه،

يمة بدني بسكليت،

وماله يمة استنى لأول الشهر لما أبوك يقبض من عيني هاي قبل عيني هاي  
يمة بدني عدة حلاقة، يمة بدني اتعشى شاورما، يمة بدني أروح مع صحابي مشوار،  
يمة بدني مصروف يومي، يمة بدني وبدني وبدني، يمة بدني أسجل بنادي كرة القدم،  
وبدني ترنج رياضة وكورة وشنطة ومواصلات .

ورحنا على خانيونس، وظلينا على شط البحر لنصاص الليالي

## مسرحية تاء التأنيث

صحابي روحوا وأنا ظليت أتجول في الشوارع للفجر، ياه كان من نفسي من زمان، ما أنا ظليت محبوسة 16 سنة، كنت لو غابت الشمس وأنا بالمدرسة تقوم الدنيا وما تقعد، اليوم هيني لطلوع الفجر، وحتى رنة جوال ما رنوا علي، معلوم ما أنا صرت شب، ما بنخاف علي . ههههه

(يرن التلفون):

أبوة مين،، لا أنا علي، مين علياء، لا مش أختي، مين اللي أعطاك الرقم، سارة، أنت جوزها، لا أخوها طيب يا اخو الشليطة، ههه عفوا قصدي يا اخو سارة شو بدك، تتعرف على علياء، بدك تخطب، حكك لك أختك إني منيحة وبناسبك، طيب شو رأيك إني صرت شب، بنفع، وألا أنت مش مثلي، روح سلم على أختك يا اخو أخته، اوووة. كل يوم من هالموال، إذا كانت بنت ولقت شب بتقعد تتغنوج عليك، بيكون صوتها ولا أحلى ولما تواعدها بتلاقي شكلها بخزي وشو بدها زواج من أول كلمة مرحبا، وإذا كان شب ولقاك بنت بقعد يسبل لك صوته تقول عبد الحليم، وهو اخو شلن، وعند ما تقول له تعال رسمي بهرب، بده يظل يحب افتراضي، أنا عارف إحنا ليش معقدين من الجنس كل هالقد ...

(تسمع رنة موبايل داخل القاعة)

تتدخل الممثلة وتقول :يا إخوانا مش حكينا سكرنا جواتكوا، لا تشوشوا علينا، لا تخربوا علينا شغلنا، هيو راح مني التركيز، نسيت شو بدني أحكي، شو بدني أقول، ذكرني يا مخرج، أحنا وين كنا بالحكي،، احكي لكو، ناخذ استراحة شوي،،

(فاصل كسر الحاجز بين الخشبة والجمهور . ترتسم على ناصية الخشبة مقولة :من تحب أن تقول شو نفسها تعمل لو فجأة صارت شب بعد ما كانت بنت، تتصل على هذا الرقم،،)

(هنا يمكن أن نضع رقما مغلقا، على أن يكون هناك 4-5 فتيات متفق معهن بالقاعة للاتصال بالرقم الحقيقي الموجود على الخشبة أمام الممثلة، ومربوط بالسيكر، أو أن

يكون الرقم حقيقياً، وان تكون مشاركة الفتيات عفوية) .

وحدة وحدة، كل ما تفصح واحدة من الجمهور عن رغبة مكتوبة، تقوم الممثلة بأدائها على خشبة لزيادة التأثير والتعليق عليها بشكل كوميدي، إلى أن نصل إلى من تقول بأن أول شي راح تعمله لو صارت شب، هو أنها تسافر.

هنا تقول الممثلة، ما أنا سافرت، عشان أحقق رغبة وعشان أكمل علاج، ومن أول ما طلعت بالسيارة اللي بدها تاخديني ع المعبر، سألني الشوفير، وين رايح يا أخ، حكيت له ع المعبر، قصدك على رفح، لا مسافر برة، واصل المعبر، اتطلع في منيح، وقال : لحالك.

اوووف شو شايفني ولد زغير ولا بنت،،

(تطفأ الأضواء ويسمع صوت طائرة، نرى الممثلة تجلس على مقعد بالطائرة)

تغمض عينيها وتتحدث كما لو كانت تحلم :معقول يا ناس انا بالطيارة، انا اللي كان ابعد ما باحلم فيه هو اني اروح طشة ع البحر، انا اللي كنت باحلم اني اروح مصر والال الأردن قبل ما اموت، كنت باحلم حلم ازور رام الله او القدس، ساعتين واكون في فرنسا، حدا يقرصني يا ناس، ولحالي، الله واكبر، بالطيارة لفرنسا مرة وحدة، والله خايفة يصير معي اشي، شكلي نمت بالمعبر وعمالي باحلم، خليني اقرص حالي طيب. لا والله شكله القصة جد، وبحق وحقيقي، كيف راح انام الليلة، برج ايفيل، والشانزليزية،

الحرية والمساواة، معناته على هيك، لو بنات بلادنا يعرفوا قصتي، ما فيهم وحدة راح تظل بنت، كلهم راح يبداوا فوراً ياخذوا هرمونات ليصيروا شباب، هههههههه .

(هنا يمكن اللجوء الى مؤثرات صوتية ومرئية توحى بانها في الطائرة، مثل ما تفعله المضيفه من أشارات السلامة، او ما يقوله الكابتن عن ارتفاع وسرعة الطائرة،،)

تضاء الخشبية، فنراها تحمل شنطتها داخل كافي شوب، ونراها تلبس ثياب فتاة.  
تتحدث بالحوال :ايوة يمة، انا منيحة كل اشي تمام، هيني باشتغل، اه جرسونة بكافي، ههههه، طيب مثل ما بدك جرسون، طبعا الشغل مش عيب، هذا للشب، لكن للبنت شو ما كان الشغل عيب وخطر وبفتح عينها وبلهيا عن شغل البيت وعن اولادها وجوزها، مع السلامة.

تفاجأ بدلال تطلب منها أضافتها على الفيسبوك، ومجرد ان تقبلها تقوم بالتحدث معها:

إلحقيني يا علية، هههه ولك انا علي، بيكون احسن، علي الحقني، اهلي بدهم يجوزوني، وانت عارفة شو صار معي، اه عارفة، شو ممكن اعمل لك، تجوزيني، بتحكي جد، اه طبعا، تجوزيني وطلعيني من هان، طيب ولا يهكم ببعت امي لعندكو وبتخطبك . يخرب بيتك يا دلال، ذكرتيني بالذي مضى، والله اني حانة لكل البنات، ياه شو نفسي ترجع ايام المدرسة، على قد ما هي كانت حياة بسيطة، على قد ما هي عفوية وبريئة، كنا ماسكين ايدين بعض مثل الخوات، ملعون ابو الجنس والذكورة والأنوثة، ملعون ابو الجهل والتخلف، وينكو يا بنات . ميرفت وسارة مين تجوزت ومين لسة؟ ما احلاه هالفيسبوك، قرب البعيد ورجع العلاقات من تاني .

ثم تتناول الحوال وتطلب رقم صديقتها ميرفت.

انا علية يا ميرفت، نسيتي، ولك اشتقت لك كثير، اه رحت باريس، صحيح وانا بغزة تحولت لشب، وجيت اكمل علاجي، بس ما عدت متشجعة اكمل بصراحة، هون ما في فرق بين البنات والشب، هيني باشتغل جرسونة بكافي، وتعرفت على زملائي بالشغل، وبدبت اعمل علاقة، ههههه اه بوي فرند مع شب اصله جزائري، اول ما عرف اني فلسطينية طار في، هون انا مش محتاجة اكون شب حتى اعيش بحريتي ولا براحتي .  
تيجي لعندي ههههه فكري لو بتقدري تعالي، بشوف كيف ممكن ابعت لك دعوة، المهم خلينا على اتصال، اورفوار،، باي حبيبتي .

## مشهد أخير

على نقطة الحدود (مطار او معبر او ميناء)

تقدم جواز سفرها عبر الكوة التي تفصلها عن موظف الجوازات (هنا يمكن اللجوء الى تسجيل صوت موظف الجوازات)

يقلب في صفحاته مستغربا،

\_ شنو الأسم؟ عالية علياء؟ والا علي؟ انت ايه راجل والا ست؟

\_ شو بتفرق يعني؟ انا أنسان،

\_ ايش بتفرق؟ بتفرق كثير، شكلك حدا متكرر والا سوابق، عموما، تفضل خليهم

يشوفوا شغلهم معك، حتى نعرف ايش جنسك؟ رجل والا امرأة؟

\_ يا عمي انا كنت بنت وصرت ولد، وبعدين رجعت بنت، وكنت هون، قبل شهرين

زمان، وهيني راجعة على بلدي، وين المشكلة يعني؟

\_ شو شو شو، كنتي بنت وصرتي ولد ورجعتي بنت، شو هي الشغلة، مشوار

طريق وألا أكلة سمك؟ تفضلي وألا تفضل على جوة خليهم يتأكدوا،

يتأكدوا من ايش يا أخ؟

\_ انك زلمة وألا مرة، لتكوني شكر (بصوت خافت)

\_ اسمع أول شي لا تغلط، ثاني شي، بدك تتعامل معي باحترام وعلى إني إنسان

وطبيعي جدا كمان،

يتحدث بالموبايل

\_ طيب الشخص بيحكى انه الآن رجل، يعني بدنا رجل يفحصه، ولو طلع ست،

بتصير مشكلة، ما عارف يفحصها وألا يفحصه رجل أمن وألا امرأة أمن،،

تتدخل أو يتدخل هو

\_ خليه طبيب أو طبيبة، أنا ما عندي مشكلة، المهم أنا ارفض انه رجل أمن اللي يتعامل معي

\_ ترفض وألا تقبل، انت تسكت وهذا مش شغلك . روح استنى هناك.

### (حالة أنتظار الفحص) :

هي كلها حرف واحد بين الجنس والجنس، بين الذكر والأنثى، بين الست والراجل، علي-عليه، شريف-شريفة، ماجد-ماجدة، حفيظ-حفيظة، مفيد-مفيدة، روعي-روحية، شوقي-شوقية، هذا كان زمان، اليوم صارت الأسامي مودرن، يعني ما في أولا خلفه مثل زمان، الزوجين كانوا يخلفوا بالسته والعشرة، وعادة ولد بعده بنت، أو العكس، وتقول أنها كانت الدنيا موقفه عند آدم وحواء، لما كان بكل بطن يجيهم توأم، ولد وبنت، وهيك تاء التانيث عمليا بتعني الأخ والأخت التوأم.

تنتبه إلى الحل فتركض باتجاه كوة موظف الجوازات قائلة:

طيب انتو ليش ما تشطبوا خانة الجنس من جواز السفر، يعني مش ضروري تعرفوا انه حامل الجواز ست وألا راجل.

يرد باستهزاء : ناقص كمان تحكي لنا نشطب خانة الديانة.

ترد بثقة : آه كمان اشطبوها ليش لا .


القاهرة

2017/12/25

المحتويات

6	العزل.....
21	غزة ع التكة.....
38	آخ لو كانت ولد.....
40	المشهد الأول.....
44	المشهد الثاني.....
47	المشهد الثالث.....
50	المشهد الرابع.....
54	أبو عرب في خانة اليك.....
71	السيد المدير العام.....
73	الفصل الأول.....
90	الفصل الثاني.....
110	جنون العظمة.....
125	مقهى الإبداع.....
127	الفصل الأول.....
139	الفصل الثاني.....
146	تاء التأنيث.....
163	المحتويات.....

الأعمال الكاملة  
المسرحيات  
رجب أبو سرية




- العزل
- غزوة ع التكة
- آخ لو كانت ولد
- أبو عرب في خانة اليك
- السيد المدير العام
- جنون العظمة
- مقهى الإبداع
- تاء التأنيث



ISBN 978-9950-414-10-5



9 789950 414105



الأعمال الكاملة  
المسر حياتي  
رجب أبو سريّة



الأعمال الكاملة  
المسر حياتي  
رجب أبو سريّة



- العزل
- غزوة ع التكة
- آخ لو كانت ولد
- أبو عرب في خانة اليك
- السيد المدير العام
- جنون العظمة
- مقهى الإبداع
- تاء التأنيث

